

20008

ԻԿ. ՎԻՔՔՈՐԻԱ ԱՐՇԱՐՈՒՆԻ

# ՄԵՐ ԴՊՐՈՑՆԵՐԸ

ԳԱՂՈՒԹՆԵՐՈՒ ՄԷՋ

ՈՒՅՈՒՄՆԱՍԻՐՈՒԹԻՒՆ

ՊՕՂՈՍԵԱՆ

ԳԱԼՈՒՍԵԱՆ

ՆՈՒՊԱՐԵԱՆ

ՊԷՐՊԷՐԵԱՆ

Վ.ԱՐԺԱՐԱՆՆԵՐՈՒ ՄԱՍԻՆ

2002

ԱՂԵՔՍԱՆԳՐԻԱ

Տպագր. Ա. ԳԱՍԱՊԵԱՆ

1932

372  
4-92

ՏԻԿ. ՎԻՔԹՈՐԻԱ ԱՐՇԱՐՈՒՆԻ

372  
4-92

# ՄԵՐ ԴՊՐՈՑՆԵՐԸ

ԳԱՂՈՒԹՆԵՐՈՒ ՄԷՋ

ԻՍՈՒՄՆԱՍԻՐՈՒԹԻՒՆ

ՊՕՂՈՍԵԱՆ

ԳԱԼՈՒՍՏԵԱՆ

ՆՈՒՊԱՐԵԱՆ

ՊԷՐՊԷՐԵԱՆ

ՎԱՐՁԱՐԱՆՆԵՐՈՒ ՄԱՍԻՆ

ԱՂԵՔՍԱՆԴՐԻԱ

Տպագր. Ա. ԳԱՍԱՊԵԱՆ

1932

2002

5503

2010



գրեւում հետ ծանօթանալու, կը խօսէի եւ կարծիքի փոխանակութիւններ կ'ունենայի ուսուցիչներուն եւ իրենց Տնօրէնին հետ :

Ուսումնասիրութեանս ընթացքին շատ մը գովելի առաւելութիւններ նկատելու առիթներ պակաս չեղան : Բայց բոլոր այս առաւելութիւններուն հետ՝ աչիս զարկին նաեւ կարգ մը բերութիւններ, կարգ մը պակասութիւններ, որոնք բաւական էին բացատրելու համար ձեռք բերուած արդիւնքներուն միջակութիւնը եւ կերպով մը կրնային արդարացնել բոլոր այն բնագոյնութիւնները, որոնք այդ վարժարանին դէմ կ'ուղղուէին :

Բայց այդ բերութիւններն ու պակասութիւնները Պօղոսեան վարժարանի՞ն յասուկ էին միայն : Արդեօք Եգիպտոսահայ միւս վարժարաններուն մէջ ալ չէի՞ն նշկատուեր անոնք :

Խորհեցայ թէ այս կրթական հաստատութեան մասին վերջնական վճիռ մը տալու առաջ, պարտաւոր էի բաղդատել զայն մեր միւս վարժարաններուն հետ : Եւ արդարամտութեան այս զգացումէն թելադրուած՝ որոշեցի ընդլայնել ուսումնասիրութեանս շրջանակը մինչեւ Փահիրէի Հայոց դպրոցները : Ուստի 1931 Յունուարին մեկնեցայ մայրաքաղաք եւ այնտեղ մնացի 15 օր, որոնց ընթացքին Փալուստեանի, Նուպարեանի եւ Պերպրեանի չորս պատերէն զատ ուրիշ հորիզոն չտեսայ : Ահաւասիկ այդ գանազան խղճամիտ եւ անկողմնակալ ուսումնասիրութեանց արդիւնքն է — այս կէտը կրնամ յայտարարել առանց փառելու — զոր կը յանձնեմ ընթերցող

հասարակութեան՝ ներկայ հաստիւն միջոցաւ, իմ կողմէս աւելցնելով միմիայն Բարեկարգութեան կարգ մը առաջարկներ, որոնց գաղափարն ունեցայ իմ հետազօտութիւններուս ընթացքին :

Բայց նախ պարտք կը համարեմ ներողութիւն խնդրել ընթերցողէն այն համարձակութեան համար, որ կը մղէ զիս իր դուռը ասի առնելու : Այսպիսի միջոցի մը չպիտի դիմէի անուշտ, եթէ բոլոր անոնք, որոնք հեռուէն կամ մօտէն կապ ունին գրեւում վերաբերեալ հարցերու հետ — հեղինակ, խմբագիր, գրավաճառ, սպուգրիչ, եւլն. — զիս ապահովցուցած չըլլային թէ տարբեր կերպով շարժելով ընթերցող չպիտի կրնայի գտնել ու այս գրքին 500 օրինակները դատապարտուած պիտի ըլլային գրատուններու փոռիին տակ փակուելու, վասն զի ոչ ոք պիտի ուզէր ինքնաբերաբար հաս մը գնել անկէ՛ անգամ մը աչիք անցնելու համար :

— Մեր մէջ կարդացող չկայ — կ'ըսէին ինձի, մանաւանդ հայերէն գիրքերը գրեթէ բնաւ չեն փառալուիր. նկատի ունեցէ՛ք նաեւ թէ ձեր յուզած խնդիրները շատ հեռու են յանկուցիչ ըլլալէ . . . :

Ընդհակառակն, ես ջերմօրէն կը փափաքեմ որ այս գիրքը կարդացուի, վասն զի խորապէս համոզուած եմ թէ անոր մէջ ձեռնուած հարցերը այսուհետեւ առաջնակարգ տեղ մը գրաւելու կոչուած են մեր բոլոր մտահոգութիւններուն մէջ : Արդարեւ, դպրոցին հետ կապուած են կարգ մը այնպիսի հարցեր, օրինակ, Փաղուքներու

մեջ մեր բարգաւանումը, ապահովութիւնը եւ նոյնիսկ մեր գոյութեան յարատեւութիւնը իբրեւ Հայ, որոնք խիստ կենսական կարեւորութիւն մը կը ներկայացնեն մեզի համար :

Ու հակառակ անոնց սկեպտիկ ժպիտներուն, հակառակ այս կարգի ձեռնարկէ մը ետ կենալու համար ինձի տուած խորհուրդներուն, յամառելով իմ դիտարկութեանս մեջ, այս էջերը մամուլին յանձնելու եւ ձեզի ղրկելու յանդգնութիւնն ունեցայ : Նայինք քե՛ս ո՛ր մեկս իրաւունք պիտի ունենանք, անո՛նք, որ իրենց փորձառութեան վրայ հիմնուելով, խորհուրդ կուտային ետ կենալ այս մտադրութեան, քե՛ս ե՛ս, որ վստահելով ձեզի, այ՛ք առ.ի այս արկածախնդրութիւնը :

*Արմենիա*

## Մ Ե Ր Դ Պ Ր Ո Ց Ն Ե Ր Ը

ԳԱՂԹԱՎԱՅՐԵՐՈՒ ՄԷՋ

«Ժողովուրդի մը համար կրթական սիսթեմի մը ընտրութիւնը ցաւ աւելի կարեւոր է, քան պետական վարչաձեւի մը ընտրութիւնը»:  
ԿԻՍՏՔԱՎ, 19 ՊՕՆ

### ՆԵՐԿԱՅ ՈՒՍՈՒՄՆԱՍԻՐՈՒԹԵԱՆ ՆՊԱՏԱԿԸ

1930 Հոկտեմբերի 27ի առտուան ժամը 9ին ներս կը մտնեմ այն մեծ դռնէն՝ որ կը բացուի Աղեքսանդրիոյ Հայկական կալուածին վրայ — պիտի ըսէի, որ ցոյց կուտայ Հայկական սահմանազուլիսը: Սխա՞ղ պիտի ըլլար արդեօք այս արտայայտութիւնը: Հողի այդ անկիւնը՝ որուն մէջ կը կեդրոնանան մեր քաղաքային ու կրօնական իշխանութիւնները, որ իր ծոցին մէջ կը պահէ, որպէս պզտիկ պատկերը մեր մեծ Հայրենիքին, անցեալը իր մեռելներով, ապագան իր դպրոցներով, և բոլոր այն բաները՝ զորս կը սիրենք ու կը պաշտենք և որոնց կը բաղձանք, միթէ տեսակ մը հայրենիք չէ՞, մեր հողեկան հայրենիքը:

Ահաւաստիկ գերեզմանատունը՝ ուր յաւիտենական քունով կը քնանան անոնք՝ որ մեզի կտակեցին բարոյական և նիւթական այն թանկարժէք ժառանգութիւնը, որուն վրայ մինչեւ այսօր կ'ապրինք մենք,

Եգիպտահայերս, մասնաւորաբար Աղեքսանդրիոյ Հայութիւնը: Ահաւասիկ դամբարանը Մեծ Հայերէն Առաջինին, Պողոս պէյ Եռուսեփի, նախարար, խորհրդական և բարեկամ Նոր-Եգիպտոսի մեծանուն հիմնադրին, Մուհամմէտ Ալիի, որ 20 տարի շարունակ (1824—44) իր մօտ պսնեց խելացի, ճարպիկ, անձնուէր և ուղղամիտ այս մարդը և իր վստահութեան ամենէն մեծ ապացոյցը տուաւ անոր, վստահութիւն, որուն նմանը քիչեր միայն կրցած են վայելել իրենց վեհապետին կողմէ. երբ Մուհամմէտ Ալի կը ձեռնարկէր Սուտանի երկար և մտանգաւոր արշաւանքին (1839), անոր էր որ յանձնեց իր կառավարութեան ղեկը:

Բայց ոչ փառքը, ոչ ալ հարստութիւնը կրցան մոռցնել տալ այս Հայուն իր ծագումը և իր ազգային պարտականութիւնները: Անոր յստակատեսութեանն է որ կը պարտինք իբրև առանձին հասարակութիւն մեր վայելած ազատութիւններն ու առանձնաշնորհումները ապահովող խտիվական հրովարտականքը, ինչպէս նաեւ իր առատաձեռնութեան կը պարտինք հողային այն ընդարձակ կայուածք, որու եկամուտներով կը մատակարարուին Աղեքսանդրիոյ մեր Առաջնորդանին պէտքերուն մեծագոյն մասը:

Անոր ճիշդ քովը, իր վերջին հանգստարանին մէջ կը ննջէ Հայաստանի ուրիշ մէկ նշանաւոր զաւակը, Առաքել պէյ Նուպար, որ եգիպտական կառավարութեան մէջ ամենէն մեծ պաշտօններուն բարձրանալէ յետոյ, Սուտանի կառավարիչ նշանակուեցաւ: Յայտնի է թէ այս օրինապահ Հայը իր կեանքը վրայ տը-

ւաւ իր վեհապետին, Խտիվ Սախտ փաշային (1854—1863) ցոյց տուած հաւատարմութեան համար...:

Ահա սակայն աւելի պատկառելի ուրիշ գերեզման մը. հոն ամփոփուած են նշխարներն այն նշանաւոր մարդուն, որ ամենէն աւելի փառաւորեց Նուպարեան մեծ գերգաստանը և որուն անունը հպարտութեան անսպառ աղբիւր մըն է մեզի համար: Նուպար փաշա Նուպարն է այն, Սահն Դատարաններու հիմնադիրը և նոր Եգիպտոսի մեծութեան գլխաւոր սիւներէն մէկը:

Քիչ մը անդին, թաւախիւ ծառի մը շուքին տակ, կը քնանայ խելացի, յանդուզն մտքով ու պողպատէ կամքով օժտուած մարդ մը, սպասելով ի պատիւ իրեն բարձրացուելիք յուշարձանին — Գրիգոր Մեղքոնեան: Նա կենդանի մարմնացումը հանդիսացաւ մեր ցեղը յատկանշող տոկունութեան, անվհատ կորովի, նախաձեռնող և արկածներու սիրահար մտքի այն յատկութիւններուն, որոնք ցոյց կուտան թէ ի՞նչպէս հայ տարագիրը օրին մէկը ոտք դնելով օտար հողի վրայ՝ կը յարմարի անոր և կը բարգաւաճի: Գրիգոր Մեղքոնեան սերմի այն աննշան հատիկն է, որ դիպւածով այս ամերուն վրայ նետուելէ յետոյ, ընդհուպ արմատ բունեց և դարձաւ հզօր կաղնի մը:

Ահա գերեզմանը Յովսէփ Եպիսկ. Այվազեանի, Հայ Եկեղեցւոյ հովիւներէն մէկուն, այն եկեղեցւոյ՝ որ երկու հազար տարիներու իր պատմութեան մէջ, ունեցաւ իր մեծութեան ու նուազումի շրջանները, բայց որ ոչ մէկ ատեն չդաւաճանեց սրբազան կրակը վառ պահողի իր պաշտօնին դէմ: Արդարեւ, ուրա-

կանը կուգար ու կ'անցնէր, բայց բոց մը կը շողար անոր թողուցած աւերակներուն տակ. Եկեղեցին էր ան: Ու մարդիկ, կոչիճուած, յուսահատ ու բարոյալըքուած մարդիկ, կը դիմէին անոր, իրենց հոգիին մէջ փոխադրելու համար այն կայծը, որ կը տաքցնէ, կը կենդանացնէ ու ոգեւորութիւն կը պարգեւէ:

Ու դեռ այսօր ալ իր դիրքը չէ լքած ան:

Հասարակաց վայրերու մէջ, փառքի խլեակներու համար իրարու դէմ մարտնչող մարդիկ, կը հայհոյեն, զիրար կը պատռեն, վայրագ ու անլուր բառեր կը փոխանակեն, և իրենց կոյր ու ցաւագար կատաղութեան մէջ կը փճացնեն հասարակաց ժառանգութեան յետին մնացորդները: — Միայն ան է, մեր սիրեցեալ, մեր պաշտելի Եկեղեցին, որ կը դարմանէ անցեալին վէրքերը և կը պատրաստէ ապագան լռութեան և սուտերներու խորհուրդին մէջ:

Ա՛հ, երկիւղածութեամբ խոնարհինք այդ գերեզմանին առջև:

Վերջապէս, քիչ մը անդին, քարաշէն դամբարանի մը տակ, կը հանգչի մեծարժէք մարդ մը, անկեղծ հայրենասէր մը, խելացի ու յարկեշտ պաշտօնատար մը, անընկճելի կորովով օժտուած պայծառատես միտք մը, այն մարդը, որուն կը պարտինք Ազեքսանդրիոյ մեր եկեղեցին ու վարժարանը, իր անունը ծանօթ է բոլորիդ, Թագւոր փաշան է ան:

Ահա նաեւ Եկեղեցին, անմահ խորհրդանշանը անշիջանելի յոյսերու, անայլալ աղբիւրը հոգեկան մխի-

թարութեանց ու նոյնինքն արտայայտութիւնն իսկ Հայրենիքին՝ արտասահմանի Հայերուս համար:

Վերջապէս, ահաւասիկ դպրոցները, այն հայոցները՝ որոնց մէջ կը պատրաստուի մեր նոր սերունդը:

Նոր Սերունդը, աւա՛ղ: Ճակատագիրը, ինչե՛ր վերապահած է արդեօք իրեն: Անոր կեա՞նքն ալ պիտի թունաւորուի մեր կրած ցաւերով և յուսախաբութիւններով, կամ թէ մեզմէ աւելի բախտաւոր պիտի չըլլա՞յ ան, սովորական ժամանակներու մարդոց վիճակուած վայելքներէն, մտահոգութիւններէն և կամ պայքարներէն զատ ուրիշ բան չճանչնալով, և կամ, ընդհակառակը, աւելի երջանիկ ու փառաւոր օրեր տեսնելու կոչուած չէ՞ արդեօք: Անթափանցելի՛ գաղտնիք: Ինչ որ ստոյգ է, սա է թէ վաղուան սերունդն է ան. այն ժառանգորդը, որուն պիտի ձգենք մեր ամենէն հին և ամենէն աւելի բարգաւաճ գաղութներէն մէկուն հաւաքական հարստութիւնը:

Ի՞նչպէս պիտի վարուի տոյգ ժառանգութեան հետ. պիտի կրնա՞յ օգտուիլ անկէ՞ տասնապատկելով անոր արժէքը. թէ՞ պիտի մատակարարէ զայն ողորմելի միջոցներով և ապարդիւն կերպով, ինչպէս ըրինք ու կ'ընենք մենք այնքան երկար ատենէ ի վեր. պիտի չփճացնէ՞ արդեօք այս սրբազան ժառանգութիւնը, այս կերպով փութացնելով վերջնական անկումը մեր այն գաղութներէն մէկուն, որ եթէ ոչ քանակով ու հարստութեամբ, գոնէ իր արժէքովն ու գիրքովը, Եգիպտոսի առաջին գաղութներէն մէկը եղաւ:

Փորձենք տեսնել թէ ի՞նչպէս կը պատրաստեն

այդ սերունդը . մեր այս քննութիւնը թերեւս պիտի կրնայ հնարաւորութիւն տալ գուշակութիւններ ընելու անոր ապագայի մասին :

Սակայն ամենէն առաջ պարտաւոր եմ յայտնել իմ դիտաւորութիւնս : Արդարեւ ինծի կամ Աղեքսանդրիացի ընթերցողին հաճելի ժամանց մը հայթայթելու համար չէ որ կը ձեռնարկեմ ներկայ ուսումնասիրութեան և անոր միջոցաւ Եգիպտահայ գաղութին անպազան կարգալու աշխատանքին , ոչ ալ գովելու կամ քննադատելու անիմաստ գոհունակութիւնն է որ գործի կը մղէ զիս : Իմ միակ նպատակս է հասկնալ իրական արժէքը մեր վարժարաններուն մէջ ջամբուած մտաւորական սնունդին , ստուգել թէ ո՛րքան հիմնաւոր են անոնց դէմ ուղղուած քննադատութիւնները , թէ բարեկարգուելու ո՛րքան հաւանականութիւններ կը ներկայացնեն անոնք և թէ այդ բարեկարգութիւնները տարածելով Արեւելքի մեր դպրոցներուն վրայ , ի՛նչ չափով կրնանք բարձրացնել անոնց մակարդակը և այս կերպով ծառայել մեր գաղութներու բարոյական և մտաւորակ սն բարձրացման :

Թերեւս առարկուի թէ ճիշտ չէ կարծիք յայտնել մեր կրթական ընդհանուր գործին նկատմամբ՝ հիմնուելով միմիայն Եգիպտահայ վարժարաններուն վրայ : Բայց այս առարկութիւնը կը հերքուի առանց դժուարութեան : Արդարեւ , իրաւունք չունի՞նք միթէ տաղանդի մը արժէքին մասին արտայայտուելու՝ իր լաւագոյն գործերը միայն քննելով , և կամ օրէնքին հակառակ շարժած կ'ըլլանք արդեօք , երբ դրութեան

մը արժէքը կը դատենք իր լաւագոյն կիրարկումներուն վրայ հիմնուելով :

Արդ , այնպէս կը կարծեմ թէ Եգիպտոսի մեր վարժարանները , ներկայիս մեր լաւագոյն կրթական հիմնարկութիւններն ըլլալու են : Արդարեւ , բոլոր փաստերը ցոյց կուտան թէ անոնք շատ աւելի բարձր են քան Պաղեստինի , Սիւրիոյ , Միջագետքի և բոլոր միւս գաղութներու . վարժարանները , ուր մեծ մասամբ թշուառ տարագրեալներէ բաղկացած հայ ժողովուրդը կազմակերպուելու ո՛չ ժամանակ ունեցաւ տակաւին ոչ ալ միջոց :

Կրնանք ենթադրել նաեւ թէ Եգիպտահայ վարժարանները , զերծ արտաքին ամէն միջամտութենէ և օժտուած հաստատուն եկամուտներով , Պոլսահայ վարժարաններէն ալ բարձր ըլլալու են ներկայիս , վասնզի այս վերջինները 1914էն ի վեր այնքան զրկանքներու ենթարկուեցան , այնքան սեղմումներ կրեցին և նիւթական այնպիսի դժուարութիւններու դէմ ստիպուած են մաքառիլ , որ այսօր անհրաժեշտօրէն կորսնցուցին առաջնութեան աստիճանը , որուն վրայ կը գտնուէին պատերազմէն առաջ : Հետեւաբար այստեղի մեր վարժարանները՝ իրենց վալելած կարգ մը առաւելութիւններով , կրնան ամենէն յաջողակները համարուիլ և իբր թիփ-վարժարաններ՝ եթէ կարելի է այսպէս ըսել , ներկայացուցչական արժէք մը ունին և կրնան որպէս փորձաքար ծառայել ամէն անոնց համար , որոնք կը փափաքին իրական գաղափար մը կազմել մեր ուսուցման որակին և աստիճանին մասին :

ի՞նչ օգուտ, սակայն, երկար ատեն ընդհանուր նկատողութիւններով ժամավաճառ ըլլալէ. իսկական դիտողութիւնը կը խրտչի վերացական և տարտամ խօսքերէ: Փութանք դէպի Մելգոնեան Մանկապարտէզ և հոն, տեղւոյն վրայ ուսումնասիրենք մեր մեթոտները, ծրագիրները և ուսուցչական մարմինը:



Ա.

## ԱՂԵՔՍԱՆԴՐԻՈՅ ԱԶԳ. ՎԱՐԺԱՐԱՆՆԵՐԸ



### ՄԵԼԳՈՆԵԱՆ ՄԱՆԿԱՊԱՐՏԷԶԸ

Մելգոնեան Մանկապարտէզը գեղեցիկ հիմնարկութիւն մըն է, զոր վերջերս (1928) Աղեքսանդրիոյ հայ հասարակութեան պարգեւեց Տիար Կարապետ Մելգոնեան: Այս ընդարձակ շէնքը, հեռու շրջապատի տուներէն և մանաւանդ շուկայի ժխորէն, կը բարձրանայ Եկեղեցիի արեւմտեան հարաւային կողմը, հազիւ մէկ երկու հարիւր քայլի չափ հեռու անկէ: Տասնեակ մը աստիճաններով մարմարէ սանդուխէ մը բարձրանալէ յետոյ՝ կը մտնենք պզտիկ գաւիթը և անկէ կ'անցնինք լայն հանդիսասրահը — կեդրոնական բաժանումը — որուն չորս կողմը կարգաւ կը բացուին դասարանները:

Պ. Կ. Պիոնեան — վարժարանին նոր տնօրէնը, նախկին ուսանող ժընեւի համալսարանին, և տարիներէ ի վեր կրթական պատասխանատու պաշտօններ վարած Պարսկահայ վարժարաններու մէջ — կ'ընկերանայ ինծի այս առաջին այցելութեանս առթիւ, կը ներկայացնէ զիս Մանկապարտէզի տնօրէնուհիին, Տիւկին Զէյթունցեանի և այցելութեանս նպատակը կը

բացատրէ անոր, Ներկայացման ձեւակերպութիւններէն յետոյ Պ. Պիոնեան կը հեռանայ ու մենք կը մընանք առանձին տնօրէնուհիին սենեակին, մէջ և բարեկամական խօսակցութիւն մը կը բացուի մեր միջև :

Աչք մը պտտցնելով այս պարզ և անզարգ սենեակին վրայ, կը տեսնեմ գրադարանը ու գրքերուն մէջ ուշագրութիւնս կը գրուեն Մոնթէսորիի երկու հատորները :

— «Արդեօք Մոնթէսորիի մէթոտով կ'առաջնորդուիք այստեղ, Տիկին, կը հարցնեմ Տիկին Չէյթունցեանի. շատ լաւ կը խօսին անսր մասին : Այսօր Իտալիոյ մէջ մեծ թիւով մանկապարտէզներ կան այդ մեթոտին վրայ հիմնուած : Այս նշանաւոր կլինը կատարելագործեց և լուսարանեց շատ մը կէտեր՝ որոնք մուծ մնացած էին մանկապարտէզներու ստեղծիչ երկու մանկավարժներու՝ Բիտալոմոծիի և Ֆրէժուէլի : Կ'ըսեն թէ Իտալացիները նոյնիսկ հոս, Աղեքսանդրիոյ մէջ, ունին այդ մեթոտին վրայ հիմնուած տիպար վարժարան մը : Միտքս գրած էի այցելել հոն և մանրամասնօրէն ուսումնասիրել այդ մեթոտին կիրարկումները, որ, ինչպէս ինձի կը թուի, փոքրաթիւ դասարաններու և անբնականոն աշակերտներու կը յարմարի : Դժբախտաբար, սակայն, վճռաբար արգիլուեցաւ ինձի իտալական վարժարաններու մուտքը : Իտալացիները, որոնք այնքան բարեացակամ, այնքան պարզ և այնքան դիւրամատչելի էին, խիստ պաղ վերապահութիւն մը ցոյց կուտան օտարներու նկատմամբ ֆալստական ըէժիմէն ասդին : Պարապ տեղը քանի մը

Հոժ .

անգամ անունս տուի, իբրեւ լրագրող ներկայացայ իրենց, յայտնեցի թէ խիստ սիրով ընդունուած էի Փրանսական Լիսէին կողմէ, բացատրեցի թէ մանկավարժական գրութիւն մը չի կրնար արհեստագիտական գաղտնիքներ պարունակել ճարտարարուեստական արտագրութեան մը նման : Սակայն իտալական հիւպատոսարանի պաշտօնեաները ոչ մէկ կերպով ուզեցին համակերպիլ ու ամէն անգամ նոյն մերժողական պատասխանն ստացայ . «Պ. Հիւպատոսը չի փափաքիր որ . . . » : Թերեւս հոս ձեր մանկապարտէզին մէջ, Տիկին, պիտի կրնամ գոհացնել այս մասին ունեցած հետաքրքրութիւնս :

— Օտար վարժարաններն այցելելու առիթ ունեցած չեմ», կը պատասխանէ Տիկին Չէյթունցեան, «Հետեւաբար բաղդատութեան եզր մը չունիմ և չեմ կրնար ըսել թէ արդեօք հոս պիտի կրնա՞ք գտնել այն ինչ որ կը փափաքէիք տեսնել իտալական վարժարաններն այցելելով : Բայց կրնամ վստահացնել ձեզ որ թէ՛ ես և թէ՛ իմ աշխատակիցներս կատարելապէս նշւիրուած ենք մեր աշակերտներուն ու եթէ երբեք պակասութիւն մըն ալ նշմարէք մեր մանկապարտէզին մէջ, կրնաք ապահով ըլլալ թէ մեր անպարտաճանաչութեան հետեւանք չէ ան : Մեր Մանկապարտէզն ալ կը տառապի «դրամի չգոյութենէն», հիւանդութիւն մը, որով վարակուած են բոլոր հայ վարժարանները :

«Այսպէս, դրամ չգտնուելուն համար չենք կրնար հայթայթել մանկապարտէզներու համար անհրաժեշտ իրեղէնները : Ամէն տարի յաւելուածական գումար մը

4665



կ'ուզենք ուլունքներու, խաւաքարտի, գոյներու և խաղալիկներու պատրաստ պաշար մը ունենալու համար: Բայց, ինչպէս գիտէք, Առաջնորդարանի դրամարկը պարապ է միշտ... երբեմն տնտեսական, երբեմն քաղաքական տագնապներու պատճառաւ: Հոգաբարձուներն ալ — եթէ կան — չեն կրնար մեր աշխատութեան համար անհրաժեշտ նիւթերն ու գործիքները հայթայթել, ու մեր ձիգերը անխուսափելիօրէն կը դատապարտուին ամլութեան...»:

Յանկարծ ընդարձակ շէնքին լուսթեան մէջէն կը լսուի հարիւրաւոր պղտիկ ոտքերու աղմուկը և վարժուհիի մը ձայնը, որ վայտէ չըխըխիկ (claquoir) մը ձեռքը չափ կուտայ անոնց քայլերուն... «Մէկ, երկու, աջ, ձախ...»: Ու պղտիկներու կարգը կ'անցնի մեր առջեւէն՝ իրենց կարմիր գոգնոցներով, ձերմակ վզնոցներով, իրենց սիրունիկ աչքերը հետաքրքրութեամբ յառած օտարական հիւրին վրայ... կը դիտեմ այս մանուկները, որոնք ուշիմ են, մաքուր ու պըճնասէր և կը ժպտին ինծի շնորհալիօրէն բարեւելով... Ես ալ կը ժպտիմ իրենց բոլոր սրտովս:

Ի՞նչպէս չյիշել Վիքթոր Հիւկոյի տողերը.

«Երբ մանուկը կ'երեւի, պէտք է որ ճակտին կընձիւնները պարզուին» ևն.:

Տղոց երկար շարքը ցրուեցաւ պարտէզ հասնելուն պէս: Դժբախտաբար աշակերտներու դրօսանքին յատկացուած այս պարտէզը խիստ նեղ է և 200-280 տըղաք չեն կրնար ազատ համարձակ խաղալ այնտեղ:



Ասկէ զատ, ոչ ծառի մը շուքը կայ հոն, ոչ ծաղիկներու զուարթութիւնը, ոչ ջուրի աւազան մը, ոչ իսկ աւազի կոյտեր, որոնց վրայ ամենէն պղտիկները կըրնային ի հարկին շինութիւններ ընելով զբաղել:

Ուստի, մեծ մարդու նման, խելօք խելօք կը պտտին անոնք, իրենց վարժուհիներուն արթուն հըսկողութեան տակ: Երբ ներս մտնելու նշանը կը տըրուի, իսկոյն կարգերը կը վերակազմուին և դասարան կը մտնեն միշտ չափուած քայլերով: Ես ալ այդ պըզտիկ զինուորներուն պէս կ'ընեմ. հետեւելով իրենց՝ կը մտնեմ 4-5 տարեկաններու դասարանը (Միլ), ու սենեակին հեռաւոր մէկ անկիւնը, նստարանի մը վրայ նստած, լուի մեջիկ մտիկ կ'ընեմ թուաբանութեան դասը: Այս դասարանին մէջ տղայքը կը սորվին համբել 1-էն մինչև 10, բայց դեռ հազիւ մինչև 4ը հասեր են: Վարժուհին պատէն կախուած փոքրիկ պահարանի մը մէջէն կը հանէ խաւաքարտէ տուփ մը և անոր մէջ գտնուած փոքրիկ գաւազանիկները — հազիւ լուցկիի կոթերու մեծութեամբ — կը բաժնէ աշակերտներուն: Իսկ ես աչքէ կ'անցնեմ դասարանը, որ բաւական ընդարձակ է. լոյսը հեղեղօրէն ներս կը յորդի լայն պատուհաններէն. բայց ամբողջ շէնքը այնպիսի գիրքով մը շինուած է որ սենեակներէն ոչ մէկը ուղղակի արեւին դէմ ինկած է: Հետեւաբար կը խորհիմ թէ ձմեռը բաւական ցուրտ ըլլալու է: Պատերը սպիտակ են և մաքուր, բայց բոլորովին մերկ. ո՛չ մէկ պատկեր, ո՛չ իսկ ձեռագործներու և խաղալիկներու դարան մը, քիչ մը զուարթութիւն գնելու

համար անոնց ցուրտ միօրինակութեան մէջ: Պատու-  
հանները բաւական բարձրէն բացուած ըլլալով, կա-  
պոյտ երկինքէն զատ ուրիշ բան չի տեսնուիր, այն-  
պէս որ մարդ վանականի խցիկի մը մէջ կը կարծէ  
ինքզինքը: Աշակերտները երկ-երկու հոգիով նըս-  
տած են պզտիկ ցած գրասեղաններու առջեւ, որոնք  
բաց-սրճագոյն ներկուած և գծաւորուած են նուրբ  
գիծերով, որպէս զի տղայք կաշինան անոնց վրայ շի-  
նել գրատախտակին վրայ իրենց ներկայացուած գը-  
ծաւոր պատկերները (dessin linéaire): Թուաբանու-  
թեան դասը 20 վայրկեան կը տեւէ, յետոյ պզտիկ ու-  
տանաւորներ կ'տրտասանեն — և ո՛րքան յաջող կեր-  
պով, Աստուած իմ — ու դասը կը վերջանայ երգով  
մը, զոր բոլորը կ'երգեն այնքան մէկ բերան և այն-  
պիսի ճաշակով մը, որ իսկապէս գժուար է սպասել  
այս տարիքի տղոցմէ:

**Բ. ԱՅՅԵԼՈՒԹԻՒՆ.** 19 Նոյեմբեր, չորեքշաբթի կես  
օրէ վերջ. դասը գծագրութիւն է:

Գրատախտակին վրայ գծուած է խիստ պարզ պատ-  
կեր մը, զոր աշակերտները կը ջանան վերարտադրել  
իրենց սեղաններուն վրայ սեւ ոսպերու միջոցաւ!!!  
Անոնք որ վերջացուցեր են, ձեռքերը ետեւնին, լուռ  
և անձայն կ'սպասեն՝ մինչեւ որ միւսներն ալ վերջա-  
ցընեն իրենց ոսպերուն կոյտը:

Ուրիշ տեղեր, մանկապարտէզներու յետ-միջօրէի  
այս պահերը յատկացուած են այնպիսի զբաղումներու՝  
որոնք կըթելու և միանգամայն զբօսցնելու կրկնակ  
առանելութիւնն ունին: Այն տեղերը կէս օրէ վերջ

տղայք կը զբաղին հիւսելով, խաւաքարտի վրայ ա-  
սեղնագործութեան կամ ջրաներկի վարժութիւններ  
ընելով, կաղապարներ հանելով (modelage), զանազան  
չինութիւններով, և շն. և շն. բոլորն ալ հրապուրիչ  
զբաղումներ, որոնք կրնան զարգացնել տղոց ուշագ-  
րութիւնը, գիտելու կարողութիւնը, ճաշակը, ձեռքի  
ճարպիկութիւնը, և իրենց այլազանութեամբը ոչ  
յոգնութիւն կը պատճառեն աշակերտներուն, ոչ ալ  
ձանձրոյթ:

Բայց չէ՞ որ Տիկին Զէյթունցեան նախապէս ըսած  
է ինծի «գրամի չգոյութենէն...»:

Վերջապէս, երկար ժամերով անշարժ նստելէ յե-  
տոյ, ժամը 4ին զանգակ մը կը զարնէ, ազդարարելով  
թէ գպրոցական պահերը վերջացած են:

Տղոց խումբը դուրս կը յորդի թռչուններու զը-  
ւարթ երամի մը պէս: Բայց հարիւրի չափ աշակերտ-  
ներ գեռ պիտի սպասեն այնտեղ մինչև որ տնէն զան  
զիրենք առնելու: Վարժուհիները զանոնք կը համա-  
խմբեն պարտէզին մէջ և զբօսցնելու համար կը կազ-  
մեն 40—50 հոգինոց կլոր շրջանակներ, որոնց մէջ  
երկու հոգի միայն գործօն գեր ունին, իսկ մնացած  
48 աշակերտները կը սպասեն, կրաւորական ու ձանձ-  
րացած գիրքի մը մէջ, մինչև որ կարգը իրենց գայ:  
Քրքշալիւր ծիծաղը, խօլական գուարթութիւնը, ազատ  
շարժումները կը բացակային այս խաղերուն մէջ. ա-  
շակերտներուն գէմքերը լուրջ են, որպէս թէ գեռ  
կը շարունակին դպրոցական պարտականութիւն մը  
կատարել:

Ահ, Հայերը... Անոնք կը ճամբորդեն այս կեանքին մէջէն — տառապանքի համար նախասահմանուած էակներու նման — մեղամաղձոտ, ծանր ու լուրջ, լըռութեան ու վշտի չես գիտեր ո՛ր պիտի անողորմ օրէնքի մը լուծին տակ կքած, զուրկ անվրդով հանգիստի, անկաշկանգ արտագեղումի, ճշմարիտ և անհոգ զուարթութեան բոլոր անուշութիւններէն: Այս բնու մեծերուն համար աստիճան մը կրնայ տանելի ըլլալ թերեւս, բայց պղտիկնե՛րը...

Ես պիտի առաջարկէի որ այնքան և մինչև անգամ աւելի հոգ տանէինք մեր տղոց մէջ զուարթ տրամագրութիւններ մշակելու, որքան ջանք կը թափենք մայրենի լեզուին գրերը սորվեցնելու համար անոնց: Ընթերցողը պիտի խնդայ թերեւս: Բայց ինչո՞ւ համար: Ուրիշներու կարծիքը ինչ ալ ըլլայ այս մասին, ես կը խորհիմ թէ զուարթութիւնը բնական տրամագրութիւն մը չէ մանուկին մէջ: Աշխարհ եկած ատեն՝ անոր առաջին ինքնաբերական ճիշդ հեծեծանք մըն է: Իսկ ծիծա՞ղը: Ամիսներով պիտի սպասես որպէս զի անոր շրթունքին վրայ առաջին ժպիտին ծաղկիլը տեսնես, ու այն ալ յաճախ մայրական սիրոյ պաշտելի շնորհքին և անոր անպատում հանճարամտութեան միջոցաւ միայն:

Ոչինչ խնայելու է ուրեմն մանուկին զուարթ տրամագրութիւնները քաջալերելու համար: Թող չկարծուի թէ անտես առնուելիք բաներ են ասոնք: Զուարթութիւնը արտայայտուածութիւնն է հոգեկան թաքուն ոյժերու և գրոշմը զօրաւոր կամքերու. ան ուրիշ բան

չէ եթէ ոչ բարոյական այն քաջութիւնը, որուն շնորհիւ մանուկները, չափահաս դառնալէ յետոյ, պիտի կրնան յաղթել կեանքի աւօրեայ դժուարութիւններուն և ձախողութեանց, առանց ընկճուելու և առանց վհատելու:

**Գ. ԱՅՅԵԼՈՒԹԻՒՆ:**

Թուաբանութիւն 6—7 սարեկաններու, այսինքն՝ «Կոկոն» դասարանին:

Միւս անգամներուն պէս, այս անգամ ալ դասարանին մէկ անկիւնը քաջուած, լուռ և անշարժ, կը ջանամ իմ ներկայութիւնս զգալի չգարձնել ոչ միայն աշակերտներուն, այլ նոյնիսկ իրենց վարժուհիին:

Այստեղ 1—20 համրել կը սորվեցնեն տղոց. բայց հազիւ դեռ մինչև 12 թիւը հասած են: Աշակերտները, հետեւելով իրենց վարժուհիին, կը կրկնեն երգելու ձեւով. «8 խորանարդ և 3 խորանարդ՝ հաւասար են 11 խորանարդի» և ըն. ու կը դիտեմ որ աւանձին առանձին պատասխանելու ատեն ալ՝ տղայք կը պահեն երգելու միեւնոյն ձեւը, սովորութիւն մը՝ զոր պիտի նկատէի նաև նախակրթարանին մէջ, — վասն զի աշակերտները իրենց հետ կը տանին զայն մինչև վերջին դասարանները, — բան մը որ խիստ անախորժ կը հնչէ այցելուին ականջին և չափազանց ծաղրելի և անհամ կը դառնայ մեծ պատանիներու և 16 տարեկան աղջիկներու բերնին մէջ:

Ասկէ զատ, երգելով դաս ըսելու այս հին ձեւը զանդաղ է, ձանձրացուցիչ ու միտքը կը քնացնէ:

Փաստ կ'ուղէք. անաւասիկ. աշակերտները չեն կրնար պատասխանել, երբ վարժուհին պատէն կախուած պահարանը բանալով՝ 12 պղտիկ գլաններ կը հանէ անկէ և կարգով կը կանչէ տղայքը դասին մէջ իրենց սորվածը ասպացուցանելու համար: Միւս կողմէ, խաւաքարտէ այդ գլանները խիստ մանր և վարժուհիին սեղանը շատ ցած ըլլալով, անոր առջեւ կեցող աշակերտը թոյլ չի տար որ միւսները հետեւին իր շարժուածեւորուն, և որովհետեւ մանուկները բնականէն անհանդարտ են ու չեն կրնար կենալ առանց բանով մը զբաղելու, երբ իրենց շիփ շիտակ մարմինը կռթռնցուցած են աթոռներու յենարանին ու ձեռքերն ալ ետեւնին բռնած, օդին մէջ տնկուած իրենց պղզտիկ քիթերը հաճոյքէն փոթ փոթ կ'ըլլան արեւի ճառագայթի մը մէջ թռչտող ճանձերու խօլական պարը գիտելով:

Ընթերցանութիւն եւ ուղղագրութիւն «Ծաղիկ» դասարանի:

Փոքրիկները կը հետեւին ընթերցանութեան դասին՝ աչքերնին իրենց գրքերնուն յառած: Վարժուհին կարգով կը հանէ զանոնք ու ես կը զարմանամ տեսնելով թէ ո՛րպիսի ուշիմութեամբ կը կարգան ու կը բացատրեն իրենց դասը:

Դժբախտաբար ընթեցանութեան մէջ որքան յաջող, այնքան տկար են ուղղագրութեան մէջ: Ընթերցանութեան դասէն երկու տող կը թելադրուի իրենց ու կը գիտեմ որ աշակերտներէն շատերը բառերուն

ժեծ մասը սխալ գրեր են: Բայց տնոց գիրը կանոնաւոր է ու կը տեսնեմ որ մաքուր գրելու ճիգը չի պակսիր իրենց մէջ:

Դասը կը վերջացնեն մարմնամարզական քանի մը շարժումներով և սիրուն երգով մը, զոր կ'երգեն խիստ ակորժալուր կերպով:

Դ. ԱՅՅԵԼՈՒԹԻՒՆ:

Պատմութիւն եւ իրագիտութիւն:

Այս առտու Մանկապարտէզ մտած ատենս, կը տեսնեմ հարիւրի չափ փոքրիկներ՝ որոնք համախըմբուած են մեծ հանգիստահրահին մէջ և ցածկեկ աթոռակներու վրայ նստած, մտիկ կ'ընեն պատմութիւն մը, զոր վարժուհին կը պաս մէ իրենց: Պատմութեան հերոսները երկու մանուկներ են. մէկը, մաքրասէր, կարգապահ, հոգածու իր վրայի գլուխի մաքրութեան, ուրախութիւն կը պատճառէր իր ընտանիքին. միւսը, թափթփած և անմաքուր, կը վշտացնէր իր մայրը՝ որ դժգոհ էր իրմէ և միշտ կը յանդիմանէր ու կը պատժէր զայն:

Պատմութիւնը վերջացնելէ յետոյ՝ վարժուհին սկսաւ հարցումներ ուղղել աշակերտներուն: Պատասխանները այնքան յաջող չէին, թերեւս անոր համար որ այդ պատմութիւնը մասնաւոր հրապոյր մը չէր ներկայացնէր պղտիկներուն. միւս կողմէ, անհրաժեշտ է մտերմութեան շեշտ մը դնել պատմուածքին մէջ, որպէս զի այդ դասը տպաւորիչ գառնայ տղոց համար: Մտերմութեան այս մթնոլորտին մէջ է միայն

որ կրնայ յառաջ գալ ելեկտրական այն հոսանքը՝ որ համակրուծեան կապ մը պիտի ստեղծէ պատմողին և ունկնդիրներուն միջեւ։ Ասկէ վատ, դիւրի՞ն բան է միթէ շարունակ իր խօսքին ու նայուածքին հմայքին տակ պահել հարիւրի չափ չարածնի ու անհանդարտ մանուկներ...։ Լաւ է որ այս դասերը տրուին դասարաններուն մէջ, ուր ամէն մէկ վարժուհի կրնայ իր շուրջը համախմբել աշակերտները և խօսիլ անոնց։ Յետոյ զգուշանալու է ամէն ատեն այդ պատմութեանց բարոյական դիտաւորութիւններուն շուրջ դեգերելէ՝ ընդհակառակն, ջանալու է բանաստեղծութիւն, քրմայք, ծիծաղ և քիչ մըն ալ անակնկալ դնել անոնց մէջ։ Մանկապարտէզի պղտիկներուն համար պատրաստուած հրապուրիչ պատմութիւններու շատ մը գիրքեր կը գտնուին, վարժուհիները եթէ կ'ուզեն հաճոյք պատճառել իրենց աշակերտներուն, կրնան մէկը միւսէն աւելի գեղեցիկ հարիւրաւոր պատմութիւններ վերցնել անոնցմէ և այս կերպով իսկապէս հմայիչ և օգտակար դարձնել իրենց դասը։

**Իրագիտութիւն, 7—8 տարեկաններու, այսինքն «Ծաղիկ» դասարանի։**

Ուսուցումը արուեստ մըն է և բոլոր արուեստներուն նման կը պահանջէ մասնաւոր ընդունակութիւն՝ զոր պէտք է զարգացնել ու զօրացնել տեւական ուսումնասիրութիւններով։ Այս ճշմարտութեան մասին վերջնական հոմսզում գոյացնելու համար՝ բաւական է ներկայ գտնուիլ այն դասին՝ որուն «Իրագիտութիւն» անունը տուած են վարժարաններուն մէջ։

Այս դասը խիստ անտեղի ձեւով մը կ'աւանդուի առհասարակ բոլոր դպրոցներուն մէջ։ Երբեմն բառերու դաս մըն է ան — շարան մը նոր բառերու, զոր տղան խիստ դժուարութեամբ կրնայ միտքը պահել, երբեմն շփոթ տեղեկութիւններու խառնուրդ մը, որոնք խիստ հեռաւոր յարաբերութիւն մը միայն ունին իրարու հետ, հետեւաբար ոչ մէկ կերպով կրնան ճոխացնել աշակերտին ծանօթութեանց պաշարը։

Իրագիտութեան այն դասը՝ որուն ներկայ զըտնուեցայ Միլգոնեան Մանկապարտէզին մէջ, չկրցաւ դժբախտաբար փոխել տալ այն համոզումը, զոր կազմած էի արդէն վերոյիշեալ մեթոտներուն և դպրոցական ծրագրի այս գլուխին մասին։

Արդարև, ի՞նչ էր այս դասին բուն նիւթը. չպիտի կրնամ բացատրել։ Կը յիշեմ միայն թէ վարժուհին պատէն վար առաւ բուրդէ գնդակներու տրցակ մը. նախ խօսեցաւ անոնց կլոր ձեւին, անոնց գոյնին մասին, ըսաւ թէ ի՞նչ է բուրդը. վերջը անցաւ այծին, ոչխարին և առ հասարակ բոլոր չորքոտանիներուն. յետոյ խօսեցաւ պանիրին, թարմ կարագին, նախընթրիքի ատեն իրենց տրուած կարագով հացին (tartine du goûter) մասին, և որպէս անխուսափելի պարտականութիւն, դասը վերջացուց բարոյական խրատականով մը, յանձնարարելով տղոց որ երբ հացով կարագ ուտեն, չմոտանան աղքատները և իրենց չքաւոր ընկերներուն ալ բաժին հանեն անկէ։

Ատեն ատեն վարժուհին հարցումներ կ'ուզէր տղոց և պատասխաններ կը ստանար անոնցմէ։ Աւել-

լորդ է ըսել թէ լսեցի շատ մը պատասխաններ՝ որոնք այնքան գրաւիչ էին իրենց միամտութեամբը : Այսպէս , պնդողներ եղան թէ բուրդը կը բուսնի արտերուն մէջ և թէ այծերը հացով կը սնանին . . . : Եւ ի՞նչպէս կ'ուզէիք որ ասկէ աւելին գիտնային քաղաքի մէջ մեծցող այս խեղճ պղտիկները : Զարմանալու չէ բնաւ եթէ նոյնիսկ Մելգոնեանի տղոցմէն աւելի հասակաւոր աշա . Երտներ ձեզի ըսեն թէ ձմերուկը ծառերուն վրայ կը բուսնի , քանի որ իրենց կեանքին մէջ ձմերուկի արտեր տեսած չունին , բնաւ քարէ և ասնայտէ քաղաքներու այս հէգ բանտարկեալները :

Տարակոյս չկայ թէ անոնք այս կոշտ սխալները չպիտի գործէին եթէ առ ի թ ունեցած ըլլային իրենց ձեռքերով շոյելու ոչխարին կռնակը ծածկող խոպուպաւոր գեղմը , եթէ տեսած ըլլային թէ ի՞նչպէս կ'արածին անոնք դաւարագեղ մարգագետիններուն մէջ , եթէ զիտած ըլլային ամառ ատեն ցորեններու ոսկիին տակ ծփացող արտերը և զանոնք հնձող մշակին աշխատանքը , վերջապէս եթէ յաճախ միջոց տրուէր իրենց շփման մէջ մտնելու բնութեան հետ և կարգալու այն մեծ գիրքը՝ որմէ այնքան բան կրնան սովորել մանուկները՝ խաղալով ու խնդալով հանգերձ :

Ամուլ մտահոգութիւններ . . . : Բայց ինչո՞ւ ատուլ : Ո՞վ կ'արգիլէ որ յաճախ պտոյտի տարուին 6—8 տարեկան տղաքը — ոչ թէ ամբողջ դպրոցով , այն ատեն պտոյտը իր հմայքը պիտի կորսնցնէր — այլ զատ զատ դասարաններով , երբեմն առաւօտուն , Աղեքսանդրիոյ այնքան գեղեցիկ ճեմավայրերը (parc) , եր-

բեմն , յետ միջօրէին , դէպի արտերը : Աշակերտները չպիտի մոռնան բնաւ ինչ որ կը տեսնեն այդ պտոյտներու միջոցին և ինչ որ կը բացատրուի իրենց : Եւ բացօդեայ , իրերուն հետ դէմ դիմաց եղած այս դասախօսութիւնները շատ աւելի գերազանց արգիւնքներ պիտի տային , քան թէ դասարանի չորս պատերուն մէջ եղած խօսակցութիւնները :

Այո՛ , ո՞վ կ'արգիլէ այս զուարճալի և հրահանգիչ պտոյտները , որոնք խիստ հաճելի զանազանութիւն մը կրնան դնել դասերու ձանձրացուցիչ միօրինակութեան մէջ և կրնան զարգացնել աշակերտներու գիտելու կարողութիւնը . ասկէ զատ , տղայքը ամիս մը կրնան զբաղել նկարելով , զծելով կամ կաղապարելով (modeler) այն բաները , զորս տեսած են իրենց պտոյտներու միջոցին , և այս կերպով կրնան օգտագործել յետ միջօրէի իրենց պահերը , որոնց ընթացքին վարժուհին շատ անգամ կը շփոթի թէ ինչպէս կրնայ անցնել տալ տղոց այդ ժամանակը : Սովորամոլութիւն և նախաձեռնութեան պակաս . ահա այն գլխաւոր պատճառները , որոնք Մանկապարտէզի չփչոր սրահներուն մէջ բանտարկուելու կը դատապարտեն մեր աշակերտները :

Ու այս բոլորէն յետոյ , եթէ իմ տպաւորութիւնս հարցնէք Մելգոնեանի մասին , պիտի պատասխանեմ . «Անունով միայն Մանկապարտէզ է ան . իրականին մէջ մանկական դպրոց մըն է իր խիստ կարգապահութեամբը , դասերու կանոնաւորութեամբը , երկար դասապահերու միջոցին տղոց պարտադրուած անշարժութեամբն ու այդ կարգի դպրոցներուն յատուկ իր ծրագրովը» :

## ՊՕՂՈՍԵԱՆ ՎԱՐԺԱՐԱՆ

**ՊՍՏՄԱԿԱՆ.** — Պօղոսեան վարժարանը քառակուսի ընդարձակ շէնք մըն է, ամէն կողմէ ազատ մարդկային բնակութիւններէ և որուն արեւելեան ճակատը կը նայի եկեղեցիի դրան: Վարի յարկին մէկ մասը կը ծառայէ իբրև Առաջնորդարան, իսկ մնացած մասը, ինչպէս նաև ամբողջ վերի յարկը, յատկացուած են դպրոցական պէտքերուն:

Աղեքսանդրիոյ մէջ առաջին անգամ Հայ Ազգային վարժարան բացուած է 1860ին, Միտանի վրայ գըտնուած ազգապատկան շէնքի մը մէջ: Սկիզբէն աշակերտներուն թիւը երեսունը չէր անցներ և այդ օրէնքէն սկսեալ երկսեռ էր: Տնօրէն մը և օգնական ուսուցիչ մը բաւական էին Հայերէն գրել կարդալ սովորեցնելու համար տասնեակ մը ընտանիքներու զաւակներուն, որոնք կը կազմէին այդ ատեններու ամբողջ Աղեքսանդրահայ գաղութը:

Քսան տարի շարունակ այդ շէնքը ծառայեց որպէս վարժարան, ունենալով խիստ տարրական ծրագիր մը, թուաբանութիւն, հայերէն ընթերցանութիւն և գիր:

Բայց հետզհետէ աշակերտներուն թիւը զգալաբար աւելնալով, Թագևոր փաշա, համայնքին այն ատենուան նախագահը, վարժարանը Ապու-Տարտար փո-

խազրելու նախաձեռնութիւնն ունեցաւ ու 1884ին հիմնեց զայն այժմեան Մելգոնեան Մանկապարտէզին տեղը, որ մինչև այդ ատեն իբր աղօթատեղի կը ծառայէր գաղթական Հայերուն: Թագևոր փաշա միեւնոյն ատեն կը ծրագրէ Աղեքսանդրահայ գաղութը օժտել հետզհետէ իր գրաւած գիրքին արժանի եկեղեցիով մը և վարժարանով մը: Այս ուղղամիտ, խելացի ու ճարպիկ մարդը շուտով կը սկսի իր ծրագրի գործարութեան և իսկոյն դէմ գիմաց կը բարձրանան եկեղեցին ու վարժարանը այն ընդարձակ հողամասին վրայ՝ զոր Համայնքին նուիրած էր Պօղոս պէյ Եուսուֆ, և երկուքն ալ կը կրեն այս վեհանձն ու մեծահամբաւ բարերարին անունը:

Նորահաստատ վարժարանը առաջին օրէն ունեցաւ 100ի չափ աշակերտներ, որոնք շարունակեցին ստանալ բոլորովին նախնական կրթութիւն մը: Այսպէս շարունակուեցաւ մինչև 1895: Այդ թուականներուն յանկարծ կը կրկնապատկուի աշակերտներուն թիւը, երբ Թուրքիայէն փախստական հարիւրաւոր ընտանիքներ կուգան ապաստան փնտուելու Եգիպտոսի մէջ: Շփոթութեան ու անիշխանութեան այդ տարիները իրենց անխուսափելի անդրադարձումը կ'ունենան նաև վարժարանին վրայ: Ամէն տարի անդադար տնօրէններ կը յաջորդեն իրարու և դպրոցական բոլոր աշխատութիւնները կը սկսին կաղալ:

1906—1914 սահող ժամանակը շինարար աշխատանքի և վերակազմութեան շրջան մը կ'ըլլայ: Պօղոսեան վարժարանը բարձրագոյն նախակրթարան կը

գառնայ Պ. Պ. Աղասէրի և Գայաեանի տնօրէնութեան ատեն, որոնք կ'օժտեն զայն մեթատիկ ուսումնական ծրագրով մը: Իրենց օրով վարժարանը կ'ունենայ 450 աշակերտներ, ու տարիներ յետոյ այդ թիւը կը բարձրանայ մինչև 850ի: 1923ին վարժարանին ծրագիրը նոր փոփոխութիւններ կը կրէ՝ Պօղոսեանը Երկրորդական վարժարանի վերածելու համար յայտնուած փափաքներուն վրայ: Այս նոր ծրագրին գործադրութիւնը կը յանձնուի Պ. Պ. Ն. Աղբալեանի և Լեւոն Շանթի, որոնք կը ստանձնեն զպրօցին տնօրէնութիւնը և հինգ տարի կը վարեն զայն մինչև այդ ատեն Աղեքսանգրիոյ համար աննախընթացօրէն լայն և անկախ պայմաններով:

Ծնողները անոնց համբաւէն շլացած և վստահ անոնց կարողութեան վրայ, փութացին իրենց զաւակները արձանագրել տալ, այնպէս որ Պօղոսեանը 1924 տարին մինչև 750 աշակերտներ ունեցաւ 4000 Եգիպտական ոսկիի տարեկան պիւտճէով մը:

Սակայն հասարակութիւնը շուտով տեսաւ թէ վարժարանը իր վրայ դրուած յոյսերը չէր կրնար արդարացնել և սկսաւ կամաց կամաց քաշել իր զաւակները սրօշ տարիքէ մը յետոյ, այնպէս որ բարձրագոյն կարգերուն համար բաւական թուով աշակերտներ չմնացին և Պօղոսեանը Երկրորդական վարժարան դարձնելու ծրագիրը մէկ կողմ դրուեցաւ:

Այսօր Պօղոսեանը կրկին վերածուած է Բարձրագոյն նախակրթարանի՝ եօթը տարիներու վրայ բաշխուած ուսումնական ծրագրով մը:

Ահաւաստիկ այդ ծրագիրը. —

- |         |   |  |
|---------|---|--|
| Հայերէն | } | Աշխարհաբար, ընթերցանութիւն, քերականութիւն. |
|         |   | Գրաբար, ընթերցանութիւն, թարգմանութիւն.     |
|         |   | Համառօտ պատմութիւն Ազգ. մատենագրութեան     |

Կրօնի ուսում. — Հին Ուխտի և Նոր Ուխտի  
 Թուաբանութիւն  
 Գրահաւի  
 Երկրաչափութիւն  
 Ընդհ. Աւխարհագրութիւն

- |            |   |                                  |
|------------|---|----------------------------------|
| Պատմութիւն | } | Տոհմային, աւանդական և քննական    |
|            |   | Ընդհանուր, Հին, Միջին և Նոր դար. |

- |              |   |                                 |
|--------------|---|---------------------------------|
| Գիտութիւններ | } | Բուսաբանութիւն                  |
|              |   | Կենդանաբանութիւն                |
|              |   | Բնախօսութիւն                    |
|              |   | Երկրաբանութիւն                  |
|              |   | Տարրաբանութիւն<br>Բնագիտութիւն. |

Առօրինակ սնտուրիւն  
 Ձեռնական աւխասութիւններ

- |               |   |             |
|---------------|---|-------------|
| Գեղարուեստներ | } | Գծագրութիւն |
|               |   | Նկարչութիւն |

Լեզուներ

- Փրանսերէն
- Անգլերէն
- Արաբերէն

Մարմնամարզ

Ինչպէս կը տեսնուի, ծրագիրը խիստ կատարեալ է և գրեթէ տարբերութիւն չունի երկրորդական վարժարանի մը ծրագրէն, բացի ուսողական գիտութիւններէն, որոնց քիչ տեղ տրուած է :

Բայց տրամաբանական է հարցնել թէ այս գեղեցիկ ծրագիրը կը գործադրուի՞ արդեօք, և եթէ կը գործադրուի, ձեռք բերուած արդիւնքը կրնայ գոհացուցիչ նկատուիլ :

Պատասխանելով Պողոսեան վարժարանի Պատ. Հոգաբարձութեան հրաւերին՝ ներկայ գտնուեցայ 1929—30 տարեշրջանի ամառվերջի քննութեանց : Այնուհետև ութ անգամ վարժարան այցելելով՝ ունկնդրեցի ամէն մէկ դասարանի մէջ աւանդուած դասերը : Ուշադրութեամբ քննեցի դասագրքերը, ծանօթացայ աշակերտներուն ու իրենց ուսուցիչներուն հետ : Գաղափարներու երկար բարակ փոխանակութիւն ունեցայ Տնօրէն Պ. Պիոնեանի և ուսուցիչներէն մեծ մասին հետ : Այս բոլորը իրաւունք կուտան ինձի, ինչպէս կը կարծեմ, իմ դիտողութիւններս յայտնելու վարժարանին մասին, դիտողութիւններ, որոնք քիչ թէ շատ իրենց կշիռն ունենալու են, վասն զի զանոնք բանաձեւելու համար չգոհացայ միմիայն դասարաններն այցելելով ու հարեւանցի ակնարկ մը պտըտցնելով անոնց վրայ :

ձեպընթաց շոգեկառքի այն ճամբորդին պէս, որ փախչող դաշտանկարները կը դիտէ վահոնին պատուհանէն, այլ ջանացի նմանիլ այն մանրակրկիտ քուռիսքին, որ երկրի մը մասին իր վերջին խօսքն ըսելէ առաջ, ոտքի տակ կ'առնէ անոր ամէն կողմերը և խնամքով կ'ուսումնասիրէ անոր բոլոր առանձնայատկութիւնները :

Ահաւասիկ ուրեմն խղճամիտ և անկողմնակալ դիտողի մը կարծիքը այս հարցին մասին :

— Այո՛, ծրագիրը գործադրուած է :

— Իսկ արդի՞ւնքը :

— Արդիւնքը խիստ միջակ է : — Պատճառ : — Պատճառները շատ են : Անոնցմէ մէկը նոր է, ըսել կ'ուզեմ ծանրաբեռնուած հանգամանքը . միւսները հին են և կը վերանան մինչև մեր վարժարաններուն հիմնարկութեան առաջին օրերը . բոլոր Հայ դպրոցները կը տառապին անոնցմէ : Կրնանք դասաւորել զանոնք հետեւեւալ կերպով .

- Ա. — Ծանրաբեռնուած ծրագիր :
- Բ. — Դպրոցական յասագրքերու չգոյութիւն :
- Գ. — Ուսուցչական կազմի անբաւականութիւն :



Ա.

Ծ Ր Ա Գ Ի Ր Ը

Վարժարանին ծրագիրը խիստ ծանրաբեռնուած է ու շատ վեր կը մնայ նախակրթարանի մը տարրողութենէն :

Արդարեւ , կը կարծէ՞ք թէ 8—16 տարեկան տղու մը իմացականութիւնը անյատակ անդունդ մըն է , որուն մէջ կրնաք լեցնել գիտութեան բոլոր գանձերը մեր ուզած ձեւով : Ուղեղը գործարան մըն է ու անոր գործառնութիւնը ենթակայ է այնպիսի օրէնքներու՝ որոնք ճկիլ չեն գիտեր . կարելի չէ անպատիժ կերպով մեղանչել անոնց դէմ :

Դաշտերու մշակին և գործարաններու բանուորին աշխատանքը որոշ կանոններու տակ առնուած է : Բոլոր գործատէրերը երկար փորձառութենէ մը յետոյ , հասկցած են թէ երբ աշխատութիւնը որոշ սահմանէ մը անդին կ'անցնի , միջակէն աւելի վար արդիւնք մը միայն կրնայ տալ ու Ֆիզիքական վտանգաւոր սպառում մը կը պատճառէ մարդոց : Բայց մէկը մըտքէն չէ անցուցած վարժարաններուն մէջ որոշ օրէնքներ մշակել մտաւորական աշխատութիւններուն սահման մը գծելու համար :

Չենք վարանիր օրական 10 , նոյնիսկ 12 ժամուան տեւական աշխատութիւն մը պահանջելու մեր տղոցմէն , վասն զի մի՛ մոռնաք թէ դպրոցական պահերը վերջանալէն յետոյ , անոնք ստիպուած են իրենց

աշխատութիւնները շարունակել նաև տան մէջ , դըպրոցական պարտականութիւններ պատրաստելու համար , ինչ որ աւելի յոգնեցուցիչ է քան դասապահերուն աշխատանքը , և այս՝ իրենց Ֆիզիքական զարգացման ամէնէն տագնապալի մէկ շրջանին : Ուսուցման այս դրութիւնը անտրամաբանական և հակաուղղապահական է : Միւս կողմէ , մտաւորական այս թրջմունքը (gavage) խիստ ուղորմելի արդիւնքներ միայն կրնայ տալ և յաճախ պատճառ կը դառնայ որ աշակերտը վհատի և 12 տարեկանին հեռանայ վարժարանէն , առանց պէտք եղածին պէս սովրած ըլլալու գոնէ իր մայրենի լեզուին և թուաբանութեան նախնական տարրերը . ուրիշներ , աւելի նպաստաւոր յարմարութիւններով օժտուած , կը փորձեն յարատեւել , բայց մտքի յոգնութենէն սպառած ու զզուած , այնպէս որ դրքերու տեսքը բաւական է տեսակ մը նոզկանք պտտճառելու իրենց ու երբ դուրս կուգան վարժարանէն , ինքնաշխատութեան ճաշակը արդէն մեռած է իրենց մէջ :

Աւելորդ է ըսել թէ այս զզուանքը , լուրջ և հրահանգիչ գրքերու նկատմամբ ցոյց տրուած այս անտարբերութիւնը , շատ աւելի փնասակար են իրենց մտաւորական զարգացման համար , քան թէ իրենց տգիտութիւնը դպրոցական ծրագրի այս կամ այն նիւթին մէջ :

Եւ ի՞նչ բանի կը ծառայեն այնքան ծանրաբեռնուած այս ծրագիրները : Կը թուի թէ անոնց հեղինակները զարմանալիօրէն կ'անգիտանան թէ վարժա-

րանին նպատակը չէ աշակերտներուն միտքը խճողել բոլոր գիտութիւններուն մասին տարտամ ու տարրական ծանօթութիւններով, ծանօթութիւններ, որոնք խիստ մակերեւութային են ու, աւագուտ հողերու մէջէն վազող ջուրերու նման, պիտի կորսուին առանց հեռք մը ձգելու իրենց ետև: Դպրոցին իսկական նըպատակն է զարգացնել աշակերտին մէջ տեսնելու, գիտելու, խորհրդածելու ընդունակութիւնները: ԱՆՈՐ ԳԼԽԱՒՈՐ ՄՏԱՀՈԳՈՒԹԻՒՆԸ ՊԻՏԻ ԸԼԼԱՅ ՄԱՆԱՒԱՆԴ ՄՏԱՒՈՐԱԿԱՆ ԶԲԱՂՈՒՄՆԵՐՈՒ ՃՍՇԱԿԸ ՆԵՐՇՆՁԵԼ ՏՂՈՑ, ՈՐՊԷՍ ԶԻ ԱՆՈՆՔ ԻՐԵՆՑ ԲՈՎԱՆԴԱԿ ԿԵԱՆՔԻՆ ՄԷՋ ՇԱՐՈՒՆԱԿԵՆ ԻՐԵՆՑ ԲԱՆԱԿԱՆՈՒԹԻՒՆԸ ՄՇԱԿԵԼ ԵՒ ԻՄԱՑԱԿԱՆՈՒԹԻՒՆԸ ՃՈՒՍՏՆԵԼ: Կրթական ու է գրութիւն, որ չի ձգտիր այս նպատակին, փաստակար է և անվարան կրնանք պնդել թէ կը մեղանչէ իր կոչման դէմ:

Գիտեմ այս մասին ըլլալիք առարկութիւնները. Ա. պիտի ըսուի թէ Բարձրագոյն Նախակրթարան մը պարտաւոր է մտքի բաւարար զարգացում մը տալ իր աշակերտներուն, որպէս զի անոնք ի վիճակի ըլլան վերջէն երկրորդական վարժարան մը ընդունուելու և կարելի եղածին չափ քիչ ժամանակէն — առ առաւելն 2—3 տարիէն — իրենց երկրորդական կրթութիւնը վերջացնելու: Բ. թէ օտար երկիրներու մէջ ապրող Հայը ստիպուած է մէկէ աւելի լեզուներ սովորիլ, գոյութեան պայքարին մէջ յաջողելու համար:

Մեր կարծիքով, սխալ է Նախակրթարանը նկատել հիֆնարկութիւն մը, որ պարտաւոր է աշակերտ-

ներ պատրաստել երկրորդական վարժարաններու համար: Նախակրթարան մը ինքն իրեն համար առանձին «ամբողջութիւն» մ'ըլլալու է, ունենալով իր սեփական անհատականութիւնն ու մասնաւոր դրոշմը:

Նա պարտաւոր է տալ բաւական լայն, բայց նաև սահմանափակ կրթութիւն մը, սահմանափակ անոր համար որ իր աշակերտներէն 90%ը ձեռական արհեստներու կը պատրաստուին, իսկ աշակերտուհիներէն ոչ մէկը ու է ասպարէզի նուիրուելու հաւանականութիւնը կը ներկայացնէ:

Կը մնայ խիստ անշան թիւ մը բախտէն նպաստաւորուած աշակերտներու, որոնք իրենց ուսումը շարունակելու հնարաւորութիւնը պիտի ունենան: Ասոնք ալ կրնան ձգել Պօղոսեան վարժարանը իրենց նախակրթութեան վերջընթեր տարին, այսինքն մօտաւորապէս 14 կամ 15 տարեկան հասակին, և մտնել օտար վարժարաններու ուսողութեանց առաջին դասարանը: Այդէն այս վերջինները շատ չնչին թիւ մը կը ներկայացնեն, այնպէս որ կարելի չէ նկատողութեան առնել զանոնք, ծրագրին ծանրաբեռնումը արդարացընելու համար:

Գալով երկրորդ, այսինքն օտար լեզուներու մասին եղած առարկութեան, մեզի կը թուի թէ ծանր սխալ մը կը գործենք, երեք օտար լեզուներ պարտադրելով 12 տարեկան մանուկներու:

Տղու մը համար առաջին և կարեւորագոյն ուսումը իր մայրենի լեզուին իւրացումն է: Մայրենի

լեզուին միջոցաւ միայն կրնանք ձեռք բերել այն ամէնը, զոր մեր զգայարանները չեն կրնար տալ մեզի մեր մանկութիւնը գաղափարներով այնքան աւելի ճոխ, այնքան աւելի բազմակողմանի կ'ըլլայ, որքան աւելի կանուխէն և աւելի հիմնովին կը տիրանանք մեր մայրենի լեզուին: Հետեւաբար աններելի մեղք մըն է տկարացնել մայրենի լեզուին դժուարին բայց օգտակար ուսուցումը՝ մոլորեցնելով մեր աշակերտները օտար բառերու, օտար դարձուածքներու, օտար շեշտերու բաւիղին մէջ և ստիպելով որ ապարդիւն կերպով վատնեն իրենց թանկագին պահերը, զորս պիտի կրնային աւելի օգտակարապէս գործածել:

Ի հարկէ միամտութիւն պիտի ըլլար պնդել որ մեր տղայքը գոհանան միմիայն իրենց մայրենի լեզուն սորվելով: Օտար լեզուներու ուսուցումը բացարձակ անհրաժեշտութիւն մըն է մանաւանդ մեզի, Հայերու համար: Հայ մը որ իր մայրենի լեզուէն զատ ուրիշ լեզու չի գիտեր, զուրկ է գոյութեան կուռին մէջ յաջողելու գլխաւոր միջոցներէն և անհրաժեշտ զէնքերը չունի պայքարելու համար իրմէ աւելի լաւ զինուած մրցակիցներու դէմ:

Վերջապէս Հայն ալ, Արեւելքի միւս ժողովուրդներուն նման, չի կրնար ըլլալ առանց Եւրոպական լեզուներու: Արեւելքը, պատմութեան որոշ մէկ շրջանին, աշխարհիս ջահակիրը եղաւ: Բայց այդ ժամանակներն անցած են այլեւս: Դարերէ ի վեր նա իր միտքը կը սնուցանէ Արեւմուտքէն եկող գաղափարներով միայն: Անկէ է որ կուզան նախաձեռնութիւնն

ու ստեղծագործութիւնը: Ուստի, եթէ կ'ուզէ ճոխացնել իր միտքը և հետեւիլ գաղափարներու, արուեստներու և գրականութեանց բնաշրջութեան, անհրաժեշտօրէն պարտաւոր է հետեւիլ Արեւմտեան քաղաքակրթութեան և ամէնէն առաջ սովորիլ անոնց լեզուն:

Բայց այս տեսութիւնը դատապարտութիւնն իսկ է Պօղոսեանի մէջ որդեգրուած սխիթէմին: Արդարև այնտեղ միաժամանակ կերպով կ'աւանդուին Արաբերէն, Ֆրանսերէն և Անգլերէն լեզուները: Սակայն աշակերտը, եթէ տարի շարունակ զանոնք դաս առնելէ յետոյ, երբ դուրս կուգայ վարժարանէն, Աղեքսանդրիոյ փողոցներուն շրջուն վաճառականին չափ անգամ բան չի ստանար այդ լեզուներէն:

Ի՞նչ բանի կը ծառայէ ուրեմն օտար լեզուներու այս ուսուցումը, երբ չի կրնար նպաստել աշակերտներու մտաւորական զարգացման, — որովհետև օտար մշակոյթ մը իւրացնելու և անկէ օգտուելու համար՝ պէտք է կատարելապէս տիրացած ըլլալ անոր լեզուին —, ու ոչ ալ կրնայ օգտակար ըլլալ անոնց կեանքի առօրեայ պէտքերուն: Ու անգաղար տըրտունջ կը յայտնենք այս ապերախտ աշխատութեան լծուած մեր աշակերտներէն. այո՛, ապերախտ, որովհետև իբրև անօգուտ ժամավաճառութիւն, խիստ մօտէն կը յիշեցնէ Դանայեաններու առասպելը, որոնք Տարտարոսին մէջ դատապարտուած էին ջուրով լեցընելու կարաս մը, որ յատակ չունէր ու վերէն լեցուած ջուրը վարէն կը պարպէր շարունակ:

Կարելի եղածին չափ լաւ սովրեցնել իր մայրենի լեզուն, Հայերէնը, կատարելապէս սովրեցնել միակ օտար լեզու մը. Բարձրագոյն Նախակրթարանի մը համար ներելի չէ ասկէ զատ տարբեր յաւակնութիւններ սնուցանել:

Բայց միայն օտար լեզուները չեն որ կը խճողեն մեր դպրոցական ծրագիրը: Իրաւունք չունի՞նք հարցընելու թէ մեր վարժարաններուն մէջ ի՞նչ բանի կրնայ ծառայել Գրաբարի դաստանդութիւնը: Հին Հայերէնի ուսուցումը բացարձակապէս անհրաժեշտ է արդեօք մեր աղջիկներուն, որոնք 15-16 տա, տեկանին դպրոցէն ելլելէն յետոյ, ոչ առիթ պիտի ունենան, ոչ ալ փափաք, աւա՞ղ, իրենց բնագրին մէջ կարգաւու եղնիկը, եղիչէն կամ Շնորհալին: Եւ կամ կոչկալարը, գերձակը, փորագրիչը կամ մեքենավարը — որովհետեւ մոռնալու չէ թէ մեր տղոցմէն մեծագոյն մասը այս ասպարէզներուն կուտան ինքզինքնին գըպրոցէն յետոյ — իսկապէս պէտք ունի՞ն Գրաբարի՝ իրենց արհեստը սորվելու համար:

Ասկէ զատ Նախակրթարանի մը ծրագրին մէջ ի՞նչ գործ կրնան ունենալ Երկրաբանութիւնը, Հայոց Քննական Պատմութիւնը, Տոմարակալութիւնը, Առտընին Տնտեսութիւնը, և շն. և շն.: Միթէ անտեղի չե՞ն այս բոլորը: Պէտք է վերջապէս համակերպիլ սա անհրաժեշտութեան թէ մարդ մը, մանաւանդ տղայ մը, չեն կրնար ամեն բան գիտնալ, ոչ ալ ամեն բան սովորիլ:

Մարդկային ծանօթութիւններն այնքան ընդար-

ձակուած և անոնց իւրաքանչիւր ճիւղն այնքան զարգացած է, որ ամէն մէկ գիտութիւն մինակը բաւական է կլանելու համար մարդկային ուղեղի մը հասկացողութեան ամբողջ ոյժն ու տարողութիւնը: Հետեւաբար անօգուտ բան է կատարեալ գիտութիւնը ձեռք բերելու ցնորքը հետապնդել: Պէտք է խոհական ընտրութիւն մը կատարել և որոշ սահմանէ մը անդին չանցնիլ: Այս անհրաժեշտութիւնը չեն կրցած ըմբռնել անոնք որ Պօղոսեանի ուսման ծրագիրը պատրաստած են: Անոր հեղինակները ուզած են շատ գործ տեսնել մէկ անգամէն և այդ իսկ պատճառաւ վրիպած են իրենց նպատակին մէջ: Աշակերտները շատ դասեր կ'առնեն հօն, բայց քիչ բան միայն կը սորվին, և մանաւանդ քիչ բան միայն կրնան իւրացընել:

Բ.

### Դ Ա Ս Ա Գ Ր Ք Ե Ր Ը

Մեր մէջ չկան և կամ շատ քիչ կը գտնուին ասպարէզին համար պատրաստուած դաստիարակներ, որոնք իրենց հմտութեամբն ու փորձառութեամբը կարենան դարմանել դպրոցական նպատակայարմար դասագրքերու պակասը. և ասպարէզին անտեղեակ ուսուցիչներն առաջնորդելու համար՝ ստիպուած ենք անոնց տրամադրութեան տակ դնել այնպիսի գրքեր՝ որոնց մէջ երկարաբանութիւնն ու նիւթերու խառնիճաղանճ շփոթութիւնը կը մրցին իրարու հետ: Չենք կրնար մեր զարմանքը զսպել երբ կը խորհինք թէ աշակերտին ձեռքը տրուած գրքերուն մէջ ո՛րքան անտեսուած է դպրոցական տղու մը մտքին տարողութեան չափը, թէ անոնց հեղինակները ո՛րպիսի անփութութեամբ կը վերաբերուին ժամանակի դաղափարին հետ և ո՛րքան արհամարհանք ցոյց տուած են աշակերտներուն մօտ սովրելու և իւրացնելու օրէնքներուն: Մեր դպրոցականներուն ձեռքը գրքեր կան, որոնք թէև Ադամի ու Եւայի ժամանակակից չեն, բայց նախապատմութիւն կը բուրեն...: Մանկավարժական գիտութիւնները յառաջգիմութեան մեծ քայլեր առած, ուսուցման մեթոտները բարեշրջուած և դպրոցական գրականութիւնը վերէն վար փոխուած է, բայց մեր մէջ ամէն բան անփոփոխ կը մնայ գեռ, ու Ֆեթիշիզմի հասնող տեսակ մը պատկառանք կը տա-

ծենք տակաւին կարգ մը գրքոյկներու նկատմամբ, որոնց անխմաստ բովանդակութիւնը պարզապէս կ'ըմբոստացնէ մարդս: Պօղոսեանի մէջ տեսայ 1860ին տպուած ֆրանսերէն այբբենարաններ և ֆրանսերէնի ընթերցանութեան գրքեր, որոնք գաւաթ մը գաղջ ջուրի պէս անհամ և ջղայնացնելու չափ ձանձրացուցիչ էին:

Աշխարհագրութեան գրքեր տեսայ հոն, առանց աշխարհագրական քարտէսի, և անհաւատալի թող չթուի, եթէ ըսեմ թէ Աղեքսանդրիոյ Ազգ. վարժարանին մէջ պատի քարտէսներ չկան...:

Հանգիպեցայ Հայոց Պատմութեան գրքերու՝ որոնց մէջ ո՛չ ո և է ժամանակագրութիւն կայ, ո՛չ ալ ընդհանուր ժամանակագրական տախտակ, որպէս զի միտքը կարենայ կառչիլ ո և է իրողութեան և տեղաւորել զայն իր ժամանակին և ժամանակակիցներուն շարքին մէջ. և ընթերցողը թող չկարծէ թէ կը չափազանցեմ, երբ ըսեմ թէ անոնց մէջ աչքիս զարկին հէքեաթային պատմութիւններ յիշեցնող սա տեսակ խօսքեր. «Այն ատենները Պարսից թագաւոր մը կար...»:

Ընդհակառակն, վերի դասարաններուն մէջ ալ տեսայ Հայոց Պատմութեան գրքեր, որոնք թէև խընամով պատրաստուած, բայց ամբողջ՝ 600 էջեր կը լեցնեն, և աշակերտները Յ ամսուան մէջ հազիւ թէ կրնան անոնց առաջին քանի մը գլուխներուն վրայէն անցնիլ. վասն զի անոնց բովանդակութիւնը չափէն աւելի խճողուած է անտեղի մանրամասնութիւններով:

Տեսայ ընդհանուր Պատմութեան 3—400 էջնոց խոշոր հատորներ՝ լեցուն շահեկան մանրամասնութիւններով: Բայց 1930ի ամառվերջի քննութեանց ատեն՝ աշակերտները հազիւ կրցած էին հասնիլ մինչև ԺԶ. դարը. անոնք շատ լաւ գիտէին Պրանսուա Ա.ի և Կարոլոս Ե.ի մղած պատերազմներուն թիւը, բայց չէին գիտեր — և ապահովաբար իրենց ամբողջ կեանքին մէջ չպիտի գիտնային — թէ Պրանսա ունեցած է ուրիշ թագաւորներ, Մեծ Յեղափոխութիւնը, վերջէն ալ Հանրապետութիւն մը, թէ ուրիշ պետութիւններ ալ ծնունդ առին Եւրոպայի մէջ, թէ Ամերիկա, որուն գիւտին պատմութիւնը սովորած էին Քրիստափոր Գոլումպոսի կողմէ, կոյս անտառները մշակելի հողերու վերածած էր, թէ ան կազմուած էր բազմաթիւ պետութիւններէ, որոնցմէ քանի մը հատը ահաւոր ոյժ մը կը ներկայացնեն այսօր:

Վերջապէս, այդ դասարաններուն մէջ աչքիս զարկին այնպիսի գրքեր, որոնք տարիներու ընթացքին, եկող զացող աշակերտներու ձեռքէն անցած ըլլալով, այնքան պատուտած և աղտոտած, այնպիսի ողորմելի վիճակի մը հասած էին որ պարզապէս արատ մըն էին վարժարանին համար:

Բայց ամէնէն աւելի զարմացայ՝ երբ նկատեցի որ գիտական խիստ կարեւոր առարկաներ, օր. բնագիտութիւն, տարրաբանութիւն, բուսաբանութիւն, կենդանաբանութիւն, բնախօսութիւն ևլն, կ'աւանդուին առանց դասադրքի...: Ուսուցիչը կը թելադրէ դասը, շաակերտները կը գրեն և յետոյ գոց կը սորվին: Ո՛չ

բացատրական պատկերներ, ո՛չ գիտական փորձեր: Պողոսեանը գիտական աշխատանոց չունի, ոչ ալ գործիքներ: Հետեւաբար աշակերտները դասը կը սովորին այնպէս ինչպէս որ կրնան, բան մը բնագիտութենէն, ուրիշ բան մը տարրաբանութենէն: Բայց առանց մեթոտի աւանդուած այս դասերը իրարմէ անջատ, անկապակից պատկերներ կը ձեւացնեն մանուկներու յիշողութեան մէջ և զայն կը վերածեն քառսի մը, որուն մէջ, հոս ու հոն կը լողայ երբեմն շփոթ պատկեր մը...:

Եւ ի՞նչ անուն տալ այն գրքերուն, որոնց վրայէն իրագիտութիւն կը սորվին աշակերտները, այսինքն ամէնէն աւելի կենդանի ու հետաքրքրական դասը, որ առաջին անգամ պիտի սովորեցնէր տղոց տեսնել արտաքին աշխարհը, գիտել զայն և խորհրդրածելու վարժուիլ: Գրքեր չեն անոնք, այլ պարզապէս նոր և անձանօթ բառերու ցանկ մը, և կամ ձանձրոյթի և յոգնութեան մահաբոյր գրքեր, որոնք ու է կերպով չեն կրնար տալ իրենցմէ սպասուած արդիւնքը:

Վերջացնելէ առաջ ըսեմ թէ ճաշակի, մեթոտի, ողջմտութեան նոյն բացակայութիւնը նաև մայրենի լեզուի ընթերցանութեան գրքերուն մէջ: Այդ խոշոր հատորներուն մէջ, հեղինակներն ուզած են անխտիր տեղ մը յատկացնել ամէն անոնց, որոնք գրիչ շարժած են բան մը արտագրելու համար: Հոն տասներորդ կարգի գրողներն այնքան լայն փռած են իրենց օտքերը որ գրեթէ տեղ չէ մնացած իսկական գրա-

գէտներուն համար: Աւելցնենք նաև թէ աշակերտը առհասարակ դուրս կուգայ վարժարանէն՝ դեռ ժամանակակից հեղինակներուն չհասած, ճամբու ընթացքին շատ յապաղած ըլլալուն համար:

Յոռի ծրագիր, աննպատակյարմար գրքեր, այո՞ բոլորին վրայ աւելցուցէք՝ անբաւարար ուսուցչական կազմ — ընդհանուր առմամբ — ու այն ատեն կրնաք հասկնալ թէ ինչո՞ւ Պօղոսեան վարժարանը այնքան միջակ արդիւնքներ միայն կրնայ տալ:

Պ.

### ՈՒՍՈՒՅԶԱԿԱՆ ՄԱՐՄԻՆ

Եթէ Պօղոսեան վարժարանը ցարդ չէ կրցած գոհացուցիչ արդիւնքներ տալ, ասոր գլխաւոր պատճառներէն մէկն ալ այն է որ իր ուսուցչական մարմինը առհասարակ միջակ տարրերէ բաղկացած է, վասն զի կարելի չէ ուրանալ թէ դպրոցի մը բարոյական և մտաւորական մակարդակը ուղղակի կախում ունի իր ուսուցչական կազմէն:

Այո՞, յաջող ընտրութիւն մը չէ կատարուած անոր ուսուցչական մարմինն մէջ: Բայց անհրաժեշտ է նախ լուսաբանել այս կէտը: Ասպարէզին համար պատրաստուած ուսուցիչներ ունի՞նք արդեօք և ո՞րպիսի թիւ մը կը կազմեն անոնք, որպէս զի կարելի ըլլայ յաջող ընտրութիւն մը կատարել իրենցմէ: Պատասխանը ժխտական է, աւա՛ղ, և այդ կարգի ուսուցիչներու պակասը ամէնէն աւելի խորունկ վէրքը եղած է մեր կրթական գործին. ցաւ մը, որ շատ հին է և ծնած մեր առաջին վարժարաններուն հետ, այնպէս՝ ինչպէս, օրինակ, նորածին մանուկ մը իրեն հետ աշխարհ կը բերէ բնական թերութիւն մը: Ու չարիքը փոխանակ մեղմանալու տարիներու ընթացքին, ընդհակառակն երթալով աւելի ծաւալած և աւելի խորացած է, որքան դպրոցներու թիւը բազմապատկուած է մեր մէջ:

Սկիզբի օրերուն ճակատագրական էր ան, ան-

խուսափելի հետեւանքը տիրող պայմաններուն : Արգարե , երբ մեր առաջին վարժարանները կը բացուէին 1860 ական թուականներուն , ամէն ինչ պէտք էր ստեղծել ի նորոյ : Այդ օրերու մեր արգարեին կեանքին վարիչները , վերածնութեան իրենց բուռն թափին մէջ , նախ և առաջ ջանացին գոհացնել ամէնէն աւելի ստիպողական պէտքը . դպրոցներ բացին ու զանոնք վարելու համար պաշտօնի կանչեցին ամէն անոնք , որոնք գրիչ մը բռնել գիտէին և քիչ մըն ալ հաշուել : Խոհեմութիւնն ու նախատեսութիւնը կը պահանջէին որ անոնք , հանրային կարծիքի այս ընդհանուր հոսանքէն օգտուելով , աշխատէին նպատակայարմար և արդիւնաբեր ուղղութիւն մը տալ անոր . անոնք պարտաւոր էին կազմակերպել դպրոցական գործը մեթոտիկ կերպով և որոշ դրութեան մը վրայ հիմնուած : Պոլսոյ Պատրիարքարանը շքեղ , իր տարողութեամբը խիստ լայնածաւալ և չափազանց կենսական գործ մը ունէր կատարելիք : Միւս կողմէ , հեռատեսութեան , կազմակերպութեան և հետեւողականութեան իր կարողութեան ասպարոյցը տալու սքանչելի աւելի մըն էր այս . . . : Դժբախտաբար , սակայն , հակառակը պատահեցաւ , կրթական գործը յանձնուեցաւ զիպուածի քմահաճոյքին և զարգացաւ պատահական ուղղութիւններով , առանց զեկավարող սկզբունքի , առանց ընդհանուր ծրագրի :

Պոլսոյ և գաւառներու մէջ վարժարանները բացուեցան իրարու ետեւէ՝ սուսկի նման , ու ոչ ոք մըտքէն անցուց միօրինակ ծրագիր ու մեթոտ մտցնել

անոնց մէջ , ոչ ոք խորհեցաւ լաւ դասագրքերով օժտել զանոնք , ոչ ոք աշխատեցաւ մանաւանդ ուսուցիչներու պակասը դարմանել հմուտ և փորձառու կրթական մշակներ հասցնելով : Անոնց առաջին գործը պիտի ըլլար պատրաստել ուսուցչական մարմինը : Ընդհակառակն , ամենէն աւելի այս կենսական հարցն էր որ անտեսուեցաւ :

Ու դեռ մինչեւ այսօր կրթական գործը կը տառապի մեր մէջ կազմակերպութեան ու ընդհանուր ուղղութեան միեւնոյն պակասէն և մեր վարժարանները հեռու են գոհացուցիչ վիճակ մը ներկայացնելէ : Ուսուցիչները կ'ընտրուին ըստ բախտի , ամէն ասպարէզի վերաբերող մարդոցմէ , որոնք իրենց առաջին վարժութիւնները կը կատարեն նոյն ինքն դպրոցին մէջ . . . Գոնէ առաջնորդող մը , զեկավարող մը ունենային . . . Գիտենք թէ որքան տկար է տնօրէններուն ազդեցութիւնը անոնց վրայ :


Կուզէ՞ք գաղափար մը ունենալ այս չարիքին համեմատութիւններուն մասին և մատերնիդ դնել բուն վերքին վրայ , եթէ կարելի է այսպէս ըսել : Խորհեցէք որ 600,000 հոգինոց Հայութիւն մը ցրուած կ'ապրի Հայաստանի սահմաններէն դուրս : Այս թիւէն զեղչեցէք երկու Ամերիկաներուն , Պալքանեան երկիրներու և Եւրոպայի մեր գաղթականները , որոնց զաւակները ստիպուած են տեղական վարժարաններն յաճախել , կը մնան Արեւելեան երկիրներու մէջ ապրող Հայերը , որոնց կրթութիւնը կախուած է մեզմէ .

Թուրքիա	100,000
Սիւրիա	100,000
Պարսկաստան	55,000
Եգիպտոս	20,000
Յունաստան	30,000
Կիպրոս	4,000
Իրաք	6,000
Պաղիստին	3,000

Ընդամենը 318,000

Ընդունելով որ այս գումարին 1/10ը դպրոցական տարիք ունեցող մանուկներ են — ինչ որ միջինէն աւելի պակաս թիւ մը կը ներկայացնէ — կլոր հաշուով 30,000 դպրոցականներու գումար մը կ'ունենանք :

Արգ, հարիւրէ աւելի դպրոցներու մէջ բաշխուած այս 30,000 աշակերտներուն համար, որոնք մօտաւորապէս երկու սեռէ 1000 ուսուցիչներու պէտք ունին, դժուար թէ կարելի ըլլայ գտնել է՛քոյ Նորմալէ մը վկայուած 50, կամ գոնէ երկրորդական կրթութիւն ստացող 200 ուսուցիչներ : Վերի թիւերը խիստ պերճախօս են և պէտք չունին մեկնութեան : Անոնք բաւական են խիստ յստակութեամբ ցոյց տալու համար չարիքին մեծութիւնը և այն խորունկ պատճառները՝ որոնց երեսէն կրթական գործը առհասարակ կը կաղայ մեր մէջ :



Բ.

### Գ Ա Լ ՈՒ Ս Տ Ե Ա Ն Վ Ա Ր Ժ Ա Ր Ա Ն

ՊԱՏՄԱԿԱՆ. — 1850ական թուականներէն առաջ Հայերը Գահիրէի մէջ ունէին Ազգ. վարժարան մը, կառուցուած ըստ հին սովորութեան, եկեղեցիին հովանիին տակ, Առաջնորդարանի շրջափակին մէջ : Այդ վարժարանը նուիրուած էր հռչակաւոր Եղիազար Ամիրալի յիշատակին և անոր անունը կը կրէր, բայց չէր կրնար լիուրի գոհ սցնել հայկական գաղութին պէտքերը, որ երթալով կ'աւելնար և առաջնակարգ կարեւորութիւն կը ստանար :

Կարապետ Ազա Գալուստ մտածեց արդիական ձեւով վարժարան մը պարգեւել Գահիրէի Հայոց, և Գաբրիէլ Եպիսկոպոսին հետ համախորհուրդ, որ իր բարեկամն ու թելադրիչը եղած էր, Տարպէլ-Կէնինայի մէջ, 1854ին իր ծախքով բարձրացնել տուաւ վարժարան մը, զոր կոչեց Խորհեան, ի յիշատակ մեր մեծ պատմահօր, Մովսէս Խորհեանցիի : Այդ նոր շէնքը կը բարձրանար եկեղեցիէն ոչ այնքան հեռու, Կէնինայի թաղամասին մէջ, որ մայրաքաղաքին ամենէն փարթամ թաղամասն էր այն օրերուն :

Մեծանուն բարերարը սակայն այսքանով չգոհացաւ և իր գործը ամուր հիմերու վրայ գնելու նպատակով իսկապէս իշխանավայել առատածեռնութեամբ, 1858 թուին դպրոցին կտակեց 460 Ֆէտ-

տան տարածութեամբ մշակելի հողեր, 340 ֆէտտան-  
նոց արմաւենիներու ծառաստան մը, և ուրիշ հասու-  
թարեր կալուածներ: Աւելորդ է ըսել թէ այս կերպով  
նիւթական ո՛րպիսի բարգաւաճ վիճակ մը կը ստեղծ-  
ուէր նորակառոյց վարժարանին համար:

Սակայն Մուհամմէտ Ալիի փառապանծ հարստու-  
թեան պատկանող իշխաններու մականին տակ և  
Անգլիական գրաւումէն ի վեր Նեղոսի հովտին մէջ  
տիրող ապահովութեան շնորհիւ, Եգիպտոսի մայրա-  
քաղաքը կը զարգանար աննախընթաց արագութեամբ  
ու կերպարանափոխ կ'ըլլար՝ կարծես մոգական գա-  
ւազանի մը աղբեցութեան տակ: Քաղաքին կեդրոնը  
կը տեղափոխուէր անգաղար, հեռանալով միջնաբեր-  
դէն և փռուելով Նեղոսի ափերուն վրայ: Տարպէլ-  
կէնինա, երկար ատեն Եւրոպական հիւպատոսներու  
բնակատեղին ըլլալէ յետոյ, կամաց կամաց չքաւոր  
դասակարգերու ապաստանարանի մը կը փոխուէր և  
իր կարեւորութիւնը կորսնցնելով, օրուան իշխանու-  
թիւններուն կողմէ այնքան երեսի վրայ կը ձգուէր որ  
վերջ ի վերջոյ անբնակելի կը դառնար:

Միւս կողմէ մայրաքաղաքի Հայերուն թիւը յան-  
կարծ կը բազմապատկուէր 1895ի ջարդերէն ազատ-  
ուող փախստականներուն ժամանումով և Սորէնեան  
վարժարանը խիստ նեղ կուգար ամէն կողմէ արձա-  
նագրուելու գիմով աշակերտներու բազմութեան:

Այն ատեն է որ ուրիշ մեծ Հայ մը, Պօղոս փաշա  
Նուպար, որուն անունը երախտագիտութիւն և պատ-  
կառանք միայն կը ներշնչէ, վարժարանը Պուլաք փո-

խաղրելու նախաձեռնութիւնն ստանձնեց ու իր սե-  
փական ծախքով կառուցանել տուաւ զպրոցական գե-  
ղեցիկ շէնք մը, զոր վեհանձնօրէն ձօնեց Գալուստ-  
եանի յիշատակին:

Մինչ այդ, վարժարանը կը հարստանար ուրիշ  
կարեւոր նուիրատուութեամբ մը, հանդուցեալ Պօղոս  
Կարապետեանի կտակով:

Վերջապէս, ասկէ քանի մը տարիներ առաջ,  
հանդուցեալ Գրիգոր Եղիայեան, յօգուտ վարժարա-  
նին կը կտակէր իր հարստութեան մէկ մասը, որուն  
եկամուտները պիտի յատկացուէին Գալուստեանի լա-  
ւադոյն աշակերտներէն ընտրուած ուսանողներ պահե-  
լու տարբեր հիմնարկութեանց մէջ:

Շնորհիւ այս զանազան նուիրատուութեանց, ո-  
րոնց արժէքը քառապատկեցաւ 914—18ի պատերազ-  
մին հետեւանքով հողերու գնին բարձրացմամբ, Գա-  
լուստեան վարժարանի հասոյթներն հետզհետէ աւել-  
ցան ու կրթական այդ հիմնարկութիւնը կրցաւ ձեռք  
բերել պիտածէ մը, որուն գումարը 5000 եգիպտա-  
կան ոսկին անցաւ երբեմն:



### ԳԱԼՈՒՍՏԵԱՆ ՄԱՆԿԱՊԱՐՏԷՉ

Ա. ԱՅՑԵԼՈՒԹԻՒՆ. Գահիրե, 20 Յունուար 1931 :

Գահիրէի Հայոց Ազգային վարժարանները զե-  
տեղուած են Պուլազի ընդարձակ ուղղանկիւնին մէջ :  
Անոր հիւսիսային ճակատին վրայ կը բարձրանայ Գա-  
լուստեան մանկապարտէզը , որ երկյարկանի շէնք մըն  
է խիստ լայն և արեւայորդ սենեակներով , որոնց մէջ  
գլխաւ կրնան տեղաւորուիլ մանուկները :

Վարժարանին յրաշման Տնօրէնը , Պ. Թաշճեան ,  
որուն կը ներկայանամ Սրբազան Առաջնորդ Հօր յանձ-  
նարարականով , կ'առաջնորդէ զիս Օր. Զաքարեանի  
մօտ և այցելութեանս նպատակը կը բացատրէ անոր :  
Ներկայացման արարողութիւնները երկար չեն տեւեր :  
Արդէն ուրիշ անգամ Գալուստեան Մանկապարտէզի  
Տնօրէնուհին ճանչնալու հաճոյքն ունեցած էի Իսմա-  
յիլիէի մէջ : Ուստի , Պ. Թաշճեանի հեռանալէն անմի-  
ջապէս յետոյ , խիստ շնորհալի ընտանութեամբ մը  
կ'առաջնորդէ զիս սրահ մը , ուր համախմբուած կը  
գտնեմ քառասունի չափ տիկիներ . անոնք եկած են  
մանուկներու ներկայացում մը գիտելու համար :

— Ա՛հ , ոչ , կ'ըսեմ կորովի շեշտով մը , ժամա-  
նակէ մ'ի վեր այլեւս չեմ կրնար հաճոյք զգալ մանկա-  
կան այս հանդէսներէն , որոնք կրնան հետաքրքրական  
ըլլալ թերեւս մայրերուն համար . ուստի կը խնդրեմ  
որ խնայէք ինձի այս ... Corvéeն : կը տեսնեմ որ

յարմար օր մը չեմ ընտրած . այժմ առանձին կը թո-  
ղում ձեզ ձեր հիւրերուն հետ , վաղը կամ միւս օր  
կրկին գալու համար , եթէ թոյլ տաք :

Բայց Օր. Զաքարեան կը պնդէ . — Քառորդ ժամ  
մը միայն , ճիշդ այնքան , որքան պէտք է ըսելիք-  
ներս վերջացնելու համար : Այնուհետեւ բոլորովին  
ձերը պիտի ըլլամ : Միւս կողմէ՝ շատ պիտի փափա-  
քէի Ձեզի հետ միասին ըլլալ այս առաջին այցելու-  
թեան միջոցին :

Աւելի պնդել անքաղաքավարութիւնս պիտի ըլլար  
իմ կողմէս , ուստի տեղի կուտամ ... հակառակ իմ  
կամքիս , ու կը տեղաւորուիմ այցելուներու շարքին  
մէջ : Եւ սակայն բնաւ չզղջացի կեցած ըլլալուս հա-  
մար , որովհետեւ այդ կերպով կրցայ տեսնել ու սով-  
րիլ շատ մը շահեկան բաներ , որոնք ուշադրութենէս  
պիտի վրիպէին ապահովաբար : Ասկէ զատ , լսել ու  
տեսնել իրարմէ տարբեր բաներ են : Այդ օրը , կէս  
ժամուան ընթացքին , շատ աւելի բան տեսայ ու նը-  
կատեցի Մանկապարտէզին մէջ որդեգրուած մեթոտին  
և անոր վարիչն ու իր գործակիցները խանդավառող  
ողիին մասին , որքան չպիտի կրնայի ընել տասն ան-  
գամ իրարու ետեւէ այցելելով :

Հրաւիրեալները , մանկամարդ մայրեր կամ բարի  
մամիկներ , արդէն իսկ յուզուած այն մտածումէն թէ  
քիչ վերջը պիտի տեսնէին տողանցքը իրենց պզտիկ-  
ներուն , որոնք մէկ կողմէ իրենց դերերը կատարե-  
լով հանդերձ , միւս կողմէ անոնց նայուածքին մէջ  
պիտի փնտռէին պաշտամունքի այն արտայայտու-

թիւնը, զոր սովոր էին կարգալ հոն, նստած էին այնտեղ և երկիւղած լուռթեամբ մը մտիկ կ'ընէին Օր. Զաքարեանը, որ այդ հրաւէրին նպատակը կը բացատրէր անոնց :

— « Մենք ոչինչ կրնանք ընել այստեղ առանց ձեր օժանդակութեան, մայրեր, կ'ըսէր ան : Որպէսզի կարենանք մեր պարտականութիւնները կատարել և արգիւնաւոր կերպով լծուիլ ձեր զաւակներուն բարոյական և մտաւորական յառաջդիմութեան գործին, ձեր անհրաժեշտ աշխատակցութեան պէտք ունինք : Մանկապարտէզն ու ընտանիքը պարտաւոր են զիրար լրացնել : Այս պայմանով միայն անոնք կրնան իրագործել իրենց նպատակը, որ է մատաղ հոգիի մը ձեւակերպումը և իմացականութեան մը զարթնումը : Բայց ի՞նչպէս կրնանք գործակցիլ իրարու հետ, երբ զիրար չենք ճանչնար : Ստույգ է թէ մեր աշակերտներու տուներն այցելելու սովորութիւնն ունինք և ամէն տարի ձեզ տեսնելու կուգանք ձեր տան մէջ : Բայց այս ծանօթութիւնն անկատար պիտի ըլլար՝ եթէ դուք ալ մեզի չայցելէիք այստեղ : — Հոս գործի վրայ տեսնելով մեզ, պիտի գնահատէք մեր ճիգերը և համոզուելով որ անոնք արժանի են օժանդակութեան, չպիտի զլանաք ձեր քաջալերութիւնները՝ որոնց այնքան պէտք ունինք :

« Վերջապէս ձեր իսկ աչքերով կը տեսնէք այն շրջապատը՝ որուն մէջ ժամանակ կ'անցնեն ձեր զաւակները Մանկապարտէզի իրենց երեք տարիներու ընթացքին — երջանի՛կ տարիներ, որովհետեւ ամէն

ինչ կ'ընենք հոս որպէսզի իրենց ժամերը հաճելի դառնան, հակառակ խիստ կարգապահութեան և իրենցմէ պահանջուած ճիգերուն : Բայց մեր Մանկապարտէզին մէջ ընդունուած կարգապահութիւնը բնաւ չի նմանիր անոր՝ որուն ենթարկուեցաք դուք ձեր ատենին, ոչ ալ անոր՝ զոր դեռ այսօր իսկ կը պարտադրեն շատ մը վարժարաններու մէջ : Հոս կրաւորական հնազանդութիւն մը չենք պահանջեր տղոցմէն, զանոնք չենք դատապարտեր ընդարմացուցիչ լուռութեան և անշարժութեան, որ այնքան փաստակար է իրենց ֆիզիքական զարգացման : Դուք այստեղ չպիտի տեսնէք պղտիկ զինուորներ՝ որոնք շարքով պիտի անցնին ձեր առջեւէն պարզ ինքնաշարժներու (automate) նման, ոչ ալ կանոններու այն խստութիւնը, որ պատրաստ է պատժելու ամէն օրինազանցութիւն :

« Աշակերտներու մէջ մտքի ցրուածութեան տեղի չտալու և անոնց ձանձրոյթը փարատելու համար, համբերութեան գանձէն զատ — անհրաժեշտ դրամագլուխը ամէն անոնց՝ որոնք գործ ունին մանուկներու հետ — անսխալելի և մոգական միջոցներ ունինք մեր տրամադրութեան տակ : Մեր ժամանակացոյցին մէջ մտցուցած ենք զբաղումներու ամբողջ շարք մը, որոնց համար աշակերտները հոգի կուտան . գծադրութիւն, նկարչութիւն, շինութիւններ, կաղապարում (modelage), ուլունքներ շարել, ասեղնագործութիւն, մտքի ու մարմնի ձկունութեան փորձեր (jeux d'adresse), երգեր և մարզանք :

« Եւ որովհետեւ մանուկներն ալ շուտ կը յոգնին

ճիշդ մեծերու նման, իրենց ձանձրոյթը երգով փարատելու համար կրամոնոն մը գնեցինք, միւս կողմէ ոլ պէսզի կարենանք զանոնք կրթել տաանց ձանձրացնելու, սինէմայի մեքենայ մը հայթայթեցինք: Վերջապէս մեր աշակերտներուն եռանդը խթանելու համար՝ պղտիկ թանգարան մը կազմակերպեցինք, որուն մէջ խնամով կը պահենք իրենց լաւագոյն աշխատութիւնները: Այս բոլորէն զատ՝ պիտի տեսնէք ուրիշ ապակեդարան մը՝ ուր կը գտնուին պուպրիկներ, ոչխարներ, պղտիկ թմբուկներ և մանկական խաղերու վերաբերեալ ամբողջ կազմածներ՝ որոնք պիտի ծառայեն աւելի կենդանի, աւելի հետաքրքրական դարձնելու անոնց ոտանաւոր արտասանութիւններն ու երգերը: Միւս կողմէ կը ջանանք կարելի եղածին չափ մօտէն հետեւել մանկավարժական գիտութեան կատարելագործութիւններուն և ամէն օր բարոյական, մտաւորական և նիւթական նոր յառաջգիմութիւն մը կ'իրականացնենք այս հիմնարկութենէն ներս. անոր հաւորումը երեսի վրայ ձգած չենք, ընդհակառակն կը ջանանք օժտել զայն այնպիսի վայելչագարգուծութիւններով (embellissement) որոնք կրնան աւելի հրապուրիչ և աւելի սիրելի դարձնել Մանկապարտէզը մեր աշակերտներուն:

« Մեր ամբողջ դպրոցական կարասիները վերանորոգելու վրայ ենք արգէն: Նախկին սեւ նոտարաններուն տեղ, ընդունեցինք կանանչ կամ կապոյտ գոյնով պղտիկ աթոռներու և մէկ հողինոց առանձին պղտիկ սեղաններու նոր դրութիւնը, որոնք խիստ

նպատակաշարմար են, վայելուչ և առողջապահական: Մեր կահաւորումը գեռ հեռու է վերջացած ըլլալէ, սակայն զայն կատարելագործելու համար յոյսերնիս կտրած չենք բնաւ, վասնզի վստահ ենք ձեր օգնութեան, որուն շնորհիւ կրցած ենք արգէն այնքան հրաշքներ գործել: Այո՛, ձեզի, ձեր գործակցութեան միայն կը պարտինք, մայրե՛ր, մեր Մանկապարտէզին բոլոր այս վայելչագարգուծիւնները: Ձեր տարեկան փոքրիկ նուիրատուութիւններուն շնորհիւ, որոնց գումարը 40—50 սկիի կը հասնի, մեր տրամադրութեան տակ ունինք և պիտի ունենանք պղտիկ դրամագուլիս մը, որով պիտի կրնանք վերջին կատարելութիւններով օժտել մեր հիմնարկութիւնը: Բայց լաւ է որ խօսքը տամ ձեր գաւակներուն: Անոնց միջոցաւ պիտի համոզուիք թէ մեր բոլոր ճիւղերը արժանի են ձեր գնահատութեան և վստահ եմ թէ պիտի շարունակէք սերտօրէն գործակցիլ մեզի, ինչպէս ըրած էք մինչեւ այսօր, գործակցութիւն, որմէ մեծապէս պիտի օգտուին ձեր սրտի հատորները »:

Յանկարծ դուռը կը բացուի ու 30ի չափ պղտիկներ, որոնք կարծես նշանի մը կը սպասէին, ներս կուգան ու իրենց ծնողաց աչքին առջեւ զանազան շարժումներ կ'ընեն, կ'երգեն ու ոտանաւորներ կ'արտասանեն: Բոլորն ալ ընտանի են իրենց կերպերուն մէջ, ժպտուն և աշխոյժ, ճնճղուկներու նման: Ընթերցողը կրնայ երեւակայել ուրախութիւնը պառաւ մամիկներուն, որոնց հիացումը չափ ու սահման չունի: Բայց Օր. Զաքարեան, հաւատարիմ իր խոստման, դուրս կ'ելլէ, նշան ընելով ինծի որ իրեն հետեւիմ:

Կարճ այցելութիւն մը 4 օրեկանհետու դասարանը (Ծիլ) :

Քառասուն աշակերտներ են անոնք խիստ ընդարձակ սենեակի մը մէջ : Բայց ինծի կը թուի թէ քառասուն հոգինոց դասարան մը շատ կուգայ խնամեալ աշխատանքի մը համար : Մանուկներն զբաղած են միջակ մեծութեամբ ուլունքներ շարելով թելերու վրայ : Զիրենք հարցափորձելով, կը տեսնեմ որ կրնան տարբերել գոյները և իրարմէ զանազանել կապոյտն ու դեղինը, կարմիրն ու ճերմակը, և շն : Կրնան ինծի ցոյց տալ երեք մատ, երեք աթոռ, երեք սեղան, երեք ուլունք . . . Աւելի ի՞նչ կրնայինք սպասել իրենցմէ :

«Կոկոն» դասարան. 5—6 օրեկաններ :

Այս դասարանին մէջ կը գտնեմ բարեկամուհիս, Տիկին Հ. Պալեան, որ քանի մը տարիներէ ի վեր արդէն կը պաշտօնավարէ հոս : Իր դասարանն ալ խըճողուած է 40 աշակերտներով : Պզտիկներն արդէն գաղափար ունին ամբողջին և կէսին մասին : Այսօրուան դասին նիւթը  $\frac{1}{4}$  ն է :

Տղոց առջև դրուած են հաւասար մեծութեամբ 4 խորանարդներ :

— «Ամբողջ մը կազմեցէք», կը հրամայէ ուսուցչուհին : Աշակերտներն իրարու քով կը բերեն զանոնք : — «Լա՛ւ, երկու կէսերու բաժնեցէ՛ք զայն» :

Աշակերտներն երկուքի կը բաժնեն զայն առանց վարանելու :

— «Նորէն ամբողջ մը կազմեցէք ու վերջէն ալ չորս մասերու բաժնեցէք զայն» : Տղայք չորս խորանարդները կը շարեն սեղաններուն վրայ :

Յետոյ վարժուհին կարմիր խնձոր մը առնելով, կը կանչէ աշակերտներէն մէկը, որ ընկերներուն դիմացը կեցած, միեւնոյն գործողութիւնը կը կրկնէ պլատուղին վրայ : Պզտիկներն ուշադրութեամբ կը հետեւէին անոր և բոլորն ալ հասկնալու երեւոյթն ունէին :

Աւելի ապահով ըլլալու համար՝ կը պատրաստըւէի հարցաքննել զիրենք, երբ յանկարծ զանգակը հնչեց. ու խորհելով թէ իմ կողմէս անխղճութիւն պիտի ըլլար աւելի երկար վար դնել զիրենք, որովհետեւ արդէն կէսօր էր և անոնց պարապ ստամոքսները կրնային բողոքել իմ դէմս, ստիպուեցայ հետեւիլ իրենց՝ ճաշարան երթալու համար :

## Չ Ր Ի Կ Ե Ր Ա. Կ Ո Ւ Ր

Փալուստեան վարժարանի ճաշարանը կը գտնուի Մանկապարտէզի ստորնայարկին մէջ : Այնտեղ զետեղուած են մոմլաթով ծածկուած քանի մը սեղաններ, որոնց երկու կողմերը շարուած են նստարանները : Աշակերտներէն անոնք որ կերակուր բերած են հետերնին, տեղ կը բռնեն այդ սեղաններէն մէկուն շուրջը, իսկ անոնք որ ձրի կերակուր կը ստանան, կը հաւաքուին ուրիշ սեղաններու շուրջ : Ամէն մէկ աշակերտի

առջեւ դրուած է հացի խոշոր, խիստ խոշոր շերտ մը, ձիւնի պէս ճերմակ ու կարկանդակի պէս փափուկ, որ սակայն, հակառակ իր խոշորութեան և ախորժաքեր տեսքին, քիչ սննդարար է: Միայն սեւ հացն է որ կրնայ հարկ եղած սնունդը տալ, վասնզի անոր ալիւրը որոշ քանակութեամբ թեփ կը պարունակէ: Բժիշկները շարունակ կը կրկնեն այս ճշմարտութիւնը, բայց պարապ աշխատանք, վասնզի հացը ոչ մէկ ատեն ճերմակ եղած է որքան ներկայիս: Ուրեմն Գալուստեանի մէջ աղքատիկ աշակերտներուն մատակարարուած հացը խիստ ճերմակ է:

Ճաշարանին մէկ անկիւնը, եռայող կաթսայի մը մօտ, կեցած է տիկին մը: Փոքրիկներն իրենց պնակները կ'երկարեն անոր և ան ամէն մէկուն մէջ կը լեցընէ շերեփ մը կարագով եփած սիսեռ, որ հազիւ թէ փոքրիկ սնակին յատակը կը ծածկէ: Այսքանը քիչ է: Եւ յետոյ ստացած տեղեկութիւններէս կը հետեւցնեմ թէ ճաշացուցակը խիստ միօրինակ է(\*):

«Ձրի և տաք կերակուր, պիտի ըսէք, ինքնին գնահատելի գործ մը. ասկէ աւելի ի՞նչ կարելի է պահանջել»: Իրաւունք ունիք, ու ես ու է գիտողութիւն չպիտի ընէի այս մասին, եթէ հաւատացած չըլլայի թէ միեւնոյն ծախքով կարելի էր աւելի առատ

(\*) Նոյն սպասարկութիւնը գոյութիւն ունի նաեւ Պօղոսեան վարժարանին մէջ՝ Տիկնանց Խնամակալութեան ջանքերուն շնորհիւ. բայց հոն զոց տրուած կերակուրը արեւի առաս եւ ճաշացուցակին մէջ բաղդասաբար արեւի պէսպիսութիւն կայ, ինչպէս կրցայ հաստատել յանախակի այցելութիւններուս միջոցին:

կերակուր հայթայթել տղոց և աւելի պէսպիսութիւն դնել ճաշացուցակին մէջ:

«Ի՞նչպէս», պիտի հարցնէք անշուշտ: — Պարզապէս հացի և ճաշարանի սպասներուն աւելորդ ծախքը շնջելով:

«Տղոց հացը կտրե՛լ, կարելի՞ է միթէ»: — Այս գազափարը խորթ պիտի հնչէ ձեզի: Եւ սակայն ի՞նչ է այս գործին նպատակը: Աշակերտներուն տալ այն բանը, զոր իր ծնողքը տալու գիւրութիւնը չունի: Արդ՝ ու եւ է ընտանիք, ինչքան ալ չքաւոր ըլլայ, դարձեալ կրնայ օրական հացին պատուը տալ իր տղուն ձեռքը: Եւ ինչո՞ւ համար այս տղաքը հետեւին չբերեն իրենց համար պնակ, ջուրի գաւաթ, անձեռոց և դգալ պարունակող իրենց սակառք և իրիկունն ալ տուն չտանին զայն: Տնէն կերակուր բերողները շատ լաւ կրնան այս գործը տեսնել: Ի՞նչ պատճառ ունինք կարծելու թէ վարժարանէն ճաշողները չեն կրնար այդ միեւնոյն բանը ընել միւսներուն նման:

Ճաշարանի սպասներէն ու հացէն գոյացած այս խնայողութիւնը պիտի կրնար զգալաբար բարելաւել կերակուրները և այլազանութիւն մը մտցնել ճաշացուցակին մէջ:

Բայց սովորամոլութիւնը թոյլ չպիտի տայ այս խիստ տարրական բարեփոխութիւնը ներմուծելու այնտեղ. հետեւաբար անօգուտ բան է աւելի ծանրանալ այս մասին...:

Բ. ԱՅՅԵԼՈՒԹԻՒՆ. — 21 ՅՈՒՆՈՒՐ :

Իրագիտութիւն « Ծաղիկ » դասարանի (7 տարեկաններ) :

Յորեկին պատմութիւնը. — Վարժուհիին գլխուն վերև, պատէն կախուած է փոքրիկ պատկեր մը՝ որ ջրաղաց մը կը ներկայացնէ, Վարժուհին կը հարցնէ.

— « Ի՞նչ կը տեսնէք այս պատկերին մէջ :

— Զրաղաց :

— Մարդիկ ջրաղացին մէջ ի՞նչ կ'ընեն :

Լուսթիւն :

Վերջապէս աշակերտ մը, միտքը բերելով անշուշտ նախընթաց դասերէն մէկը, կը պատասխանէ վարժուհիին.

— Անոր մէջ ցորեն կ'աղան :

Վարժուհին նորէն կը հարցնէ.

— Ուրկէ՞ ձեռք կը բերենք ցորենը :

Ամբողջ դասարանը միաբերան.

— Արտերէն :

— Ի՞նչ բանի կը ծառայէ ցորենէն ելած ալիւրը : Բոլոր աշակերտները՝ ոգեւորութեամբ կը պատասխանեն.

— Հաց, կարկանդակ, սիւլիք կը շինեն անով :

— Ապրի՛ք, շատ ազէկ է» : Ու դասը կը վերջանայ հազիւ քառորդ ժամ մը տեսելէ յետոյ :

Ցորենին պատմութիւնը : Բայց փոխանակ հապճեպով վերջացած բառերու պարզ դաս մը ըլլալու,

կրնար լեցնել ամբողջ եղանակի մը, երկու երեք ամիսներու ծրագիրը, ի հարկէ ընդհատուածներով, բայց շարունակ չհեռանալով անկէ, որպէս զի ցորենի գաղափարին հետ կապուած զանազան ծանօթութիւնները խորապէս քանդակուէին աշակերտներու մտքին մէջ :

Յետոյ, ինչո՞ւ ցոյց չտալ ցորենը, անոնց աչքին առջև, պնակի մը մէջ չցանել զայն, որպէս զի աշակերտները կարենան տեսնել անոր ծլարձակումը : Ինչո՞ւ Շուպրայի արտերը չառաջնորդել զանոնք հունձքի եղանակին կամ կալի ատեն, երբ գիւղացին որաներու ոսկի դէզը կը փռէ կալին մէջ ու կ'սկսի ցորենը յարգէն զատելու գործողութեան : Ի՞նչ բանաստեղծական տեսարան. ֆէլլահը նստած է կամին վրայ, զոր կալին մէջ կը դարձնեն երկու հուժկու գոմէշներ, մինչ յարդի թեթև շիւղերը օդին մէջ կը պարեն քնքոյշ զեփիւռի շունչին տակ և իրենց ոսկի փոշին տակ կը ծածկեն մարդիկն ու անասունները : Անոնց ճիշտ մօտը, պատկառելի ժանտաթղենի մը շուքին տակ, կը դառնայ ջրհան անիւը, սաքիքն, ուսկից ջրերը կը թափին առուին մէջ անուշ խոխոջիւնով մը, իսկ այդ աշխատանքին վրայ հսկող մարդը, իր ձանձրոյթը փարատելու համար, կը մրմնջէ տխուր ու մեղամաղձոտ երգ մը, մէկը այն վաղնջական երգերէն, որոնք օրեցին մարդկութիւնը իր ծագման օրերէն սկսեալ :

Որքա՞ն հմայիչ կրնան ըլլալ այս բոլորը՝ մանուկ դիտողին համար, որքա՞ն գեղեցկութիւն և ո՞րպիսի սքանչելի նիւթեր գծելու և կաղապարելու. միևս կողմէ, այս կարգի պտոյտները ո՞րքան պիտի նպաս-

տեն աշակերտներու մտաւորական զարգացման և պիտի կազմուրեն անոնց մարմինը :

— «Այս բոլորը սքանչելի բաներ են, ըսողներ գտնուին թերեւս, բայց ոչ գործադրելի» : Անհիմն առարկութիւն : Ի հարկէ վարժուհիներէն պահանջող չկայ որ դէպի արտերն առաջնորդեն 300 հատ անհանգարտ մանուկներ, բայց շատ դիւրութեամբ կարելի է այսպիսի պտոյտներ սարքել 30ի չափ 7—8 տարեկան աշակերտներու համար, որոնք նախընթաց դասերու միջոցաւ պատրաստուած ըլլան դիտելու և հասկնալու իրենց տեսած բաները և անոնցմով հետաքրքրուելու :

Բայց ապահով եմ թէ Օր. Զաքարեան, քաջ ըմբռնելով վերի թելադրութեան իմաստը, «սքանչելի, բայց ոչ գործադրելի» ի այս առարկութիւնը չպիտի յարուցանէ բնաւ : Նա մէկէ աւելի անգամներ տուած է արդէն իր նախաձեռնութեան ապացոյցները և պիտի չվարանի կատարուելիք նոր ճիգերու առջև : Հետեւաբար կասկած չունիմ թէ պիտի հաճի բարեփոխել իր մեթոտին այս մասը, մեթոտ մը, սակայն, որ անառարկելի է և որուն մէջ կը ցոլայ ճշմարիտ մանկապարտէզի իսկական ոգին :

Ընթերցանութիւն եւ Զրուցագրութիւն «Բողոք» դասարանի (6—7 տարեկաններ) :

Մանուկները նստած են իրենց փոքրիկ գրասեղաններուն առջև. աշխուժութիւնն ու ժպիտը կը ցօլան իրենց դէմքերուն վրայ և այցելուն հաճոյք կը

զգայ անոնց վրայի գլուխի խնամեալ մաքրութիւնը տեսնելով : Անոնք կը շարունակեն նախորդ օրուան իրենց ընթերցանութեան դասը, որուն նիւթը Մ գիրն է : Օր. Զաքարեան հարցումներ կ'ուղղէ անխտրաբար բոլոր կարգերուն մէջէն ու է աշակերտի : Տրուած պատասխանները բոլորն ալ ճիշտ են :

Յետոյ կ'անցնի Կ գրին. նախ կը գծէ անոր պատկերը գրատախտակին վրայ իր բաղկացուցիչ մասերուն բաժնելով զայն, ուղղաձիգ, հորիզոնական և յետոյ դարձեալ ուղղաձիգ գծիկներով : Վերջը բոլոր աշակերտները, տրուած մասնաւոր նշանի մը վրայ, մէկ անգամէն կը շարունակեն գրատախտակին առջև, որ կը բռնէ դասարանին չորս պատերը և աշակերտներու թուին չափ մասերու բաժնուած է :

Ամէն մէկ աշակերտ, այդ մասերէն մէկուն առջև կեցած, իր կարգին կը գծէ Կ գրին պատկերը. այնուհետև նախ վանկեր, յետոյ ամբողջական բառեր կը կազմեն այս նոր գրին միջոցաւ : Եւ մանուկները այս բոլորը կ'ընեն իրենց համար խիստ պատուաբեր յաջողակութեամբ : Որդեգրուած այս մեթոտը անթերի է. որովհետև մտքերը չի քնացներ, ամբողջ դասարանը մէկ անգամէն կրնայ զբաղեցնել և անոր շնորհիւ աշակերտները կ'օգտագործեն իրենց սուղ ժամանակը :


Թուաբանութիւն «Ծաղիկ» դասարանի (7—8 տարեկան) :

Այս դասարանին մէջ ալ աշակերտները թուով խիստ շատ են. բայց շնորհիւ անթերի մեթոտի մը,

որուն գլխաւոր գիծերը ցոյց տուինք ընթերցանութեան դասին առթիւ, աշակերտները կրցած են աղէկ մը մտքերնին պահել այն ամէնը ինչ որ սորված են մինչև այդ օրը, այսինքն մինչև 20 թիւը իր չորս գործողութիւններով:

Այս հիմնարկութեան մէջ ինչ որ ամենէն աւելի զնահատելի թուեցաւ ինծի, ամբողջ դասարանին հետաքրքրութիւնը վառ պահելու այն մեթոտն է, որ աշակերտներուն մէջ կրնայ զարգացնել ուշադրութեան ընդունակութիւնը և խորհրդածելու կը վարժեցնէ դասունք:

Կէսօր է արդէն. հրաժեշտ կուտամ և կը բաժնուլիմ Գալուստեան Մանկապարտէզէն՝ սքանչելի տպաւորութեամբ, վասնզի այնտեղ կրցայ տեսնել ընտիր յատկութիւններ, նախաձեռնութեան ոգի, անխոնջ կորով, մշտարթուն հետաքրքրութիւն և յառաջգիմութեան բաղձանք, որ կը կռթնի մանկավարժական հիմնական ծանօթութիւններու վրայ:



## ԳԱԼՈՒՍՏԵԱՆ ԲԱՐՁՐԱԳՈՅՆ ՆԱԽԱԿՐԹԱՐԱՆ

### 22 Յուճուար:

Գալուստեան և Պօղոսեան վարժարաններն այնքան կը նմանին իրարու, որքան ջուրի երկու կաթիլներ. ա՛յս եղաւ իմ առաջին տպաւորութիւնս անոնց մասին:

Անոնք իրարու կը նմանին նախ իրենց արտաքին երեւոյթով. իրենց սեմերէն ներս միեւնոյն անփութութիւնն է որ կը տարածուի բոլոր իրերուն վրայ. անհամանման և դանակով ծակծկուած միեւնոյն գըրասեղան - նստարանները, որոնց սև գոյնը կասկածելի դառնալու չափ կորսնցուցած է իր ինքնութիւնը, և որոնք, իրենց բիծերովն ու ծակտիքներով, բորոտութենէ կրճուած դէմքեր կը յիշեցնեն:

Նոյն ողբալի տպաւորութիւնը կը կրես նաև աշակերտներու թափթփած արտաքինէն, որ մանչերու վրայ աւելի կը շեշտուի, որովհետև մոռնալու չէ թէ աղջիկներն աւելի հոգածու են այս տեսակէտով: Ու կը զգաս թէ անոնց այս անխնամ վիճակը չքաւորութենէ աւելի՝ հետեւանք է անհոգութեան և ճաշակի բացակայութեան, թէ անոնք վարժուած չեն իրենց արդուզարդին վրայ գուրգուրալու, վասն զի անոնց վրայ հսկողները չափէն աւելի ներողամիտ, թերեւս նոյնիսկ անտարբեր գտնուած են այս մասին, անտարբերութիւն, որ դատապարտելի է, քանի որ գիտենք

թէ — և մանկավարժ ուսուցիչ մը պարտաւոր է գիտնալ — մարդուս արտաքինը ո՛րքան խորունկ անդրազարձումներ կ'ունենայ անոր հոգիին վրայ :

Վերջապէս կրթական այս երկու հիմնարկութիւններն իրարու կը նմանին նաև բարոյական կերպարանքով : Բացարձակապէս միեւնոյն ուսումնական ծրարագիրն է որ կը գործադրուի երկուքին մէջն ալ, հետեւաբար այս առթիւ մէկուսն հասցէին եղած քննադատութիւնները կը յարմարին նաև միւսին :

Իսկ ինչ կը վերաբերի հակամանկավարժական և աննպատակայարմար դասագրքերուն, այդ թերութիւնը միմիայն եզրուպահայ վարժարաններուն յատուկ է : Անոնց տնօրէններն ստիպուած են գոհանալ գտնուած գրքերով . յանցանքը իրենցը չէ՝ եթէ պակասութիւնները կը վխտան այդ գրքերուն մէջ ու եթէ հայերէն լեզուով գրուած շէնք շնորհք գրքեր գոյութիւն չունին նոյն իսկ գիտութիւններու պէս կարեւոր նիւթերու համար :

Առհասարակ կարելի է ըսել թէ Գալուստեանի ուսուցչական կազմը աւելի բարձր է քան Պողոսեանինը, և այս այն պարզ պատճառաւ որ Գահիրէի մէջ գըպորոցական աշխատութիւնները աւելի հետեւողական եղած են . Գալուստեանը չտեսաւ Պողոսեան վարժարանի փոթորկալից օրերը և այն երկու-երեք յեղափոխութիւնները՝ որոնք քանիցս տակն ու վրայ ըրին Աղեքսանդրիոյ Հայոց դպրոցը 1914էն սուրիս : Տարակոյս չկայ թէ այս պայմաններուն մէջ Գալուստեան վարժարանը շատ աւելի բարձր արդիւնքներ պիտի տար քան թէ Պողոսեանը :

Կայ նաև ուրիշ պարագայ մը՝ որ ոչ նուազ արժանի է նկատողութեան . Գալուստեանը 34 ուսուցիչներ կը պահէ շուրջ 650 աշակերտի համար : Աւելորդ է դիտել տալ թէ այդքան ուսուցիչ շատ է 650 աշակերտ հաշուող վարժարանի մը մէջ :

Ասոր գլխաւոր պատճառն այն է որ դասարանները երկսեռ չեն այնտեղ ու Մանկավարժէզէն յետոյ՝ մանչ և աղջիկ զատ զատ դասարաններու մէջ կ'ուսանին : Չենք հասկնար թէ Գահիրէի մեր ազգայիններն ինչո՞ւ կը յամառին յարատեւել իրենց այս սովորութեան մէջ : Պողոսեան վարժարանը երկսեռ դասարաններու գրութիւնն ընդունած է իր հիմնարկութեան օրէն, այսինքն 1860էն ի վեր և ուէ անպատեհութիւն չէ նկատուած հոն . միեւնոյն գրութիւնը որդեգրուած է նաև Նուպարեանի կողմէ ու ասոր համար վարժարանը տուժած չէ բնաւ :

Մինչ Գալուստեան, չուզելով հրաժարիլ իր հին սովորութենէն, ստիպուած է այսօր (1930-31) վեց հոգիինոց դասարան մը պահել աղջիկներու կողմը և տասը հոգիինոց ուրիշ դասարան մ'ալ սանչերու բաժնին մէջ, ինչ որ ծիծաղելի է արդարև :

Եւ մի՛ մոռնաք թէ այդ կարգի բարձրագոյն դասարանները աւելի լաւ վարձատրուած մասնաւոր պաշտօնէութեան մը պէտք ունին . . . : Չէ՞ք կարծեր թէ դրամական աննպատակ մտխում մըն է այս, որուն չի կրնար դիմանալ Գահիրէի մեր համայնքին աղքատիկ պիւտճէն : Պողոսեան վարժարանը 90 տարիներու փորձառութիւն մ'ունի իր ետև : Այս պարագան կրնայ

վտահուժիւն ներշնչել Գահիրէցիներուն և համոզել զիրենք որ որդեգրեն երկսեռ դաստիարակութեան գրութիւնը, նոյնինքն նախակրթարանի առաջին տարիէն: Չորս տարեկանէն սկսեալ քով քովի նստած անմեղունակ մանկիկներ կրնան միեւնոյն կերպով շարունակել մինչև իրենց 15—16 տարեկան հասակը՝ առանց ու ե կ անպատեհութեան: Անոնց միջև պիտի հաստատուի եղբայրական կապ մը և պիտի կրնայ արգիլել բոլոր այն վտանգաւոր տգեղութիւնները որոնք երեւան կուգան տասնըհինգ տարին անցուցած պատանիներու և մատաղահաս աղջիկներու յանկարծական շփումէն:

Թերեւս առարկողներ գտնուին թէ Գալուստեանի Հոգաբարձութիւնը խառն դաստիարակութեան գրութիւնն ընդունելով, ստիպուած պիտի ըլլայ ճամբայ տայ քանի մը ուսուցիչներու և այս կերպով քիստել անոնց շահերուն: Մեր տալիք պատասխանը պարզ է այս մասին: Քանի մը հարիւր աշակերտներու օգուտը շատ աւելի արժանի է մեր նկատողութեան, քան թէ երկու երեք ուսուցչի անձնական շահը և թէ սխալ բան է վարժարանը նկատել տեսակ մը բարեգործական հիմնարկութիւն մտաւորականներ ապրեցնելու համար: Միւս կողմէ, կարելի է հատուցում մը սահմանել այգպիսիներուն և Գալուստեանի մէջ գործադրել այն անհրաժեշտ բարեկարգութիւնները, որոնք այսօր աւելի ստիպողական կը դառնան Առաջնորդարանի պիւտճէին անձկութեան պատճառաւ:



Գ.

### ՆՈՒՊԱՐԵԱՆ ՎԱՐԺԱՐԱՆ

Նուպարեան վարժարանը կը բարձրանայ Գահիրէի ամենէն աւելի ինքնատիպ, օղատուն և գեղեցիկ արուարձաններէն մէկուն, Հէլիօքսիսի, այսինքն մայրաքաղաքի այն մասին մէջ, որուն անունը սերտօրէն կապուած է ողբացեալ Պօղոս փաշա Նուպարի անունին հետ, վասն զի ինքն էր որ Պառօն Ամբէնի հետ, անոր գլխաւոր ստեղծիչներէն մէկը եղաւ:

Այս վարժարանը կառուցուեցաւ 1924ին և 4000 Եգ. Ոսկիի գումար մը արժեց իր հիմնադրին համար: Ներկայ հիմնարկութեան մէջ ալ յստակօրէն ի յայտ կուգան մտքի ու սրտի այն մեծ յատկութիւնները և խիստ ուշագրաւ այն գործնական ոգին, որոնք կը բնորոշեն Պօղոս փաշայի բոլոր նուիրատուութիւնները: Արդարեւ նա չգոհացաւ միայն դպրոցական գեղեցիկ շէնք մը պարգեւելով Գահիրէի մեր ազգակիցներուն, այլ փափաքեցաւ նաև, գոնէ մասամբ, ապահովել անոր գոյութիւնը և օժտեց զայն տարեկան 400 Եգ. Ոսկիի եկամուտով, ինչ որ բերթէ մէկ երրորդ մասը կը կազմէ վարժարանի տարեկան պիւտճէին:

Նուպարեանն ունի շուրջ 200 աշակերտներ 5—15

տարեկան . այստեղ ալ դասարանները խառն են , ինչպէս Պօղոսեանի մէջ . բայց մանչերը 13—14 տարեկանէն յետոյ՝ կը հեռանան այս վարժարանէն , իրենց ուսումը շարունակելու համար Պէրպէրեանի մէջ :

Վարժարանին տնօրէնը , Պ . Գ . Տիւրկէրեան , — վկայեալ իրաւաբան Լօզանի Համալսարանէն — կը պտտցնէ զիս դասարանները , որոնք հեղեղօրէն կ'ընդունին արեւին լոյսը և խիստ օգասուն են : Նախ կանգ կ'առնենք Մանկապարտէզին մէջ՝ աչքէ անցընելու համար տղոց ձեռագործները , հիւսուածքներ , կաղապարում , գծագրութիւն և ըն . : Յետոյ կը բարձրանանք վերի յարկը և ներկայ կ'ըլլանք տարրական դասարաններու դասերուն : Ուսուցիչներու թոյլտուութեամբ , ես ալ իմ կարգիս , հարցումներ կ'ուղղեմ աշակերտներուն , աչքէ կ'անցնեմ իրենց տետրակներն ու գրքերը և կը քննեմ ուսմանց ընդհանուր ծրագիրը :

Ծրագիրը — բացի գրաբարէն , որուն տեղ չէ տրուած այս վարժարանին մէջ — տարբերութիւն չունի Գալուստեանի և Պօղոսեանի ծրագիրներէն . գալով դասագրքերուն , հազիւ թէ քանի մը նոր հատորներ կը տեսնեմ անոնց մէջ , մնացածներուն արդէն ծանօթ էի վերոգրեալ երկու վարժարաններէն : Ասկէ առաջ երկարօրէն խօսած ըլլալով այդ ծրագրի անպատեհութեանց և այդ դասագրքերու անբաւարարութեան մասին , աւելորդ կը նկատեմ կրկին ծանրանալ այդ նիւթերուն վրայ : Բայց չպիտի ուզէի ծածկել կարգ մը դիտողութիւններ , որոնց տեղի կուտայ Նուպարեան վարժարանի ուսուցչական կազմը :

Նախորդ երկու վարժարաններու ուսուցչութեան մասին կարծիք յայտնած ատենս կ'ըսէի թէ Պօղոսեանի ուսուցչական խումբը միջակ մակարդակ մը կը ներկայացնէր ընդհանուր առմամբ : Եւ սակայն Աղեքսանդրիոյ ազգային վարժարանին մէջ կը գտնուին երկու սեռէ շատ մը ուսուցիչներ , որոնք վկայուած են կրթական կարեւոր հիմնարկութիւններու կողմէ , օր . Մոնթէլիէի Վարժապետանոցէն , Պոլսոյ Կեդր . Ուսումնական Խորհուրդէն՝ իբրև դաստիարակ և մասնագէտ ուսուցիչներ , Արմաշի Դպրեվանքէն , Խարբերդի և Այնթապի Գօլէճներէն , Լիոնի Ակադեմիայէն Իտալիայէն , Զուիցերիայէն և ըն . և ըն . ինչպէս և տարիներու փորձառութեամբ օժտուած կրթական մշակներ : Միեւնոյն բանը կը դիտեմ նաև Գալուստեանի ուսուցչական ցանկին մէջ , ուր աչքիս կը զարնեն Ազգ . Կեդրոնական վարժարանէն , Դպրեվանքէն , Գէորգեան ձեմարանէն , Նոր Դպրոցէն , Եւրոպական Էճոլ Նորմալներէ , Պոլսոյ Բժշկական Համալսարանէն , Պուռօի ուսուցչանոցէն , Բարիզի և Ժընէվի Ֆախիլթեաներէն , Ռուպէրթ Գոլէճէն , և ըն . վկայուած երկսեռ ուսուցիչներ :

Սակայն Նուպարեանի 16 ուսուցիչներուն մէջէն հազիւ կարելի է գտնել 4 հատ , որոնք լուրջ յանձնարարականներ ունին իրենց ձեռքը : Ընդհակառակն , մենք կը սպասէինք որ այդ վարժարանին մէջ պաշտօնի կանչուած ըլլար տաղանդաւոր ուսուցիչներու ամբողջ խումբ մը , քանի որ աշակերտները մեծագոյն մասամբ թոշակաւոր են այնտեղ . . . : Դժբախտաբար ,

սակայն, յուսախաբ եղանք մեր ակնկալութիւններուն մէջ: Մանկապարտէզի վարժուհիները Գալուստեանի նախկին սանուհիներ են, պատրաստուած Օր. Զաքարեանի կողմէ, առանց սակայն հիմնապէս կազմակերպուելու, ըսել կ'ուզեմ թէ թէև կրցած են ձեռք բերել Ֆրեյդիկայի մեթոտներուն տառը, բայց չեն կըրցած թափանցել անոնց ոգիին: Իրենց ներկայութիւնը կրնար օգտակար ըլլալ՝ եթէ զիրենք առաջնորդելու համար՝ փորձառու մանկապարտիզպանուհիի մը տեւական հսկողութիւնը վայելին: Բայց այդքան կարճատեւ վարժողութենէ մը (apprentissage) յետոյ՝ ինքնագլուխ ձգուելով, տարակոյս չկայ թէ այնպիսի ժեսքեր միայն կրնան ընել, որոնց թաքուն իմաստը, կը խուսափի իրենցմէ:

Եւ թող չկարծուի թէ Մանկապարտէզին մէջ անցուցած տարիները անկարեւոր շրջան մըն են մանուկին կեանքին մէջ և հետեւաբար մանկապարտիզպանուհիներուն ընտրութիւնն ալ բախտին ձգուելիք խնդիր մը: Երբէն ի վեր զանցառութեան տրուելիք բան մը դարձած է հոգիի մը բողբոջումը:

Ահ, ո՛րքան անհետեւողական և խաբէպատիր արարած մըն է մարդ էակը: Մէկը որ, առանց զարհուրելու իր գործելիք սրբապղծութենէն, չպիտի համարձակէր ձեռք երկնցնել հաղորդութեան սկիհին, այն հաւատքով թէ անիկա կերպով մը սրբագործուած է աստուածային ներկայութեամբ, պատրաստ է առաջին հանդիպող ձեռքերուն յանձնելու ամենէն նուիրական այն անօթը, աստուածային խսկութեամբ այն բա-

ժակը, որ իր տղուն հոգին է, անոր սիրտը, անոր իմացականութիւնը: Աններելի՛ թեթեւամտութիւն: Բայց շատ հեռուները կրնանք երթալ մարդկային անհետեւողականութենէն ձառելով: Ըսենք միայն թէ մեզի համար բաղձալի էր դոնէ մէկ-երկու հատ փորձառու և իրենց պարտականութեան բարձրութեան համապատասխանող Մանկապարտիզպանուհիներ տեսնել նուպարեանի մէջ:

Պէ՞տք է հետեցնել թէ կարելի է նուազ դժուարահաճ գտնուիլ նախակրթարանի ուսուցիչներու ընտրութեան մէջ, որոնց ձեռքին տակ պիտի դաստիարակուին 9—14 տարեկան մանուկներ: Ի հարկէ ոչ, երբ կը խորհինք թէ մանուկին մէջ պահուած է ապագայ մարդը և թէ զայն դաստիարակելու ձեռքն է որ մեծ մասամբ կախում ունին անոր գիտութիւնը կամ տգիտութիւնը, առողջ դատողութիւնը կամ թիւր գաղափարները, անոր բարոյական ոյժը և Ֆիզիքական առողջութիւնը, և թերեւս նոյնիսկ անոր կեանքը կամ մահը:

Անկախաբար բոլոր այս նկատողութիւններէն, նուպարեան վարժարանը Գահիրէի մէջ կատարելիք ուրիշ առաքելութիւն մ'ունի. նա ջանալու է իրեն հետ կապել կարելի եղածին չափ ստուար թուով աշակերտներ մեր ժողովրդի այն դասակարգէն, որ պատուաստ է արագօրէն բաժնուելու Ազգին մայր հատուածէն: Ահա թէ ինչո՛ւ ջերմօրէն կը փափաքինք որ այդ վարժարանին Պատ. Հոգաբարձութիւնը աշխատի

բարձրացնել անոր մակարդակը՝ պաշտօնի կոչելով տաղանդաւոր ուսուցիչներու ամբողջ խումբ մը :


Գուցէ Հոգաբարձութիւնն առարկէ թէ մեր դիտողութիւններուն պէտք չունէր այսքան տարրական ճշմարտութիւն մը հասկնալու համար, թէ ինքն ալ կը սնուցանէ այդ բաղձանքները, բայց դրամական միջոցները թոյլ չեն տար որ ուսուցիչներու ընտրեալ խմբակով մը օժտէ վարժարանը :

Մեզի կը թուի թէ քանի մը ներքին բարեկարգութիւններ բաւական են դրամական դժուարութիւններն հարթելու համար :

Ա. Նուպարեանը 16 ուսուցիչ կը պահէ 200 աշակերտի համար, ինչ որ շատ է : Առնուազն 6—7 հոգիի ներկայութիւնն աւելորդ է այնտեղ : Ինչո՞ւ չպակսեցնել այս թիւը . այս կերպով կարելի է կարեւոր խնայողութիւն մը ձեռք բերել և պաշտօնի հրաւիրել աւելի բարձր ամսականներով, բայց աւելի անաչառօրէն ընտրուած ուսուցիչներու փոքրաթիւ խումբ մը :

Բ. Նուպարեան վարժարանը պէտք է հրաժարի Բարձրագոյն Նախակրթարանի իր յաւակնոտութիւններէն և դառնայ ընտիր և կատարեալ Նախակրթարան մը՝ իր տիպար Մանկապարտէզով : Արդարև, առանց ո և է անպատեհութեան, կրնայ ջնջել բարձրագոյն դասարանները և անոնց աշակերտները — որոնք անշշան թիւ մը միայն կը ներկայացնեն — յանձնել Գալուստեանի կամ Պէրպէրեանի՝ որպէս զի իրենց ուսումը շարունակեն :

Նուպարեանը կրնայ իր տեսակին մէջ տիպար վարժարան մը դառնալ, եթէ անոր Պատ. Հոգաբարձութիւնը իր խնամքներուն յանձնուած կրթական այդ հիմնարկութիւնը այս խոհական սահմաններուն մէջ դնելու և անոր ճակատագիրը ուսուցչական ընտիր խումբի մը վստահելու իմաստութիւնն ունենայ :



Դ.

### ԿՐԹԱԿԱՆ ԲԱՐԵԿԱՐԳՈՒԹԻՒՆՆԵՐ

Այս է ահա եգիպտոսի, այսինքն մեր ամենէն հին և ամենէն աւելի բարեկեցիկ գաղութներէն մէկուն ազգային վարժարաններու ֆիզիքական ու բարոյական պատկերը, զոր ջանացիւնք ներկայացնել կարելի եղածին չափ հաւատարիմ կերպով: Քիչ մը աւելի շեշտեցէք այդ պատկերին ընդհանուր գիծերը ու այն ատեն դիւրաւ կրնաք հասկնալ թէ ինչպիսի վիճակ մը կը ներկայացնեն մեր վարժարանները գաղութականական այն կեդրոններուն մէջ, ուր մեծ մասամբ աղքատ ու տգէտ տարագրեալներէ բաղկացած մեր ժողովուրդը, սպառիչ աշխատութիւններու բեռին տակ ճգմուած և օրուան հացը ճարելու անտեղիտալի մտահոգութիւններէն կլանուած, կազմակերպուելու ոչ ժամանակ, ոչ ալ հնարաւորութիւն ունեցաւ տակաւին:

Ամէն Հայ հաւատոյ հանգանակի պէս ընդունուած է սա ճշմարտութիւնը թէ՛ գաղութներու մէջ պէտք է կանգուն պահել մեր վարժարանները ի գին ամէն զոհողութեան, վասն զի ամէն Հայ խորապէս համոզուած է թէ Դպրոցը միակ ապաստանարանն է մեր ազգային կեանքին և թէ ան Եկեղեցիին հետ — ու անկէ աւելի թերեւս, որովհետեւ սկեպտուութեան և ծայրայեղ

ներողամտութեան այս դարուն, Եկեղեցին շատ բան կորսնցուցած է իր ազդեցութենէն — միակ պատնէշն է՝ որ կրնայ դէմ կենալ արտասահմանի մէջ մեզի սպառնացող ճուրման վտանգին...:

Թէ հարկ է բարեկարգել մեր կրթական գործը, անոր մակարդակը բարձրացնելով, որպէս զի մեր վարժարանները կարենան մրցիլ օտարներուն հետ և կարելի եղածին չափ շատ թուով Հայ աշակերտներ կապեն իրենց, այս մասին ալ ու է առարկութիւն ընող չկայ:

Տարակարծութիւնները կը սկսին այն ատեն միայն, երբ պէտք կ'ըլլայ ճշտել իրագործուելիք բարեկարգութեանց ընոյթը և որոշել թէ ինչ ուղղութեամբ պէտք է զարգանան մեր վարժարանները: Այս հարցն է զոր կ'ուզենք մասնաւոր ուշադրութեան առարկայ դարձնել յետագայ էջերուն մէջ:

Շատեր, որոնց մէջ չեն պակսիր դիրքի և ազդեցութեան տէր անհատներ, կ'ուզեն պահել միմիայն պարզ նախակրթարաններ, օժտուած կրթական հիմնադրամներով, որոնց շնորհիւ ազգային նախակրթութիւնն աւարտող լաւագոյն աշակերտները կարենան իրենց ուսումը շարունակել օտար վարժարաններու մէջ:

Անոնք իրենց թէզը կը հիմնեն ուժեղ փաստերու վրայ. «Մեր մէջ, կ'ըսեն, վարժարանները դարձած են մէկ մէկ պատերազմի դաշտեր. անոնք ոչ միայն զուրկ են բարձր լեռներու հովանիին տակ ապաստանած հովիտներու հանդարտիկ կեանքէն, ինչ որ անհրաժեշտ է դպրոցական աշխատութեանց արդիւնա-

ւորման համար, այլ, ընդհակառակն, կը ներկայացընեն ռազմական այն կարեւոր կէտերը՝ որոնց շուրջն է որ կը պայթին ամենէն բուռն փոթորիկները: Այսպէս, ամէն մէկ ընտրութենէ յետոյ՝ վերէն վար կը փոխուի դպրոցին ամբողջ պաշտօնէութիւնը, տնօրէնն ալ մէջը ըլլալով: Տարակոյս չկայ թէ այս փոփոխութիւնը իր յոռի անդրադարձումը կ'ուսենայ դպրոցին ծրագրին, մեթոտին և ոգիին վրայ: Այսպիսի պայմաններու մէջ կատարուած մտաւորական ու բարոյական աշխատութիւնը կը նմանի Պենելոպէի կըտաւին, որ չի կրնար վերջանալ, որովհետեւ մէկուն չինածը անդադար կը քակուի ուրիշի մը կողմէ:

Մեր դպրոցներու խորունկ վէրքերէն մէկն ալ Հոգաբարձուներուն տրուած իրաւասութիւնն է: Անոնք կ'ահաբեկեն Տնօրէնը և ուսուցիչները, որոնք իրենց ճակատագիրը անոնց կամայականութենէն կախուած տեսնելով, կրաւորական հնազանդութիւն մը ցոյց կուտան անոնց բոլոր կարգադրութիւններուն: Եւ այդ իրաւասութիւնն այնքան աւելի աղիտաբեր կը դառնայ, որքան կրթական վերին հսկողութեան կանչուած այս մարմինը գործի գլուխ բերելու համար, խնամով նկատի կ'առնուին բոլոր հաշիւները, բացի այն յարմարութիւններէն, որոնք անհրաժեշտ են այսքան փափուկ պաշտօնի մը համար: Առ հասարակ համալսարանականներ չեն մեր դպրոցական Հոգաբարձուները, ո՛չ իսկ Բարձրագոյն վարժարաններէ վկայեալներ, այլ մասնաւորաբար այնպիսի անձնաւորութիւններ, որոնք ուժ մը կը ներկայացնեն իրենց կուսակցութեան մէջ:

Եւ յաճախ կը հանդիպինք Հոգաբարձուներու, որոնք, այնքան անտեղեակ մանկավարժական հարցերու, որքան, օրինակի համար, տգէտ են Չինացիներու պատմութեան նկատմամբ, դպրոցական ներքին կարգադրութիւններուն միջամուխ ըլլալու իրաւասու կը զգան ինքզինքնին, և կը կտրեն, կը կապեն ու կը կարգադրեն իբրև տէր և տնօրէն: Այս անհարկի միջամտութիւնը պատճառ կ'ըլլայ որ մեր վարժարանները տեսակ մը փորձառութեան դաշտ դառնան նորասէր (amateur) մանկավարժներու, եթէ արդէն իսկ ասպատանարան մը չեն իշխանութեան գլուխը գտնուող կուսակցութեան անգործ անդամներուն համար, ինչպէս որ եղած են յաճախ»:

Նախակրթարաններու այս կողմնակիցները դեռ ուրիշ թունաւոր նետեր ալ ունին իրենց կապարձին մէջ: — «Անկարելի է, կ'ըսեն անոնք, իսկական ուսուցիչներ պաշտօնի կանչել մեր վարժարաններուն ունեցած ազքատիկ պիւտճէով: Տարակոյս չկայ թէ անոնց մէջ կան և ամէն ատեն ալ պիտի գտնուին տաղանդաւոր մարդիկ, բայց այդքանին ներկայութիւնը բուսական չէ բարձրացնելու համար վարժարանի մը մտաւորական մակարդակը, երբ այնտեղ պաշտօնավարող ուսուցիչներէն շատերը պատահական (improvisé) մարդիկ են, մեծ մասամբ հաւաքուած զանազան ասպարէզներէ, երբեմն նոյն իսկ այնպիսի ասպարէզներէ, որոնք ու է առընչութիւն չունին կրթական գործին հետ»:

Պէտք է ընդունիլ թէ ճշմարտութեան մեծ բա-

ժին մը կայ վերի գիտողութիւններուն մէջ: Բայց որքան ալ իրաւացի ըլլան այս քննադատութիւնները, անոնցմէ հանուած եզրակացութիւնը սխալ է՝ ըստ մեզ:

Արդարեւ, ի՞նչ նպատակի համար կը հիմնենք մեր ազգային վարժարանները:

Որպէս զի պատնէշ մը բարձրացուցած ըլլանք ձուլման վտանգին դէմ:

Բայց կրնա՞նք պնդել թէ տպաւորութիւնը, զոր մեր ազգ. մշակոյթը պիտի թողու 12 տարեկան մանուկի մը իմացականութեան և զգացումներուն վրայ, կրնայ այնքան ուժեղ և խորունկ ըլլալ, որ կարենայ գիմադրել բոլոր այն ազգեցողութիւններուն, որոնց վերջէն պիտի ենթարկուի տղան օտար միջավայրի մը մէջ: Ո՞վ չի գիտեր թէ այդ տարիքի տղու մը հոգին կը նմանի ջուրերու յարաշարժ մակարդակին: Փոքրիկ քար մը նետեցէք այնտեղ, իսկոյն կը գոյանայ թեթեւ խորշոմ մը, քիչ մը վերջն անհետանալու համար:

Ընդունինք պահ մը թէ այս պատկերը ճիշդ է և ըսենք, թէ տղուն հոգիին յանձնուած ամէն բան կը նմանի հոգին տակ ճածկուած հատիկներուն: Եթէ ճիշտ է այս երկրորդ տեսակէտը, այն ատեն նոր պարտականութիւններու առջև կը գտնենք ինքզինքնիս, այսինքն թոյլ չտալ որ այդ հատիկները խեղդուին օտար բարձրագոյն մշակոյթի մը աւելի հզօր, աւելի ճապաղուն և հեղձուցիչ սերմերուն տակ: Արդարեւ փոխառութիւնը ցոյց կուտայ թէ ֆրանսական, անգլիական կամ գերմանական վարժարան զըրուած 12 տարեկան մանուկը կամաց կամաց և անըզ-

գալաբար զանցառութեան կուտայ, հետզհետէ կ'արհամարհէ և ի վերջոյ կը մոռնայ ինչ որ սորվեցուցած են իրեն իր մանկութեան ժամանակ, բացի թերեւս իր մայրենի լեզուէն — և դեռ այս ալ կասկածելի է քիչ մը: Մնացած ամէն ինչ, կրօնական, պատմական, դրական յիշատակներ, ցեղային աւանդութիւններու յարուստ, հայրենիքի սէր և անկէ ներշնչուած հպարտութիւն, այս բոլորը շուտով կը ջնջուին օտար բարձրագոյն մշակոյթի մը ազգեցողութիւններուն տակ:

Նախակրթարանի կողմնակիցներուն տեսակէտն ընդունիլ կը նշանակէ ուրեմն մահացու հարուած մը տալ գաղութներու մէջ մեր ազգային մշակոյթին և ազգային կեանքին:

Այս տեսակէտին տրամագծօրէն հակառակ ուրիշ հոսանք մը կը բաղձայ առ հասարակ բարձրացնել մեր Ազգ. վարժարաններուն մակարդակը և Երկրորդական կրթութեան այս կողմնակիցները կ'ուզեն Գօլէճներ ունենալ բոլոր կարեւոր կեդրոններուն մէջ: Ամօ՛ւլ բաղձանքներ և անխորհորդ բացբերաններու յատուկ օգայլէն ծրագրերն են...

Որովհետև, գիտնալով հանգերձ թէ ո՞ր պիտի տալնապ մը կ'անցնեն մեր վարժարանները 1914էն ի վեր, ի՞նչպէս կարելի է պնդել թէ կրնանք Գօլէճներ պահել առանց ուսուցչի, առանց դպրոցական դասագրքի, առանց դրամի: Կատարելապէս անօգուտ բանքերու, առանց դրամի: Կատարելապէս անօգուտ բան է աչքերը գոցել և ականջները խցել աղաղակող իրա-

կանութեան առջև . ո՛չ մասնագէտ ուսուցիչներ ունինք , ո՛չ դասագիրքք , ո՛չ ալ մանաւանդ դրամ : Հետեւաբար այս թէզը ինքնին ջուրը կ'իյնայ : — Ո՞րն է ուրեմն գործնական լուծումը , հարցնէ թերեւս ընթերցողը : Մեզի կը թուի թէ անտեսական ու քաղաքական ներկայ պայմաններուն մէջ — գոնէ 10 տարուան շրջանի մը համար — հետեւեալ ծրագրէն զատ ուրիշ լուծում կարելի չէ առաջարկել : Նախակրթարաններ բանալ բոլոր փոքրիկ կեդրոններուն մէջ , և Բարձրագոյն նախակրթարան մը՝ բոլոր այն գաղութներուն մէջ՝ ուր համախմբուած Հայերուն թիւը 10—15,000 հոգիի կը հասնի :

Այս առաջին շրջանէն վերջն է միայն որ աշխատելու ենք մէկ մէկ Գօլէճով օժտել բոլոր այն քաղաքները՝ ուր 20,000էն աւելի Հայութիւն մը համախմբուած է :

Այսօր խոհեմութիւնը կը պահանջէ որ բոլորս ալ որդեգրենք սա նշանաբանը . «Պահել կարելի եղածին չափ շատ և կարելի եղածին չափ լաւ նախակրթարաններ և Բարձրագոյն նախակրթարաններ» :

Բայց այսպիսի նշանաբան մը իրագործելու համար երկու անհրաժեշտ պայմաններ կան . նախ խնամով մտկել ու պատրաստել նպատակայարմար բարեկարգութեանց ամբողջ ծրագիր մը , յետոյ սեղծել կրթական ընդհանուր Ընկերակցութիւն մը , որպէս զի այս ուղղութեամբ քափուած ճիգերն համակարգէ ու դասաւորէ բոլոր գաղութներուն մէջ :

Թ Ե Լ Ա Դ Բ Ո Ւ Թ Ի Ի Ն Ն Ե Բ  
Կ Բ Թ Ա Կ Ա Ն Բ Ա Բ Ե Կ Ա Բ Գ Ո Ւ Թ Ե Ա Ն Հ Ա Մ Ա Բ

Այս բարեկարգութիւնները կարելի է բաժնել երեք մեծ գլուխներու , իրենց բնոյթին և իրենց ընդգրկած նիւթին համաձայն :

Ա . Բարեկարգել Ուսումնական ծրագիրը :

Բ . Բարեկարգել դպրոցական դասագրքերը :

Գ . Վերակազմել Ուսուցչական մարմինը :

Դ . Եւ վերջապէս՝ հիմնել յրթական Ընդհանուր Ընկերակցութիւն մը :



**ԲԱՐՁՐԱԳՈՅՆ ՆԱԽԱԿԻԹԱՐԱՆՆԵՐՈՒ**

**ԾՐԱԳԻՐԸ**

Եզրիպտահայ երեք ազգային վարժարաններու մէջ ի գործ դրուած ծրագրերը կատարեալ է: Բոլոր կարեւոր նիւթերը իրենց որոշ տեղն ունին անոր մէջ: Բայց ծանրաբեռնուած է: Աշակերտ մը չի կրնար վերջացընել անոր բովանդակութիւնը 7 տարուան մէջ, հետեւաբար — ինչպէս հաստատեցինք Պօղոսեան վարժարանի 1929—30 դպրոցական շրջանի ամալերջի քըննութեանց ատեն — կը հեռանայ վարժարանէն սովորած ըլլալով միմիայն գիտութեան, պատմութեան կամ գրականութեան դասերուն առաջին քանի մը գլուխները:

Ասկէ զատ, անոր իմացականութիւնը չարաչար յոգնելով բռնօրէն իրեն հրամցուած մտաւորական այս անմարսելի սնունդէն, չի կրնար իւրացնել բոլոր այդ ծանօթութիւնները: Ասոր համար է որ դպրոցէն ելելէն յետոյ, իրեն հետ կը տանի կցկտուր ծանօթութիւններու քառասյին խառնակոյտ մը, որուն մէջ ոչինչ կայ որոշ և կատարեալ: Գալով օտար լեզուներուն, աշակերտը անոնցմէ ոչ մէկուն կրնայ տիրանալ. ոչ կրնայ խօսիլ, ոչ կրնայ գրել, ոչ ալ նոյնիսկ դիւրութեամբ հասկնալ: Հարկ է ուրեմն վճռական ըլլալ և առանց մեղքնալու կտրտել այդ ծրագրին բոլոր աւելորդ մասերը, ներդաշնակ և բանաւոր ուղղութիւն

մը տալու համար անոր: Մենք հետեւեալ կրճատումները կ'առաջարկենք զայն թեթեւցնելու համար:

Պէտք է ջնջել.

1. Գրաբարը. Ուսման այս մասը պէտք է վերապահել միմիայն երկրորդական վարժարաններու:

2. Քննական Հայոց Պատմութիւնը. Պէտք է դուրսնալ մի միայն աշակերտներուն ձեռքը տալով պատմութեան նպատակայարմար դասագիրք մը, ոչ այնքան խճողուած, ոչ ալ այնքան խրտչեցուցիչ իր չոր ու ցամաք ոճով, պատրաստուած գիտութեան վերջին տուեալներուն համաձայն ու տաղանդաւոր հեղինակի մը ձեռքով, գիրք մը՝ զոր աշակերտները հաճոյքով թղթատեն և որ կեանքին մէջ ալ հետեւի անոնց բարեկամի մը նման:

3. Հայ Եկեղեցիին պատմութիւնը. Այս նիւթը, փոխանակ մասնաւոր դասի մը առարկայ դառնալու, կրնայ Հայոց Պատմութեան մէկ գլուխին մէջ ամփոփուիլ:

4. Տումարակալութիւնը. Այս ուսուցումը պէտք է մտնէ յետ-դպրոցական դասընթացքի մը մէջ:

5. Աղբիկներու յատուկ Առեցիկ Տնտեսութիւնը և

6. Ձեւագիտութիւնը:

Այս երկու դասերը պէտք է մտնեն յետ-դպրոցական լրացուցիչ դասընթացքի մը մէջ: Այն ատեն միայն այս առարկաները կրնան իրական ծառայութիւն մատուցանել մեր աղջիկներուն, որոնք ազատ ժամանակ պիտի ունենան ինքզինքնին նուիրելու իրենց համար այնքան օգտակար այս ուսմանց:

7. Երկրաբանութիւնը . Այս դասը կրնայ մտնել Աշխարհագրութեան դասին մէջ և անոր մէկ գլուխը կազմել՝ փոխանակ մասնաւոր դասի մը նիւթ դառնալու :

8. Երեք օտար լեզուներէն՝ երկուքը . Օտար լեզուներու ուսուցումը պէտք է սկսիլ 9 կամ 10 տարեկան տղոցմէ . աշակերտը կամ իր ծնողքը պէտք է ընտրեն ծրագրի երեք լեզուներէն մէկը , Արաբերէն , Ֆրանսերէն կամ Անգլերէն :

Աշակերտը 7 տարի շարունակ մէկ լեզուի մէջ մարզուելով կրնայ զայն իւրացնելու հնարաւորութիւնն ունենալ : Եւ մեկ լեզուի կատարեալ իւրացումը աւելի նախընտրելի է իր մտաւորական զարգացման համար և աւելի օգտակար , քան թէ թերի ծանօթութիւնը չորս լեզուներու , մէջն ըլլալով նաև իր մայրենի լեզուն . . . : Բացառիկ պարագաներու մէջ միայն ընդունելու է երկրորդ օտար լեզուի մը ուսուցումը , և այն ալ բացարձակապէս տեղ սկան լեզուն ըլլալու պայմանով :

Պէտք է քաջութիւնն ունենալ մինչև վերջը պայքարելու այն ծիծաղելի դրութեան դէմ , որ կը յաւակնի աշակերտներուն սորվեցնել , և Աստուած միայն գիտէ թէ սրբախի դժուարութեամբ , երեք տարբեր լեզուներ , կամ աւելի ճիշտը հարիւրական բառ իւրաքանչիւր լեզուէ — միշտ միեւնոյն բառերը — զոր վերջէն տղայքը չեն կրնալ քով քովի բերել իրենց մտածումն արտայայտելու և կամ ուրիշներու մտածումն հասկնալու համար :

Ծրագիրը այս կերպով թեթեւցնելէ յետոյ , կարելի է յուսալ թէ աշակերտները պիտի կրնան իւրացնել զայն և իրենց աւանդուած նիւթերը իրապէս սորված ըլլալու անսահման առաւելութիւնը պիտի ունենան կեանքին մէջ :

Ու մի՛ մոռնաք թէ ծրագրի այս փոփոխումներէն քաղուելիք ամենէն մեծ օգուտն այն պիտի ըլլայ որ աշակերտները մասամբ ազատուելով մտաւորական չարաչար յոգնութիւններէ , ժամանակ պիտի գտնեն կարգալու , և թերեւս պիտի կրնան ձեռք բերել — ի մեծ բարեբախտութիւն իրենց — ընթերցանութեան և ինքնաշխատ ուսումնասիրութեան ճաշակը :

Այս միակ բարիքը ինքնին բաւական է արդէն փոխարինելու Անգլերէնի , երկրաբանութեան կամ Գրաբարի մէջ տղոց ունեցած տգիտութիւնը , վասնզի այդ սովորութեան շնորհիւ ամբողջ կեանքին մէջ անոնք պիտի շարունակեն իրենց ինքնակրթութիւնը և օրէ օր աւելի պիտի ճոխացնեն իրենց ծանօթութեանց պաշարը :

Ո և է վարժարան , որ չի յաջողիր իր աշակերտներուն մէջ արմատացնել ընթերցանութեան սովորութիւնը և անձնական ուսումնասիրութեանց ճաշակը , որ չի կրնար արթնցնել անոնց մտաւորական հետաքրքրութիւնը , կը վրիպի իր նպատակէն : Յոռի կրթարան մըն է ան , կէս-տոգէտներու սերմնարան մը , ծնուցիչ բոլոր ծոյլ , սնափառ և ձախողած հողիներուն , որոնք ծայրայեղօրէն վտանգաւոր են և անտանելի :

Քիչ մը պակաս բան սովորեցնենք մեր տղոց , բայց

ջանանք զարգացնել անոնց մէջ սովորելու ընդունակութիւնն ու կարգալու ճաշակը : Այս նպատակին պէտք է ձգտին տաղանդաւոր ուսուցչի մը բոլոր ճիգերը և այս ուղղութեամբ պէտք է բարեփոխուին նաև մեր ուսումնական ծրագրերները :

### Յաւելումներ Դպրոցական Ծրագրին վրայ

1. Մեր աշակերտներուն համար խիստ օգտակար գործ մը ըրած կ'ըլլանք ստեղծելով յետ-դպրոցական դասընթացք մը, մեկ **սարուան** համար, որուն միջոցին աղջիկները հնարաւորութիւն ունենան շաբաթը երեք անգամ, ցերեկէն առաջ, ձեւագիտութեան և առտնին տնտեսութեան, իսկ մանչերը՝ տոմարակալութեան և ուսողութեան դասեր առնելու :

Միւս երեք օրերն ալ, դարձեալ ցերեկէն առաջ, կարելի է յատկացնել օտար լեզուներու : Ասկէ մեծապէս կրնան օգտուիլ այն աշակերտները, որոնք եւրոպական վարժարաններ յաճախելու միջոցներէն զուրկ են : Այս լրացուցիչ դասընթացքը կրնայ խիստ օգտակար դառնալ մեր աշակերտներուն, որոնք այդ մէկ տարուան մէջ պիտի կրնան աւելի բան սովորիլ, քան նախընթաց եօթը տարիներուն միջոցին :

2. Ու նաև քաղաքավարութեան դասեր . . . :

Այո՛, քիչ մը պակաս գիտութիւն, բայց աւելի դաստիարակութիւն ամենէն գովելի բանը պիտի ըլ-

լար մեր վարժարաններուն համար . դաստիարակութիւնը մարդու վարուելակերպին, որ համեմ է ընկերային կեանքին, ու մեր բարոյական նկարագրին համար այն է, ինչ որ է դէմքին գեղեցկութիւնը մարմնին համար, այսինքն ուրիշներու կողմէ լաւ ընդունելութեան արժանանալու վկայական մը և կեանքին մէջ յաջողելու գրաւական . քչիկ մը այն դաստիարակութենէն՝ որուն անունը քաղաքավարութիւն է :

Դժուար է երեւակայել թէ մեր դպրոցականներուն մէջ ո՛րքան պակաս է վարուելակերպի ազնուականութիւնն ու զգացումներու փափկութիւնը, այն քաթք՝ որ հմայք մը կը դնէ ընկերային յարաբերութիւններուն մէջ : Դիւրաբորբոք են անոնք, ցասկոտ, անձըկելի, կոշտ և անտեղիօրէն հպարտ, հպարտութիւն, որ մինչև արհամարհոտութեան կը հասնի, երբեմն ալ այնքան համարձակ, որ կը թերանան ու է նուիրապետութեան առջև իրենց ցոյց տալիք յարգանքին մէջ, ինչ որ տարբեր մէկ ձեւն է արհամարհոտութեան :

Կը կարծեմ թէ խիստ օգտակար ծառայութիւն մը մատուցած կ'ըլլանք մեր մանուկներուն՝ եօթ տարեկանէն սկսեալ քաղաքավարութեան դասեր տալով անոնց : Այս դասերը այնքան կարեւոր իրենց ապագային համար՝ որքան բարոյագիտութիւնը : Աղէկ բան է պատուաւոր մարդ ըլլալ, սիրել կրօնն ու աշխատանքը, բայց այսքանը բաւական չէ : Մէկը կրնայ, այս յատկութիւններն ունենալով հանդերձ, դարձեալ անտանելի ըլլալ, եթէ իր վարուելակերպին մէջ չի դնիր այն իւրը՝ որ կը դիւրացնէ ու կը մեղմացնէ յարաբե-

րութիւնները, և կը կոչուի քաղաքավարութիւն : Տարակոյս չկայ թէ պէտք չէ գոհանալ միմիայն չոր ու ցամաք քաղաքավարութեամբ, որուն նպատակն է սովորեցնել միմիայն այն՝ ինչ որ պէտք չէ ընել, այլ ըսել կ'ուզեմ սրտի և հոգիի այն ազնուական քաղաքավարութիւնը, որ, պարագային համաձայն, կրնայ թելադրել թէ ի՛նչ պէտք է ընել հաճելի ըլլալու և մեր շրջապատին համակրութեան արժանանալու համար : Որովհետեւ քաղաքավարութիւնն ալ Գիտութիւն մըն է — գլխատա՛ն Գո՛վ — և խկապէս փափաքելի էր մեր վարժարաններուն մէջ տեսնել անոր ուսուցումը, որուն պէտքը այնքան Վգալի է մեզի համար :

ՎԵՐԱՔՆՆՈՒԹԻՒՆ ԴՊՐՈՑԱԿԱՆ ԴԱՍԱԳՐՔԵՐՈՒ

Պէտք է որդեգրել միօրինակ ծրագիր մը, որ կարենայ գործադրուիլ Արեւելքի բոլոր մեր Գաղթավայրերու նախակրթարաններուն և Բարձրագոյն Նախակրթարաններուն մէջ :

Այս միօրինակութիւնն անհրաժեշտ է մանաւանդ դպրոցական դասագրքերու վերաքննութեան համար : Առանց անոր, կարելի չէ ձեռնարկել դասագրքերու բարեփոխութեան, բան մը որ այնքան նիւթական զոհողութիւններու պէտք ունի : Տարակոյս չկայ թէ այսպիսի բարեփոխութիւն մը կրնայ իրագործուիլ

միայն համոզումով, համերաշխութեան ու փոխադարձ հասկացողութեան ոգիով և թէ բունի ստիպման խօսքն անգամ չի կրնար ըլլալ այս կարգի խնդիրներու մէջ :

Ըսի ու դարձեալ կը կրկնեմ, մեր դպրոցական գրքերը աննպատակայարմար են, անպէտ, խճողուած և խիստ դժուարըմբռնելի : Ու եթէ երբեմն կը հանդիպինք քանի մը լաւ դասագրքերու, անոնք ալ այնքան ընդարձակ և այնքան մանրամասնուած են որ, ո՛չ մեր նախակրթարաններու պէտքերուն կրնան յարմարիլ, ո՛չ ալ անոնց նեղ շրջանակին մէջ ամփոփուիլ : Ձեռնարկներ չունինք նոյնիսկ ժամանակակից ամենէն կարեւոր ծանօթութիւններուն, գիտութեանց, պատմութեան և աշխարհագրութեան համար : Այս մարզին մէջ պէտք է ծայրէն սկսիլ ամէն ինչ և կամ եղածը ամբողջովին վերակազմել :

Կրթական բարեկարգութեանց մէջ ամենէն աւելի դրամական զոհողութիւն պահանջող մասն է այս : Բայց նախնական դրամագլուխ մը հայթայթելէ յետոյ՝ հարցը կը դիւրանայ, վասն զի դրամը ի վուր չպիտի վատնուի և գրքերու վաճառումէն գոյանալիք հասոյթը, գոնէ մեծ մասամբ, պիտի կրնայ գոցել այս մասին եղած ծախքերը :

Մանաւանդ որ կարելի է որդեգրել հետեւեալ ձեւը՝ որ խիստ խնայողական ըլլալու առաւելութիւնը կը ներկայացնէ :

Սովորութիւն եղած է տարեկան 8—10 գիրք տալ ամէն մէկ աշակերտի ձեռքը, ինչ որ ցոյց կուտայ թէ իւրաքանչիւր դպրոցական 50—60 հատ գիրք կը գոր-

ծածէ իր ամբողջ ուսանողութեան շրջանին: Կարելի է վերցնել կրկնաբանութիւններով խճողուած բոլոր այդ գրքերը և անոց տեղ աշակերտներուն տալ երկու շարքերէ բաղկացած ուրիշ գրքեր, ամէն մէկ շարքը երեք տարուան դասընթացքի համար, առաջինը 9-էն մինչև 13 տարեկաններու, իսկ երկրորդը 13-էն 16 տարեկաններու յատուկ: Այս գրքերէն իւրաքանչիւրը ուսման երեք տարիներուն համապատասխանող երեք մեծ բաժանումներ ունենալու է:

Ինչպէս ըսինք, այս դրութիւնն ունի շատ մը առաւելութիւններ, որոնց մէջ կարեւոր տեղ մը կը բռնէ դրամական խնայողութիւնը:

Դպրոցական դասագրքերու վերաքննութիւնն ու խմբագրութիւնը չափազանց փափուկ գործ մըն է և հմտութեան, փորձառութեան մեթոտի, ճաշակի և մանաւանդ գործնական ոգիի կը կարօտի: Ասկէ զատ, կրթական բարեկարգութիւններուն մէջ առաջնակարգ տեղ մը կը գրաւէ ան, որովհետև, եթէ յարմար դասագրքեր ունենայինք, մեր վարժարանները ապահովաբար այսօրուընէ շատ աւելի բարձր արդիւնքներ պիտի կրնային տալ նոյնիսկ իրենց ներկայ ուսուցչական կազմին միջոցաւ:

Բայց ստիպուած եմ գոհանալ միմիայն անցողակի պարզելով գաղափար մը, զոր շատ աւելի կարելի էր ընդլայնել և որուն մանրամասն բացատրութիւնը պիտի կրնար ամբողջ հատորի մը նիւթ մատակարարել:

### ՈՒՍՈՒՑՁԱԿԱՆ ՄԱՐՄԻՆ

Ասպարէզին համար պատրաստուած ուսուցիչներ չունինք, կամ աւելի ճիշտը, եղածները խիստ աննշան թիւ մը կը ներկայացնեն: Եւ կրնա՞ր միթէ ուրիշ կերպ ըլլալ: Մեր մէջ չկայ ասպարէզ մը — բացի գրականութենէն — որ ուսուցչութեան չափ ապեւրականութենէն — որ խոստմնալից տաղանդները վհատեցնելով՝ ուժացնելու ընդունակ ըլլայ: Աւելորդ է ըսել թէ կարող ուսուցիչներ ունենալու համար՝ պէտք է նախ հրապուրիչ դարձնել ասպարէզը, որպէս զի կարելի ըլլայ անոր հետ կապել ու հոն պահել բոլոր անոնք, որոնք օժտուած են դաստիարակչական տաղանդով: Մեր առաջին պարտականութիւնն է ուսուցչին բարոյական և նիւթական պայմանները բարելաւել:

### Բարոյական պայմաններ

Ինչո՞ւ համար ուսուցիչը, ուրիշ ամէն պաշտօնեայի նման, չկարենայ վայելել հոգիի այն անվրդով խաղաղութիւնը, զոր ապագայի ապահովութիւնը կը պարգեւէ մարդուս:

Ինչո՞ւ համար ուսուցիչ մը, ու է է վարժարանի մէջ երկու տարի փորձուելէ յետոյ, հինգական տարիէն վերանորոգելի պայմանագրութիւն մը կնքելու իրաւունք չունենայ:

Ինչո՞ւ ուսուցիչը չընտրուի և կախում չունենայ միմիայն վարժարանին Տնօրէնութենէն, փոխանակ գուրսէն պարտադրուելու, և ինչո՞ւ, ի հարկին, պաշտօնանկ չըլլայ նոյն այդ Տնօրէնութեան կողմէ, քանի որ այս վերջինը միայն կրնայ գնահատել անոր աշխատութեան որակն ու արդիւնքը:

Եւ ինչո՞ւ վարժարանի մը մթնոլորտը թունաւորուած ըլլայ այն անվստահութեամբ՝ զոր վերոգրեալ սովորութիւնները կրնան ծնուցանել:

### Նիւթական պայմաններ

Ա. Ինչո՞ւ ուսուցիչներուն ամսականները չվճարուին կանոնաւորաբար: Ինչո՞ւ համար պարտքով և փոխառութեամբ ապրելու ստիպուած ըլլան անոնք: Ինչո՞ւ համար իրենց առնելիքը մուրացկանի ձեւով գանձելու տուայտանքը կը պարտադրուի անոնց: Ինչո՞ւ ամսականները կը վճարուին կտոր կտոր — փըշրանքներ, որոնք կը հալին անոնց ձեռքին մէջ, առանց անդորրութիւն ստեղծելու իրենց մտքին, և բարեկեցութիւն՝ իրենց ընտանիքին մէջ:

Բ. Ինչո՞ւ ուսուցիչներուն մեծագոյն մասը վարձատրել բացարձակապէս ողորմելի ամսականներով: Օրինակ կ'ուզէք. սկսնակ վարժուհի մը գործի կը կանչուի 2 կամ 3 ոսկի ամսականով, Եգիպտոսի մէջ պարզ ծառայի մը ստացած գումարը — և մի՛ մոռնաք թէ այս վերջինը բնակարանի և սնունդի հոգերէն ազատ ըլլալէ զատ, զերծ է նաև հագուստեղէնի

այն ծախքերէն, զորս վարժուհին պարտաւորուած է ընել իր պաշտօնին պահանջներուն հպատակելով:

Այր ուսուցիչներուն վիճակը քիչ շատ տանելի է է նորէն, որովհետև հոս ալ, ինչպէս բոլոր ասպարէզներուն մէջ, այրերը առանձնաշնորհեալներ են. միջին հաշուով 8—12 ոսկի ամսական կը ստանան անոնք և կրնան օր մը մինչև 18 ոսկիով վարձատրուելու յոյսը սնուցանել, մինչ վարժուհին, 20 տարիներու ծառայութենէ մը յետոյ, կը շարունակէ չարչրկուել խեղճ ու կրակ վճարումով մը, որուն ամսական գումարը 6—8 ոսկիէն անդին չանցնիր գրեթէ:

Եւ ի՞նչ կրնայ ընել միջին հաշուով ամսական 8—10 ոսկի ստացող ուսուցիչ մը, եթէ ամուսնացած է և զաւակներու հայր. ո՞րքան անուշ կեանք մը ապրելու, ո՞րպիսի անպատմելի զրկանքներ կրելու դատապարտուած է ան իր ընտանիքին հետ:

Մարդս ինքը արեւ ունենալու է իր հոգիին մէջ, որպէս զի կարենայ ապրիլ մանուկներուն հետ և զանոնք կրթելով հանդերձ, անոնց ներշնչել կեանքի ճաշակն ու սէրը, անոնց փոխանցել պաշտամունքը արիւթեան, աշխուժութեան և զուարթ տրամադրութեան, որ բարոյական թաքուն ոյժերու արտացոլումն է, անոնց ճառագայթումը դէմքերուն վրայ:

Բայց կը հարցնեմ. կրնա՞յ արդեօք իր հոգիին մէջ արև ունենալ այնպիսի մէկը, որ ամէն մէկ ուսումնական շրջանէ յետոյ, գալիք տարուան անապահովութենէն կը տառապի, որ ամէն կողմէ շրջապատուած է անստուգութեամբ, որ իր ընտանիքէն ներս ու

իր շուրջը չի կրնար նկատել բարեկեցութեան ու գեղեցկութեան այն նուազագոյն չափը, որ կեանքին մէջ օրուան հացին չափ անհրաժեշտ է ու է մտաւորականի համար :

Ուսուցիչները կը մեղադրենք, և իրաւամբ, իրենց մտքի ծուլութեան, մտաւորական այն տեսակ մը լճացումին համար, որ կը կաշկանդէ ամէն յառաջգիւմութիւն : Այո՛, բայց յառաջգիւմութիւնը կը բացակայի հոն, ուր խթանող ոյժ չկայ : Պաշտօնի բարձրացումները հազուադէպ են, տարակուսելի և յաճախ արդիւնք այնպիսի նկատումներու, որոնք հեռի են ուսուցչին եռանդը քաջալերելէ. պաշտպանութիւն (favoritisme) և նեպոթիզմ, ահա՛ գլխաւոր գործօնները այս մարզին մէջ : Ու երեւակայեցէ՛ք որ բերանացի չոր գնահատումներն անգամ կը զլացուին ուսուցիչներուն . . . :

Այն ատեն ինչո՞ւ զարմանալ եթէ կամքը կը ջըլատուի անոնց մէջ ու միտքը կը քնանայ. եթէ անտարբեր կը մնան, գործին չեն փարիւր և ինքզինքնին կուտան տեսակ մը չարաշուք «maléchisme»-ի (\*), որ վնասակար է ոչ միայն իրենց անձին, այլ մանաւանդ կրթական գործին յառաջգիւմութեան :

Այս վիճակին միակ դարմանը խթանող ոյժերու անհրաժեշտ ներկայութիւնն է մեր վարժարաններէն ներս :

(\*) Արաբերէն մալէօ բառէն, որ կը նշանակէ «հոգ չէ, այդպէս ալ կրնայ ըլլալ» :

«Պիւտճէն չի ներեր» . ահա այն պատրաստի բանածելը զոր պիտի հոլովեն մեր Պաշտօնական Մարմինները, ուսուցչական անբաւարար վճարումներն ու այնքան հազուադէպ յաւելումներն արգարացնելու համար : Բայց կրնա՞նք միթէ համոզիչ փաստ մը նկատել այս առարկութիւնը : Ո՛չ, բնաւ երբէք չենք կրնար ընդունիլ որ ուսուցիչը դատապարտուած ըլլայ ամբողջ գաղութի մը պարտազանցութեան բեռը շարկելու (souffre - douleur) մի միայն անոր համար որ ուսուցիչ է : Արդարև ի՞նչ իրաւունքով այնքան նուիրում և զոհաբերութիւն կը պահանջենք իրմէն, երբ կը տեսնենք թէ իր շուրջը ամէն մարդ կը թերանայ իր քաղաքացիական պարտականութիւններուն մէջ :

Հայ ծնողը ամենէն առաջ, այն ծնողը, որ պատրաստ է ամսական 100—200 եգ. դահեկան վճարել երբ իր զաւակը օտար վարժարան կը զրկէ, բայց բարձրածայն կը բողոքէ, սարէն ձորէն հսկար ու մէկ առարկութիւններ կը բերէ՝ երբ առ նուազն 10 դահեկան կը պահանջուի իրմէ ազգային վարժարանին համար : Պէտք չէ՞ որ զոհաբերութեան առաջին օրինակը ծնողները տան, որպէս զի վերջէն իրաւունք ունենան միեւնոյն բանը պահանջելու անոնցմէ, որոնց յանձնած են իրենց զաւակներուն դատտիրակութիւնը :

Եւ ինչո՞ւ ամբողջ գաղութը առ հասարակ կը թերանայ իր քաղաքացիական պարտականութիւններու մէջ : Ինչո՞ւ համար կ'ուզէ ապրիլ անցեալի հաշույն և պատրաստ դրամագլուխի մը վրայ կռթնած : Արդի սերունդը ու է պարտականութիւն չունի՞ արդեօք

այս տեսակէտով: Ինչո՞ւ կանոնաւորաբար չգանձել ազգային տուրքը և չբարձրացնել անոր քանակը:

Հասարակութիւնը պիտի բողոքէ՞ . . .

Բայց օրուան իշխանաւորները պէ՞տք է որ սարսափ զգան այս հեռապատկերէն: Ընդհակառակն անոնց պարտականութիւնն է դաստիարակել հասարակութիւնը և անոր մէջ արմատացնել կարգ մը սկզբունքներ, որոնցմէ ամենէն կարեւորը հետեւեալն է. «Չկայ իրաւունք առանց համապատասխան պարտականութիւններու»:

Կրնան գոյնաւորութիւններ ծագիլ այս սկզբունքի գործադրութեան առթիւ. իշխանութիւնները պարտաւոր են արիւթեամբ կուրծք տալ անոնց, շարունակ ի մտի ունենալով թէ ընդդիմադիր կողմը իր ոյժը կը ստանայ վարիչներու քուլուքեցնէն ամեն տեղ եւ ամեն ժամանակ:

Վարժարանը կրնայ իր պիւտճէն հաւասարակչուել և Ազգ. Իշխանութիւնները կրնան աւելի արդիւնաւոր կերպով կատարել իրենց պարտականութիւնները, եթէ ծնողները աւելի լայն չափերով մասնակցին դպրոցական ծախքերուն և ազգային տուրքի բաշխումը աւելի արդար և աւելի սեղմ հիմերու վրայ դրուելով, աւելի բանաւոր միջոցներ ստեղծուին զայն գանձելու համար:

Վերջապէս, չմոռնանք աւելցնել թէ կարելի է որոշ խնայողութիւններ կատարել նոյնիսկ վարժարաններու սեմէն ներս և այս կերպով աւելի լաւ վարձատրել մեր ուսուցիչները:

Ոչ ոքի համար գաղտնիք է թէ ուսուցիչներու թիւը աւելի է ըլլայ Պօղոսեանի, ըլլայ Գալուստեանի, ըլլայ Նուպարեանի մէջ:

Սովորութիւն եղած է մեր մէջ ազգ. վարժարանները նկատել տեսակ մը անգործներու ապաստանարան, մտաւորականներ պատսպարող տեսակ մը բարեգործական հիմնարկութիւն: Աններելի՛ սխալ: Ընդհակառակն, պէտք է համոզուինք թէ հոգիներու և իմացականութեանց աշխատանոց մըն է Դպրոցը, Հոգիի սրբարան մը: Այնտեղ գործ ունենալու են միայն անոնք՝ որոնց ներկայութիւնն իսկապէս անհրաժեշտ է վարժարանին յարատեւութեան և բարւոք գործանութեան համար:

### Նաեւ ՏՅօրէնները

Ուրիշ է Տնօրէններուն վիճակուած մարտիրոսութիւնը, բայց մի՛ շտ մարտիրոսութիւն: Անոնք խաղալիկներ դարձած են Հոգաբարձութեան կամայականութեանց. անհաճոյ ըլլալու վախը թոյլ չի տար որ ու է նոր ձեռնարկ ընեն, ու է բարեփոխութիւն մտցնեն վարժարանէն ներս: Եւ գոյնաւորութիւնն հոն է որ շարունակ վախնալով ու շարունակ հնազանդելով՝ վերջի վերջոյ վրայ կուտան իրենց կորովը, անհատականութիւնն ու նախաձեռնութեան ոգին: Միւս կողմէ, զրկուած ըլլալով իրենց պայմանագրութիւնը վերանորոգելու ստուգութենէն, կը վարանին ու է երկարաշունչ ծրագրի առջև, «Ի՞նչ բանի պիտի ծառայէ» ըսելով: Վհատութիւնը սանձ կը գնէ իրենց եռանդին

և պատճառ կը դառնայ որ ետ կենան իրենց բոլոր բարի գիտաւորութիւններէն :

Չմտնանք աւելցնել թէ անոնք պարտաւոր են աշխատիլ դուրսէն իրենց պարտադրուած գործակիցներու հետ, որոնց վրայ ու է ազգեցութիւն չունին : Հետեւաբար ինքզինքնին կաշկանդուած կը զգան ու չեն կրնար ի գործ դնել իրենց իրաւասութիւնն այնպէս ինչպէս որ պէտք է : Ասոր համար է որ յաճախ զպրօցը մեր մէջ եղած է մարմին մը, որ գլուխ չունի :

Անգլո՛ւխ մարմին . . . :

Բայց ո՞վ է յանցաւորը : Տարակոյս չկայ թէ վերոգրեալ մեթոտները, ոտնձգութիւնները, զեղծումները, վերջապէս մեր անիշխանական մտայնութիւնը :

Եւ վստահ ըլլալու ենք թէ առանց այդ մտայնութիւնը փոխելու, չենք կրնար որ և է լուրջ վերանորոգութիւն իրագործել մեր կրթական մարզին մէջ և չենք կրնար յուսալ որ զգալաբար բարձրանայ մեր Ազգային վարժարաններուն մակարդակը :

«Մտայնութեան վերանորոգութիւն», տակաւին ո՛չ մէկ կանխանչան այդ մասին . . . Եւ սակայն գոնէ անոր ժամանումը փութացնելու գիտաւորութեամբ, մեր անիշխանական բարքերը քննադատելէ յետոյ, փորձենք ուրուագծել յատկազօծ մը մեր ուսուցչական մարմնի վերակազմութեան համար :

Եւ նախ լուսաբանենք կարգ մը հարցեր, որոնք կրնան ապագային ուղեցոյցի (jalon) դեր կատարել մեր անցնելիք ճամբաներուն վրայ :

Մեր գաղթաւայրերու ներկայ նիւթական ու բարոյական կացութեան մէջ և մեր կրթական գործին տաքնապի այս օրերուն, կարելի՞ է օգտակար գործ մը նկատել Վարժապետանոցներու ստեղծումը :

Մեր պատասխանը վճռականօրէն ժխտական է այս մասին, վասն զի այդ վարժարանները իրենցմէ սպասուած արդիւնքը տալու համար, մասնագէտ ուսուցիչներու և շատ դրամի կը կարօտին . իսկ մենք ո՛չ դրամ ունինք, ո՛չ ալ մասնագէտ ուսուցիչներ : Հետեւաբար խոհեմութիւնը կը պահանջէ չփորձել ձեռնարկ մը, որ ողբալի ձախողուածք մը միայն ըլլալու սահմանուած է :

Մեր կարծիքով, այս խիստ ստիպողական հարցը լուծելու համար, կարելի է դիմել հետեւեալ գործնական միջոցներուն, որոնք ժամանակի ու դրամի տեսակէտով ալ մեծ խնայողութիւն մը կը ներկայացնեն :

Ստեղծել ուսուցման երկու տարբեր աստիճաններուն համապատասխանող ֆօնտեր :

### Ա. Դասակարգ

Այդ ֆօնտերուն միջոցաւ հնարաւորութիւն տալ Բարձրագոյն Նախակրթարաններու խոստմնալից աշակերտներուն որպէս զի իրենց ուսումը շարունակեն Ազգային Երկրորդական վարժարաններու մէջ — Եւրոպայի համար՝ Մուրատ-Ռաֆայէլեան, Եգիպտոսի համար՝ Պէրպէրեան, Պոլսոյ համար՝ Կեդրոնական : Իսկ այն կարեւոր կեդրոններուն մէջ, ուր այս կարգի վար-

ժարաններ չունինք, աշակերտներ պահել Եւրոպական ֆուէճներու մէջ, մինչև պսակաւորի աստիճանը:

Այս կարգադրութիւնը կը ներկայացնէ շատ մը առաւելութիւններ, որոնցմէ քանի մը կարեւորագոյնները նշանակենք հոս: 1. Անմիջապէս գործադրելի է, 2. կրնայ նպաստաւորել մեր երկրորդական վարժարանները, 3. և ամենէն մեծ առաւելութիւնը, մեր երկու սեռի երիտասարդները իրենց ընտանիքէն հեռացնելու անպատեհութիւնը չունի, 4. որոշ չափով մը կրնանք օգտուիլ այս նպատակին համար արդէն իսկ գոյութիւն ունեցող ֆօնտերէն:

### Բ. Դասակարգ

Տրամագրել ուսանողական ուրիշ ֆօնտ մը, որուն միջոցաւ պսակաւոր մը հնարաւորութիւն ունենայ Եւրոպական վարժապետանոց մը յաճախելու և հոն մասնագիտական կրթութիւն ձեռք բերելու:

Այս նախագիծը գրամական մեծ գոհողութիւն չի պահանջեր և միջոց կուտայ ինքնաբերաբար կարգի դնելու ուսանողներու թիւը և յարմարցնելու զայն ըլլայ վայրկեանի պահանջներուն, ըլլայ տրամագրելի գրամագլուխի կարեւորութեան:

### ԿՐԹԱԿԱՆ ԸՆԴՀԱՆՈՒՐ ՄԻՈՒԹԻՒՆ ՄԸ

Կարելի չէ մեր մէջ կրթական վերանորոգութեան խօսքն ընել, առանց կանխաւ նկատի ունենալու Կրթական Ընդհանուր Միութեան մը կազմակերպումը, որուն գործը ըլլար վարել այդ շարժումը և նիւթապէս ապահովել անոր յարատեւութիւնը: Եւ ասոր համար անհրաժեշտ չէ որ բոլորովին նոր Միութիւն մը ստեղծուի: Ընդհակառակն փափաքելի էր որ Հ. Բ. Ը. Միութեան ծոցին մէջ կազմուէր Կրթական Յանձնախումբ մը, որուն մասնակցէին յիշեալ Միութեան Պատուիրակները և կրթական գործէն հասկցող մասնագէտներ:

Կը սիրենք յուսալ թէ Հ. Բ. Ը. Միութիւնը պիտի ուզէ հովանաւորել այսպիսի շարժում մը, վասն զի, ինչպէս կը հասկցուի վերջերս հրատարակութեան տրուած իր ծրագրէն, կրթական հարցը առաջնակարգ տեղ մը կը գրաւէ իր մտահոգութիւններուն մէջ: Եւ բնական է որ այսպէս ըլլար: Պատերազմի միջոցին, և անկէ վերջն ալ, պարագաները կը պահանջէին որ Միութիւնը իր բովանդակ ուշադրութիւնը կեդրոնացնէր նպաստներու գործին վրայ և այս տեսակէտով կարելի չէ ուրանալ Ազգին մատուցած իր խիստ գնահատելի ծառայութիւնները: Բայց այդ ժամանակներն անցած են այլեւս: Բարեգործականը չի կրնար շարունակ միեւնոյն շրջանակին մէջ դառնալ և իր գործունէու-

Թիւնը սահմանափակել անդադար նպաստներ քուէարկելով երբեմն գաղթականական կայանի մը, երբեմն դպրոցի մը, երբեմն ալ հիւանդանոցի մը համար: Ու է ընկերային մարմինն անդարմանելի հիւանդ մը չէ և տրամաբանութեան հակառակ է միշտ անոր սնարին վերև սպասել, ինչպէս հիւանդապահը կը սպասէ անդամալոյծին սնարին քով: Անհատներուն և ընկերութիւններուն օգտակարապէս ծառայելու մէկ միջոց միայն կայ, այն է գործի մղել, կեանքի պայքարին համար պատրաստել զանոնք, և պատրաստել այն ձեւով որ կարենան օր մը ինքնաբաւ դառնալ: Արդ, քաղաքակրթութեան ներկայ պայմաններուն մէջ, կըրթութիւնն ու գաստիարակութիւնն են միայն որ կըրնան անկախ ու բարձրագոյն կեանք մը ապահովել մարդոց: Բարեգործականը, որուն ամենամեծ փափաքը եղած է ծառայել հայրենիքի գերագոյն շահերուն, ասկէ աւելի լաւ առիթ մը չպիտի ունենար իր աշխատակցութեան բաժինը բերելու համար գերազանցապէս օգտակար գործի մը: Որովհետև առանց վարանելու կրնանք պնդել թէ Ազգին համար շատ աւելի գնահատելի ծառայութիւն մը մատուցած կ'ըլլանք մտքերու բարձրացման աշխատելով՝ քան թէ Սուրբոյ մէջ գաղթականներ տեղաւորելու ալլապէս բազմօգուտ գործին նպաստելով:

Արդարև, Հայը իր աշխատասիրութեան և յամառ յարատեւութեան, իր անընկճելի կորովին և զմայելի տոկոնութեան շնորհիւ՝ պիտի յաջողի միշտ յաղթել նիւթական ամէն կարգի գժուարութիւններու, նոյնիսկ

երբ առանձին է և ինքն իր գլխուն ձգուած, միայն այս վերջին պարագային քիչ մը աւելի դանդաղ և աւելի նեղութիւններ կրելով: Իր պատմութիւնը լեցուն է զարմանալի յաջողութիւններու հարիւրաւոր օրինակներով: Նոյն իսկ այսօր մեր աչքերուն առջև հրաշքներ կը գործէ ան և կը յաղթանակէ հոն, ուր ուրիշներ պիտի ընկճուէին: Հետեւաբար ապահով ենք թէ նա կրնայ վերստին ձեռք բերել իր նիւթական բարեկեցութիւնը իր սեփական միջոցներով: Բայց ընդհանուր օգտակարութիւն ներկայացնող ձեռնարկներ կան, որոնք իրենց լայն տարողութեամբը, անհատական կարողութիւններու սահմանէն անդին կ'անցնին: Մեր կրթական գործին վերանորոգութիւնն անոնցմէ մէկն է: Կրթական Ընդհանուր Միութիւն մը միայն մէկն է: Կրթական Ընդհանուր Միութիւն մը միայն կրնայ այդ տեսակ պարտականութեան մը բեռին տակ ինչո՞ւ մեզի համար փափաքելի է որ Բարեգործականն ստանձնէ Արեւելքի մէջ մեր դպրոցներու վերակազմութեան նախաձեռնութիւնն ու ղեկավարութիւնը: Միայն ան է որ պիտի կրնայ իբրև միութեան գիծ ծառայել մեր գաղութներուն միջեւ, համախմբելով ու դասաւորելով անոնց բոլորին ճիգերը:

Տարակոյս չկայ թէ մեր մտքէն չանցնիր Կրթական նախարարութեան մը դերը վերագրել Բարեգործականին և անկէ պահանջել այնպիսի գործեր, որոնք պետական պաշտօնատան մը միայն յատուկ ըլլալով, վեր կը մնան իր կարողութեան սահմաններէն: Բոլորս վեր կը մնան իր կարողութեան սահմաններէն: Բոլորս ալ գիտենք թէ իր միջոցները սահմանափակ են և թէ

հայկական կեդրոններէ խիստ հեռու ինկած ըլլալով իրեն համար դժուար է իրական հակակշիռ մը բանեցընել Բարիզէն հազարաւոր մղոններով հեռուները տարտղնուած մեր վարժարաններուն վրայ: Բայց Բարեգործականը կրնայ ընել կարգ մը բաներ, զորս իրաւունք ունինք իրմէ սպասելու: Նա կրնայ, օրինակի համար.

Ա. Կրթական առաքելութիւն մը զրկել Գաղթավայրերը — կամ տեղւոյն վրայ կազմել այդպիսի մարմին մը իրենց մանկավարժական հմտութեամբը ծանօթ անձնաւորութիւններէ — Ազգային և անհատական վարժարաններուն կացութիւնը քննելու և մեր կրթական գործին իսկական վիճակն ու պէտքերը հասկնալու համար:

Բ. Հանրութեան ուշագրութիւնը կրթական գործին վրայ կեդրոնացնելու համար՝ ուժեղ բրոքականտ մղել դպրոցական հարցերու շուրջ մամուլի և ուրիշ զանազան միջոցներով:

Գ. Բանակցութիւններ մշակել իւրաքանչիւր Գաղթավայրի Իշխանութիւններուն հետ, որպէսզի կարելի ըլլայ միօրինակութիւն ստեղծել մեր վարժարաններու ծրագիրներուն մէջ:

Դ. Հովանաւորել դպրոցական դասագրքերը վերաքննելու և տպագրելու գործը և այս առթիւ առաջին անհրաժեշտ հիմնադրամը տրամադրել:

Ե. Աւելի մեթոտիկ և աւելի բանաւոր հիմերու վրայ դնել աղքատիկ դպրոցներուն դրամական նպաստներ յատկացնելու գործը:

Զ. Կազմակերպել քննիչուի գրութիւն մը, նշանակելով երկու կամ երեք վերին հսկողներ (inspecteur) և պաշտօն տալով անոնց, գոնէ տարին մէկ անգամ այցելել բոլոր այն վարժարանները՝ որոնք կը գտնուին Բարեգործական Միութեան հովանաւորութեան տակ:

Իսկ եթէ Բարեգործականն ուզէ խուսափիլ այս պարտականութիւններէն, այն ատեն վեհափառ Տէր Սահակ և Շնորհազարգ Տէր Բարկէն Կաթողիկոսներուն կը մնայ կեանքի կանչել կրթական Ընդհանուր Միութիւն մը և հովանաւորել գործ մը, որուն վիճակուած է փրկել մեր ազգային կեանքը արտասահմանի մէջ և որ միայն կրնայ նպաստել մեր գաղթականներու նիւթական, բարոյական և մտաւորական բարգաւաճման:

ԴՐԱՄԱԿԱՆ ՄԻՋՈՑՆԵՐ

Այսպիսի ձեռնարկ մը պրեցնելու համար դրամական անհրաժեշտ միջոցներու պակասը այն մեծագոյն դժուարութիւնն է, որուն առջեւ շուարած կանգ պիտի առնեն, որպէս Հիմալայեան անանցանելի պատնէշներու առջեւ, և՛ Բարեգործականը, և՛ Կիլիկիոյ Կաթողիկոսները, բարոյական այս երկու հեղինակութիւնները, որոնք միայն կրնան իրականացնել գերազանցապէս օգտակար այս գործը:

Մենք, սակայն, այնքան ալ յուետես չենք: Գրամի պահասը չէ որ վախ կ'ազդէ մեզի, այլ նախածեռնութեան, մեթոտի, յարատեւութեան չգոյութիւնը, և մանանդ «ալա թուրքա» մտածելու և գործելու այն կերպերը, որոնց հետեւանքով բոլոր մեր գործերը կը կազան ողբալիօրէն և կամ կը վիժին նոյնիսկ իրենց ծննդեան վաղորդայնին:

— Եւ ուրի՞ց դրամ, պիտի հարցնէք: Բայց ունինք սուտածեռն բարերարներ, որոնք ամէն տարի հազարաւոր սթերլիններ կը թողուն Որբանոցներու և բարենպատակ հաստատութիւններու համար: Մեզի կը մնայ պարզապէս քիչ մը փոխել հոսանքին ուղղութիւնը և մտքերու դաստիարակութեան գործին յակացնել մէկ մասը միայն այն դումարներէն, որոնք կը ծախսուին հիւանդանոցներ և ծերանոցներ պահելու, անբուժելի հիւանդներ և տնանկներ ապրեցնելու, և կամ սնուցանելու համար որբեր, որոնք պիտի մեծնան անբաններու նման, առանց կրթութեան, առանց դաստիարակութեան, առանց գոնէ արհեստ մը սովորելու և որոնք վաղը ընկերային իրական կորուստներ պիտի դառնան: Բայց ջանանք քիչ մը աւելի լուսաբանել մեր միտքը:

Ըսել չենք ուզեր բնաւ թէ պէտք է մուրացկանութեան գատապարտել մեր որբերը, այլ կրնանք զանոնք պահել որբանոց-տուններու մէջ և ուսում տալ անոնց ազգային վարժարաններու միջոցաւ. այս կերպով նպաստաւորած կ'ըլլանք նաեւ մեր գպրոցները, որոնցմէ առանց խտրութեան պիտի կրնան օգտուիլ Գաղթավարներու բոլոր մանուկները:

Ըսել չենք ուզեր բնաւ թէ որբանոցներէն ելլելէն անմիջապէս յետոյ պէտք է իրենց ճակատագրին յանձնենք մեր որբերը, մանաւանդ որբուհիները, այլ իրենց «home»-ը մատակարարելու համար նախնական անհրաժեշտ հիմնադրամը հայթայթելէ վերջ՝ պէտք է վարժեցնել զանոնք նիւթապէս մասնակցելու իրենց տան պէտքերուն. այս կերպով կրնանք աստիճանաբար թեթեւցնել դրամական այն ծախքերը, զորս այս կարգի տունները կը պահանջեն Միութիւններէն և հանրութենէն:


Ըսել չենք ուզեր բնաւ թէ պէտք է թողուլ որ մեր հիւանդները անխընամ մեռնին, այլ կ'ըսենք միայն թէ պէտք չէ որ հիւանդանոցներ և ապաստանարաններ պահենք և թէ գոհանալու ենք միմիայն քանի մը անկողիններ ունենալով եւրոպական հիւանդանոցներու մէջ, ուր շատ լաւ կրնան խնամուիլ մեր հիւանդները և ապահովաբար մեզի համար աւելի մատչելի նիւթական պայմաններով:

Ըսել չենք ուզեր բնաւ թէ պէտք է մեր բոլոր յարաբերութիւնները խզենք Հայաստանի հետ, այլ Հայաստան օժտուած ըլլալով կանոնաւոր կառավարութեամբ մը, որ կրնայ հասնիլ երկրին բոլոր պէտքերուն, մեզի համար ծաղրելի բան պիտի ըլլար մեր համակրութեան ապացոյցը տալ անոր դրամական այնպիսի նպաստներով՝ որոնց ամբողջական գումարը ոչ այլ ինչ է իրեն համար, եթէ ոչ աւագի հատիկ մը ընդարձակ անապատի մը մէջ, և որուն այնքան ալ պէտք չունի:

Ըսել չենք ուզեր բնաւ թէ պէտք չէ նիւթապէս օժանդակել գաղթականներու զեռեղման գործին, այլ թէ խոհեմութիւն չէ ամէն բանի մէջ նիւթական կողմը միայն նկատի ունենալ:

Վերջապէս մենք կը կրկնենք հազարաւոր տարիներու ծանօթ ճշմարտութիւն մը, որ հիմնախարխսին է մարդկային բոլոր յառաջդիմութիւններուն և որ կը սովորեցնէ թէ միտքը կ'իշխէ նիւթին վրայ և թէ անոր զարգացումը նպաստաւորելու նպատակով եղած ո և է ձեռնարկ աւելի օգտակար, աւելի մեծ և աւելի բարեյաջող հետեւանքներ կը խոստանայ, քան ինչ որ կ'ըլլայ նիւթական բարեկեցութիւն ստեղծելու համար:

Պատերազմէն յետոյ տասներեք տարիներ սահեհեցան և ատեն է որ քիչ մըն ալ ուշադրութիւն դարձընենք մտքի հետ կապուած հարցերուն. այս կերպով միայն կրնանք մեր արդիւնաւոր ծառայութեան բաժինը բերել Հայրենիքին:



Ե.

### ԱՆՀԱՏԱԿԱՆ ՎԱՐԺԱՐԱՆՆԵՐ

Ցարդ իրաւամբ քննադատեցինք մեր Ա.դ.Վ. վարժարաններուն մէջ որդեգրուած մեթոտները ու դէմ արտայայտուեցանք հոգաբարձական այն աղմկայոյզ միջամտութիւններուն, որոնք գործը կազմալուծելու կը ծառայեն միայն. քննադատեցինք չափէն աւելի խճողուած և խիստ յաւակնոտ գտնելով անոնց ուսումնական ծրագիրները. հեզնանքով խօսեցանք աշակերտներուն ձեռքը տրուած դասագրքերուն մասին, որոնք մեծագոյն մասամբ հինէն մնացած են և հեռու երկիւղածութիւն ու պատկառանք ներշնչելէ, դրքեր, որոնց մէջ նկատի չէ առնուած ո և է մանկավարժական օրէնք: Այս բոլորէն յետոյ՝ ընթերցողը գովեստի բառ մը պիտի սպասէ թերեւս մեր անհատական վարժարաններուն նկատմամբ, որոնք — ինչպէս պիտի կարծուի — գերծ են այդ բոլոր թերութիւններէն: Բայց այդ տեսակ բան մը չանցնիր մեր մտքէն:

Ճշմարիտ է թէ անհատական վարժարաններու սեփականատէր տնօրէնները ո և է սեղմումի ենթակայ չին այս հիւրընկալ երկրին մէջ ու զերծ են ամէն տեսակ հակակշիռէ. անուրանալի է նաև թէ անոնք այդ հիմնարկութիւնները կը վարեն իրենց նախընտրած մեթոտներով և իրենց կողմէ ընտրուած ուսու-

ցիչներու ձեռքով: Բայց այս խիստ գնահատելի առաւելութիւններուն առջնօրէն կայ միակ անպատեհութիւն մը, որ կրնայ հակազգել անոնց արժէքին վրայ: Մեր անհատական վարժարանները կը տառապին դժբաժնի պակասէն — վաղուան անստուգութենէն — , և այս անդամալուծութիւնը կը կաշկանդէ անոնց թռիչքն ու տեղ-քայլ ընելու միայն կը ստիպէ զիրենք: Անոնց տնօրէնները տառացիօրէն ծուրկ ծուրկ կ'ըլլան այս մտահոգութենէն և դրամի մշտատեւ հետապընդումը ո՛չ ժամանակ կը թողու իրենց, ոչ ալ մտքի ուշադրութիւն, որպէսզի կարենան լիովին ինքզինքնին նուիրել իրեց պարտականութիւններուն: Իրենց պաշտօնէութեան ընտրութեան մէջ անգամ աղատ չեն անոնք:

Արդարեւ, տեսնուած է որ անոնք իրենց պաշտօնէութեան ցանկին գլուխը կը զարգարեն անուսով մը — ցուցափեղկերու յայտարարութեանց նման — բայց արժէք մը ներկայացնող այդ ուսուցչի անունին կը յաջորդէ անապատը . . .

Որովհետեւ աժան գին և բարձր որակ երկու հակազիր եզրեր են, զորս իրարու հետ հաշտեցնելու միջոցը գեռ չէ գտնուած մինչեւ այսօր: Ու երբ ըսենք թէ անհատական վարժարաններու երկսեռ ուսուցիչներէն մեծագոյն մասը 2—5 ոսկի միայն կը ստանայ — եթէ այդքանն ալ գտնէ — , այն ատեն կը հասկըցուի արդէն այսպիսի պայմաններու մէջ ձեռք բերուած աշխատութեան որակը:

Միւս կողմէ իրենց ուսմանց ծրագիրը իր յաւակնութիւններով շատ մը բաներու մէջ աւելի բարձր է

Ազգ. վարժարաններու ծրագրէն և անոնցմէ ումանք նոյնխակ չեն քաշուիր ինքզինքնին զարդարելէ երկրորդական վարժարանի փառասէր տիտղոսով, հակառակ անոր որ իրենց ուսուցչական մարմինը, ինչպէս տեսանք, հեռու է Բարձրագոյն կրթութիւն մը ջամբելու համար պահանջուած ձեռնհասութիւնը ներկայացնելէ:

Այսու հանդերձ, կարելի է աւելցնել, յօգուտ անհատական վարժարաններուն, թէ այդ հիմնարկութեանց մէջ աւելի խնամք կը տանին օտար լեզուներն ուսուցանելու համար:

Սոստո՞վանինք նաև թէ այդ վարժարաններուն մէջ աշակերտութիւնն աւելի բարեկիրթ կը պահէ ինքզինքը և աւելի լաւ դաստիարակութեան մը հաւաստիքը կուտայ քան թէ մեր Ազգ. վարժարաններուն մէջ. բայց այս առաւելութիւններուն արժանիքը դպրոցէն աւելի պէտք է ծնողներուն վերազրել, վասընզի մոռնալու չենք թէ անոնց աշակերտները մեծ մասամբ կը վերաբերին այն դասակարգին, ուր կըրթութիւնը օրօրօցէն կը սկսի:

Մէկ խօսքով, մեր համոզումն այն է թէ մեր Ազգ. վարժարանները, հակառակ իրենց բոլոր թերութիւններուն, ամէն տեսակէտով աւելի բարձր են անհատական վարժարաններէն: Աւելորդ է ըսել թէ մեր այս դիտողութիւնը կը վերաբերի անհատական նախակըրթարաններուն և ոչ Պէրպէրեանի, որ հաւատարիմ իր անցեալի աւանդութիւններուն՝ կը ջանայ իրականացնել իր վրայ դրուած յոյսերը ուսուցչական ձեռնհաս խումբի մը միջոցաւ:

Զ.

ԵՐԿՐՈՐԴԱԿԱՆ ՎԱՐԺԱՐԱՆՆԵՐ

ՊԵՐՊԵՐԵԱՆ

Աղէկ բան է մանկական լաւ վարժարաններ ունենալ, աւելի աղէկ՝ լաւ նախակրթարաններ ունենալ, բայց շատ աւելի աղէկ է քանի մը հատ լաւ երկրորդական վարժարաններ պահել, որովհետեւ ազգ մը, որ զուրկ է երկրորդական վարժարաններու մէջ պատրաստուած ընտրանիէն, կը նմանի բանակի մը, որ վարիչներ չունի, այսինքն ձեւազուրկ մարմին մըն է, առանց ոյժի և առանց կեանքի:

Հետեւաբար, իր մեծութեան, իր բարօրութեան, ի՞նչ կ'ըսեմ, նոյնինքն իր գոյութեան տեւականացման մտահոգութիւններէն տարուած ազգ մը պարտաւոր է մասնաւոր հոգածութիւն մը ցոյց տալ պատրաստելու համար այդ ընտրանին, որ կարենայ վարել, ներշնչել ու պաշտպանել զինքը բոլոր նեղ կացութիւններուն մէջ: Վա՛յ այն ժողովուրդներուն որոնց ճակատագիրը յանձնուած է կէս-զարգացածներու — բարի կամեցողութեամբ և յաճախ ընտիր դիաաւորութիւններով տուգորուած մարդիկ, բայց մարդիկ, որոնց մտաւորական կարճատեսութիւնը անկարող կը դարձնէ զիրենք նախատեսելու և կանխելու...

Տարակոյս չկայ թէ մարդկային ճակատագիրը վա-

րողը Բաղդն է, որ յաճախ կրնայ ի դերեւ հանել ամենէն իմաստուն կանխատեսութիւններն անգամ: «Բայց — կ'ըսէր Պղատոն Աթենացիներուն ուղղած իր խօսքերուն մէջ — պէտք է նկատողութեան առնել նաև ուրիշ ազգակ մը, և ընդունիլ թէ արուեստն ալ կըրնայ սրուց գեր մը կատարել մեր ձեռնարկներու յաջողութեան կամ ձախողութեան դարձին մէջ: Արգարե, փոթորկէն բռնուած մէկու մը համար, մեծ առաւելութիւն մըն է դիմել նաւուղիով և օգնութեան կանչել անոր գիտութիւնը»:

Արգ, Պղատոնի յիշած այդ նաւուղիները բարձրագոյն վարժարաններու մէջ միայն կրնան պատրաստուիլ, և ճիշդ ասոր համար է որ այնքան մեծ կարեւորութիւն մը կը ներկայացնեն անոնք ազգերու կեանքին մէջ:

Երկրորդական վարժարաններու հարցը կենսական նշանակութիւն մ'ունի նաև մեզի, Գաղութահայերուս համար: Երեսի վրայ թողուլ մեր երկրորդական կըրթութիւնը, կը նշանակէ տան մը պատերը բարձրացնել առանց հաստատուն տանիքով մը ծածկելու զանոնք:

Այս կարգի մտածումներէ թելադրուած՝ կ'որոշեմ այցելել նաև Պէրպէրեան վարժարանը, որուն շրջափակէն ներս կը մտնեմ Յունուար 27ի Շարաթ և յաջորդ օրերը:

Պէրպէրեան վարժարանը տեղ բռնած է Տարամալիի հին պալատին մէջ ի Շուպրա, մէկը այն թաղա-

մասերէն որ ընդամէնը ասկէ երեսուն տարիներ առաջ, Գահիրէի ամենէն ազնուապետական թաղամասը կը ներկայացնէր: Լայն սենեակներ, բարձր ձեղուններ և ընդարձակ պարտէզ մը:

Բայց պարտէզին մէջ չկան այլևս թաւախիտ ծառերու այն հովանուտները, որոնց տակ պտոյտի կ'ելլէին այնտեղ արգելափակուած գեղուհիները, ոչ ալ այն աւազանը՝ որ անոնց շնորհալի գէմքերը կը ցուցնէր իր վճիտ հայելին մէջ, լուեր է նաև ջուրի այն ցայտքը, որ անոնց ճռուղիւններուն կ'ընկերանար իր մրմունջներով: Ծառուղիներէն հետք չէ մնացած, աւա՛ղ, աւազանը լեցուած գետնին հաւասար ու վարդերը մեռած...

Մանուկները — և ո՞վ չի գիտեր թէ ս'րքան անգութ են անոնք իրենց այս տարիքին մէջ — ընդհուպ պիտի մեռցնեն նաև վերջին թփիկներն ու վերջին արմաւենիները և քիչ ատենէն այդ պարտէզը պիտի գառնայ երեսի վրայ ձգուած գետին մը:

Պալատին գետնայարկին վրայ կը գտնուին Տնօրէնութեան պաշտօնատեղին, գրադարանը, աշխատանոցը, ճաշարանը, ևն. : Երկրորդ յարկը յատկացուած է գասարաններուն ու ննջարաններուն, որոնց կահաւորումը խիստ պարզ է, ու զարմանալի է որ հոս ալ սեղաններն ու նստարանները անհամանման են և գունաթափ, պատերը փոշոտ, իսկ ննջարաններուն մէջ գիշերօթիկ աշակերտներուն հագուստները պատերէն կախուած են առանց խնամքի. կը զգաս թէ ճա-

շակը, մանրակրկիտ մաքրասիրութիւնը կը բացահայտի:

Պէրպէրեան ունի 120 աշակերտներ 8—19 տարեկան, որովհետեւ վարժարանը հինգ տարրական դասարաններ ալ կը պահէ:

Երեք անգամ այցելեցի այնտեղ, դասերուն ներկայ գտնուեցայ, աչքէ անցուցի շատ մը գրաւոր պարտականութիւններ, քննեցի ամէն մէկ դասարանի դասօգրքերը, երկար բարակ տեսնուեցայ անոր տնօրէններուն, Պ. Պ. Շ. և Օ. Պէրպէրեաններու հետ: Այնպէս որ կրնամ այլևս իմ տպաւորութիւններս բանաձեւել: Պէրպէրեան վարժարանի ուսումնական ծրագիրը հաւասար է ֆրանսական լիսէներու ծրագրին: Օտար լեզուները, — մասնաւորաբար ֆրանսերէնը — շատ լաւ կ'աւանդուին այնտեղ: Պ. Պ. տնօրէնները խիստ ընտիր դրութիւն մը որդեգրած են այս ուսուցման համար: Գիտութիւնները, պատմութիւնն ու գըրականութիւնը կը դասաւանդուին անգլիերէն ու ֆրանսերէն լեզուներով, այս կերպով աշակերտները կրնան զրական ու միեւնոյն ատեն գործնական ծանօթութիւններ ձեռք բերել այդ լեզուներուն մասին:

Բայց ինչ որ ամենէն աւելի կը շեշտէ Պէրպէրեանի կարեւորութիւնը Եգիպտահայոց համար, այն է թէ այնտեղ հայ աշակերտը բարձրագոյն կրթութեան հետ կը ստանայ նաև ազգային դաստիարակութիւն, բան մը զոր չեն կրնար տալ օտար վարժարանները: Հոս է ահա իր գլխաւոր արժանիքը Եգիպտոսի նման

երկրի մը մէջ, ուր բազմաթիւ առաջնակարգ Գօլէճներ կը գտնուին: Եթէ կը սիրենք զայն ու կը փափաքինք տեսնել անոր բարգաւաճումը, պատճառն այն է որ Հայկական մշակոյթի վառարան մըն է ան:

Բայց հարցանիչ մը կը ցցուի մեր առջև: Պէրպէրեան վարժարանը պիտի կրնա՞յ շարունակել իր բարերար գործը: Բաւական մը կասկածելի է, վասն զի իր գոյութիւնը սպառնալիքի տակ է: Անիկա մինչև այսօր կրցաւ ապրիլ արուեստական միջոցներով, այսինքն Առաջնորդարանէն յատկացուած նպաստներով, հանգանակութիւններով և զանազան նուիրատուութիւններով: Բայց համալսարհային տնտեսական տագնապին հետեւանքով, որ բաւական ծանր կշռեց մասնաւորաբար այս երկրին մէջ, բոլոր այդ աղբիւրները յանկարծ ցամքեցան և արդէն քանի մը հարիւր ոսկիներու բաց մը կը նախատեսուէր իր այս տարուան պիւտճէին մէջ: Ի՞նչպէս պիտի կրնայ ուրեմն 1931—32ի և յաջորդ գարնային տարիներու իր պիւտճէն գոցել: Թերթերուն մէջ կարգացինք Նորին Ամենապատուութեան, Գուշկեան Սրբազանի յուզիչ կոչը ի նըպաստ Պէրպէրեանի, և հանրութիւնը տեղեկացաւ Քաղաքական Ժողովոյ այն որոշման՝ որով պէտք տեսնուած է ժողովրդական հանգանակութեան գիմել մեր միակ երկրորդական վարժարանը կանգուն պահելու համար: Բայց այս ամէնը պատահական միջոցներ են միայն, հեռի հաստատուն կրուան մը և լուրջ երաշխաւորութիւններ ներկայացնելէ:

Կ'ըսուի նաև թէ հարկ է ուժեղ բրոքականտ մը կազմակերպել յօգուտ Պէրպէրեանի, անոր աշակերտաց թիւն աւելցնելու և այս կերպով անոր եկամուտի աղբիւրները կրկնապատկելու համար: Կը կարծեմ սակայն թէ հոս ալ ինքզինքնիս կը խաբենք և սխալ հաշիւներով կ'առաջնորդուինք:

Որովհետեւ ո՛րքոն ալ մեծ ըլլայ հանրութեան բարեացակամութիւնը Պէրպէրեանի նկատմամբ, և ի՞նչ որ ալ խոստանայ ի նպաստ իրեն կազմակերպուելիք բրոքականտը, դժուար է յուսալ որ դեռ երէպրատենի համար Պէրպէրեան վարժարանը յաջողի ներկայիս իր ունեցածէն աւելի աշակերտներ համախմբել իր գրասեղաններուն վրայ:

Արդարև, անոր աշակերտներուն այսօրուան թիւը պայմանաւորուած է Գահիրէի հայ ազգաբնակչութեան սահմանափակ քանակով: Մայրաքաղաքին մէջ հաստատուած հայերուն թիւը 10,000 կը հաշուեն: Արդ, բնական համեմատութեամբ քանի՞ հատ երկրորդական վարժարանի աշակերտ կրնայ տայ 10,000 հոգինոց բնակչութիւն մը: Առ առաւելն հարիւր: Ու Պէրպէրեան արդէն կրցած է ձեռք բերել այդ թիւը: Միայն թէ — և այս զիտողութիւնը խիստ կարեւոր է — այդ թիւը, աշակերտներու այդ քանակը, բոլորովին անհամեմատական է ծախքերու այն գումարին հետ, որ անհրաժեշտ է Երկրորդական վարժարան մը կանգուն պահելու և անոր բարւոք գործառնութիւնն ապահովելու համար:

Ի՞նչպէս կարելի է լուծել այս խնդիրը: Մէկ մի-

Նոց միայն կայ: Որպէս զի Պէրպէրեան վարժարանը կարենայ յարատեւել, պարտաւոր է կարելի եղածին չափ սեղմել իւր ծախքերը և իր պիւտճէն հաւասար կշռել իր սեփական միջոցներով: Կրնա՞յ արդեօք: — Այո՛, կրնայ, օրինակ, նախ և առաջ խնայելով շէնքին տարեկան վարձագինը: — Եւ ինչո՞ւ համար չի տեղաւորուիր Գալուստեան վարժարանի մէկ թեւին մէջ՝ կարեւոր նկատուած փոփոխութիւններն ու անհրաժեշտ նորոգութիւնները կատարել տալէ վերջ: յետագային տարրական դասարանները և պահել միմիայն չորս կամ հինգ բարձրագոյն դասարաններ, և վերջապէս՝ սահմանափակել ուսուցիչներուն թիւը:

Կարելի չէ խորհիլ թէ կրթական հիմնարկութիւն մը, որ կ'ուզէ ապրիլ, ի՞նչպէս կրնայ 20 հատ ուսուցիչ պահել 120 աշակերտի համար!!! Եգիպտական կառավարութիւնն անգամ պիտի վարանէր այս կարգի շռայլութեան մը առջեւ: Արդարեւ, բոլոր 60,000 հոգինոց քողաքներու մէջ, ինչպէս Բոս-Սաիտ և Սուէզ, բարձրագոյն վարժարաններ բացած է և միմիայն 100,000 բնակչութիւն ունեցող քաղաքներու մէջ է որ, օր. Թանթա, Չակազիկ, Մանսուրա, մանչերու յատուկ մէկ մէկ Գօլէճ կը պահէ:

Ֆուէրներու կազմակերպութեան նման ուժեղ ընկերակցութիւն մը, որ 20 հատ նախակրթարաններ ունի վերին և Ստորին Եգիպտոսի մէջ ցրուած, երկու Գօլէճներ միայն կը պահէ, Գահիրէի մէջ Քորոնֆիշի Գօլէճը, իր չորս բարձրագոյն կարգերով, և Սէն—Մարքը Աղեքսանդրիոյ մէջ: Գալով ձիզուիթներուն,



առոնք ալ ստիպուած ըլլալով տեղի տալ Ֆուէրներու և Լիսէ Ֆրանսէի կողմէ իրենց դէմ մղուած ուժեղ մրցակցութեան, գոցեցին Աղեքսանդրիոյ իրենց Գօլէճը և դոհացան միայն հատ մը պահելով Գահիրէի մէջ:


Վարժարանին շէնքը փոխել, ուսուցիչներուն թիւը պակսեցնել և մնացողներուն աշխատութեան պահերը աւելցնել, այս բոլորը տրակոնեան միջոցներ են: Բայց ուրիշ ճար չկայ: Անխուսափելի երկընտրանքի մը առջեւ կը գտնուին Պէրպէրեան եղբայրները. յարմարիլ պայմաններուն կամ վարժարանը գոցել: Արդարեւ իրենց կողմէ մեծ անխոհեմութիւն պիտի ըլլար եթէ շարունակէին յարատեւել ներկայ ուղղութեամբ, յուսալով որ օրին մէկը հրաշքով գալիք օգնութիւն մը կրնայ յանկարծ լայնը հանել զիրենք: Կը կարծե՞ն արդեօք թէ կիսամիջոցները — նուիրատուութիւն, հանգանակութիւն, պարտք, ևն. — բաւական են վարժարանը ապրեցնելու համար: Ասկէ զատ, ո՞վ չի գիտեր թէ այս կերպով ապրող ու է կրթական հիմնարկութիւն շուտով կը կորսնցնէ իր հեղինակութիւնը, համբաւը և բարոյական բարձրութեան այն նկարագիրը, որուն մէջ կը կայանայ իր ոյժը: Եւ առանց բարոյական այդ նկարագրին՝ ի՞նչ բանի պիտի ծառայէր Պէրպէրեանը և ինչո՞վ պիտի կրնար օգտակար ըլլալ այնպիսի երկրի մը մէջ, ուր, ինչպէս ըսինք, բազմաթիւ օտար Երկրորդական վարժարաններ կը գտնուին:

Կասկած չկայ թէ իր ազգային բարձրագոյն շահերուն գիտակցութիւնն ունեցող ամէն Հայ պարտա-



ւոր է նիւթապէս ու բարոյապէս օգնել կրթական այդ հիմնարկութեան, բայց Պէրպէրեան եղբայրները թող ներին մեզի եթէ իրենց յիշեցնենք ժողովրդական ծանօթ առածը. «Օգնէ գուն քեզի, որպէս զի Աստուած ալ օգնէ քեզի...»:

Վերջին պահուն կը լսենք թէ վարժարանին նիւթական վիճակը հետզհետէ ծանրացած ըլլալով, հարկ տեսնուած է կազմել Խնամակալ Մարմին մը՝ անոր հետ տաղանապալից կացութեան դարման մը խորհելու համար: Լսեցինք նաև թէ վերոյիշեալ Մարմինը մտադրած է ստանձնել միանգամայն այդ հիմնարկութեան թէ նիւթական մատակարարութիւնը և թէ կրթական ղեկավարութիւնը, իր կողմէ նշանակուած Տնօրէնի մը միջոցաւ: Մեր կարծիքով, սակայն, այսպիսի կարգադրութիւն մը գծուար թէ կարենայ օգտակար արդիւնքներ ապահովել: Խնամակալ Մարմինը շատ աւելի դեղեցիկ գործ մը տեսած պիտի ըլլար, սահմանափակուելով միմիայն նիւթական մատակարարութեան գերին մէջ և կրթական ղեկավարութիւնը վըստահելով Պէրպէրեան եղբայրներուն, որոնց ձեռնհասութիւնը ապացուցուած է երկար տարիներու փորձառութեամբ:



20008

0013

« Ազգային գրադարան



NL0054254

57

ԳԻՆ 10 ԵԳ. ԴԼ.

Դիմել Հեղինակին՝

RUE DE THÈBES No. 63

CAMP DE CÉSAR

կամ՝ ԳՍՍԱԳԵԱՆ ՏՊՐԱՆ

RUE SALAH EL DINE No. 17